

Tuhun Nyoo Tsa Tyaa Ra Lucas

Nu quitsahā jacotó ra Lucas tuhun ra Cristo tsi ra Teófilo

¹ Cuaha ñi nyivi nducú ñi cuhva tyaa ñi nuu tutu tandihi tsa cuví nu yucú ndi ihya. Tyaa ñi cuhva ² nacatyí tuhun nyivi tsihin yo, ñi tsa nyehe tan cahan tuhun ra Jesús nda quivi jihna ñi. ³ Tan yuhu tucu tsa yahā cahví yu tan nducú tuhun vaha yu tandihi tsa cuví nda nu quitsahā. Yacan cuenda cuñí yu tyaa yu tuhun ihya tsa cuenda un, yoocho Teófilo, nda nu quitsahā tan nda nu ndihi. ⁴ Tyin tacan tan coto un tyin nditsa tsa jacuahā nyivi tsi un.

Nu jacotó iin ángel tsi ra Zacarías ama cua cacu ra Juan, ra cua jacoondutya tsi nyivi

⁵ Quivi tsa cuví ra Herodes rey tani cahnu cuenda Judea, tsicoo iin ra cuví jutu, nañí ra Zacarías. Tan yihí ra cuenda ra cuví jutu naha ra tsa nañí Abías. Tan ñasihi ra nañí ña Elisabet. Tata ra Aarón, ra cuví jutu tahañ tsanaha, cuví ña. ⁶ Tan nduve maa cuatyí ñi nuu Nyoo. Tyin vaha xaan tyaá yahvi ñi tuhun caahán Nyoo Jutu yo. Tan yoñi maa cuví tyaa cuatyí tsi ñi. ⁷ Tan nduve maa sehe ñi tsicoo. Tyin ña Elisabet, ña cuví coo sehe ña. Tan tsa tsahnu xaan nduvi taahan ñi.

⁸ Iin quivi taahán tsi tandihi ra jutu tsa cutahan tsihin ra Zacarías, tsa jaha tyiñu ra naha tyiñu Nyoo. ⁹ Tan cuhva iyó maa ra cuví jutu naha ra,

tava ra naha suerte, ndáa ra cua tahan tsi quihvi tsitsi vehe ñuhu Jutu Nyoo, tyin cahmi ra cutu. Quivi can tahan tsi tsi ra Zacarías. ¹⁰ Tan cuaha nyivi yucú ityi tsata vehe ñuhu tsicán tahvi ñi tsi Nyoo, tsitsi tsa tsahmí ra cutu can. ¹¹ Tan tsitsi tsa ndi nyii ra ican tan quituvi iin ángel Jutu Nyoo nu nyii ra. Tan nyaá nyityi ángel can ityi xiin cuaha nu nyaá altar nu tsahmí ra cutu. ¹² Tan tsa nyehe ra Zacarías tsi ángel ican, iyo xaan cuñi ra. Tan nayuhvi xaan ra. ¹³ Tan ángel ican catyí ra tsihin ra:

—Zacarías, ña nayuhvi un. Tyin Nyoo tsiñi ra tsa cahan un tsihin ra. Tan cua coo iin sehe ña Elisabet ñasihi un. Tan cua cunañi ra Juan. ¹⁴ Si xaan cua cuñi un. Tan cuaha xaan nyivi cua cusii ndihi iñi quivi cua cacu ra. ¹⁵ Tyin sehe un, cahnu xaan cua cuvi ra nuu Nyoo Jutu yo. Ña cua coho ra vinu tan ndi nyixi. Tan ñihi xaan cua quih Tatyí li Nyoo tsi ra tsa ndi cumañi ca cacu ra tan tandihi tyembu tsa cua coo ra. ¹⁶ Tan cuaha xaan nyivi Israel cua cunycun ñi tsi Jutu yo Nyoo jaha ra. ¹⁷ Juvín ra cua cuhun ityi nuu Jutu Mañi yo. Tan cua coo tunyee iñi Nyoo tsi ra. Tan cua quih xaan Tatyí li Nyoo tsi ra. Tyin cua cuvi ra tumaa ra Elías, ra cuvi ndusu yuhu Nyoo tahan tsanaha. Tan cua cuhva cuenda ra nácaa coo vaha nyivi iyó sehe tsihin sehe ñi. Tan cua janaha ra tsi nyivi caquiñi, na tyaa yahvi ñi tuhun caahán Nyoo. Tacan cua janduvaha ra tsi nyivi tan cua cuatu vaha ñi tsi Nyoo —catyí ángel tsihin ra Zacarías.

¹⁸ Tan tsicā tuhun ra Zacarías tsi ángel can, tan catyí ra:

—¿Nacaa tan coto yu tyin nditsa tsa cua coo sehe

ñasihi yu? Tyin yuhu tsa tsahnu xaan yu. Tan tacan tucu ñasihi yu —catyí ra.

¹⁹ Tan ángel can nacahan ra tan catyí ra:

—Yuhu Gabriel nañí yu. Tan tsicá yu tyiñu Nyoo. Maa ra tava tyiñu tsi yu tyin jacoto yu tyiñu ihya tsi un tan jacoto yu tuhun vaha ihya tsi un.

²⁰ Tan vityin cua nduñhi un. Tyin ña tsinú iñi un tsa caahán yu tsihin un. Tan ña cua cuví cahan un nda cuanda tsa yaha cacu sehe ñasihi un. Tan nda quívi cundaa tandihi tsa cahan yu tsihin un —catyí ángel ican tsihin ra.

²¹ Tan nyívi tsa ndatú tsi ra Zacarías ityi tsata vehe ñuhu, iyo xaan cuñí ñi tyin cucuee xaan ra tsitsi vehe ñuhu can. ²² Tan cuhva tsa quitá ra Zacarías, ña cuví maa cahan ra tsihin ñi. Tan tuví iñi ñi tyin iyó tsa nyehe ra tsitsi vehe ñuhu can. Tacan tan quitsaha caahán ra tsihin ñi tsihin ndaha ra. Tyin ña cuví cahan ra.

²³ Tan quívi ndihi tyiñu jahá ra Zacarías vehe ñuhu can, tan cuanuhu ra yuvehe ra. ²⁴ Tsa yaha quívi can tan tsicuhun sehe ñasihi ra, ña Elisabet. Tan ña quitá maa ña tsata vehe tsa tandihi tsa uhun yoo. Tan tsicá iñi ña: ²⁵ “Tyehen javaha Jutu Mañi yu tsihin yu, tyin tacan tan ña cahan nyaa ca nyívi tsi yu”, cuñí ña tsicá iñi ña.

Nu jacoto iin ángel tsi ña María tyin cua cacu ra Jesús

²⁶ Tsa quitá iñu yoo tsa ñuhú sehe ña Elisabet, tan jacuhun Nyoo tsi ra ángel Gabriel ñuu Nazaret tsa canyií Galilea. ²⁷ Tyin cahan ra tsihin iin ñaha yoco tsa nañí María. Tan tsa nyaa maa tsa cua tindaha ña tsihin ra nañí José, ra cuví tata ra rey David.

²⁸ Tan quihvi ángel ican nu iyó ña María. Tan catyí ra tsihin ña:

—Nacumi tsi un, María. Ñihí un tumañi iñi nuu Nyoo. Maa ra iyó tsihin un. Tan nasocó xaan ca ra tsi un tan ñavin ca tandihi ca ñaha —catyí ángel ican tsihin ña.

²⁹ Tan tsa tsiñi ña tsa cahan ra, iyo xaan cuñi ña tsa cahan ra. Tan tsica iñi ña: “¿Nacuenda tacan caahán ra ihya nacumi tsi yo?” tsica iñi ña.

³⁰ Tan catyí ángel ican:

—Ña nayuhvi un, María, tyin ñihí un tumañi iñi Nyoo. ³¹ Vityin cua cuhun sehe un. Tan cua cunañi ra Jesús. ³² Cahnu xaan ra cua cuvi ra. Tan Sehe Nyoo cahnu cua cuvi ra. Tan cua cuvi ra rey jaha Nyoo Jutu yo, tumaa cuvi ra David, tsii tsaahnu ra. ³³ Tyin cua cundaca ñaha ra tsi nyivi Israel tandihi maa tyembu. Tan ña cua ndihi maa tsa cundaca ñaha ra —catyí ángel can tsihin ña.

³⁴ Tacan tan tsica tuhun ña María tsi ángel, tan catyí ña:

—¿Nacaa cua cuvi can? Tyin yuhu, ñaha ca coo yii yu.

³⁵ Tan nacahan ángel tan catyí ra:

—Maa Tatyí Ii Nyoo cua quitsi siqui un. Tan tunyee iñi Nyoo, ra nyaá gloria, cua quitsi tan cua casi tsi siqui un tumaa iin vico. Yacan cuenda Ra Ii tsa cua cacu cua cunañi ra Sehe Nyoo. ³⁶ Tacan tucu ña Elisabet ña tsatsin un cua cacu iin sehe ña vasu tsa tsahnu ña. Tan catyí nyivi tyin ñaha can ña cuví coo sehe ña. Maa tyin vityin tsa ñuhú sehe ña. Tsa iñu yoo tsa ñuhú sehe ña. ³⁷ Tyin Nyoo nduve tsa ña cuví jaha ra —catyí ángel tsihin ña.

³⁸ Tan catyí ña María:

—Yuhu cuví yu musu Jutu Mañi yo. Na javaha maa ra cuhva catyí un —catyí ña.

Tacan tan cuahán ángel can.

Nu cuahán ña María cuanyehé ña nu nyii ña Elisabet

³⁹ Tan iin quivi can, numi ñi cuahán ña María iin ñuu tsa canyii Judea nu maa ñi maa yucu iyó. ⁴⁰ Tan quihvi ña tsitsi vehe ra Zacarías. Tan nacuhva ña nacumi tsi ña Elisabet. ⁴¹ Tan tsa tsiñi ña Elisabet tsa cahan ña María, tan natuñu sehe ña tsitsi ña. Tan ñihi nyaá Tatyí Ii Nyoo tsihin ña. ⁴² Tan ñihi xaan nacahan ña, tan catyí ña:

—Nyoo nasocó xaan ra tsi un, María, tan ñavin ca tandihi ca ñiñaha. Tan nasoco ra tsi sehe un.

⁴³ ¿Tan yóo cuví yuhu? Tyin quitsi sihi Jutu Mañi yu quitsi nyehe ña nu nyaá yu. ⁴⁴ Cuhva tsa tsiñi yu tsa cahan un, tan natuñu sehe yu tsitsi yu. Tyin sii xaan cuñí ra. ⁴⁵ Tan sii xaan cuñí tucu maa añaima un tyin tsinú iñi un. Tyin cua cuví cuhva tsa cahan Nyoo tsihin un —catyí ña Elisabet.

⁴⁶ Tan catyí ña María:

—Jacahnú yu tsi Nyoo tsihin tandihi añaima yu.

⁴⁷ Tan sii xaan cuñí añaima yu tsihin Nyoo ra jacacú tsi yu.

⁴⁸ Tyin cuví yuhu iin ñaha ndaahvi tan Nyoo nyehe ndaahvi ra tsi yu.

Tan vityin tandihi quivi cua cahan nyivi tyin cahnu xaan tumañi iñi ñihí yu.

⁴⁹ Tyin Nyoo, cahnu xaan cuví ra. Tan cahnu tsa javahá ra tsihin yu.

Tan ii xaan sivi ra.

⁵⁰ Tan ndaahvi cuñí ra tsihin tandihi nyivi tsa cua coo tan tyaa yahvi ñi tsi ra.

⁵¹ Cahnu xaan tsa javahá ra tsihin tunyee iñi tsa iyó tsi ra.

Jatsiyo ra tsi nyivi tsa cahnu xaan tsicá iñi ñi.

⁵² Quinyaa ra tunyee iñi iyó tsi nu cuví rey.

Tan cua janducahnu ra tsi nyivi ndaahvi.

⁵³ Tsahá Nyoo tsa vaha tsi nyivi cuñí coto tsa vaha.

Tan nyivi cuca tsa cuñí tyin nduve tsa tsiñí ñuhu tsi ñi, tsihin ndaha ndi ñi, jacuhún ra tsi ñi.

⁵⁴ Jatyinyeé ra tsi nyivi Israel tsa cuví ñi musu ra.

Tan ña naá iñi ra tsi ñi. Nyehé ndaahvi ra tsi ñi.

⁵⁵ Tumaa cuhva catyi Nyoo tsihin ra Abraham, tsii tsaahnu yo, tan tsihin sehe ra, tacan ñi javahá maa Nyoo —catyi ña María.

⁵⁶ Tan ña María ndoo ña tsihin ña Elisabet uñi yoo. Tan tsa yahá uñi yoo can tan cuanuhu ña nda yuvehe ña.

Quivi cacu ra Juan, ra tsa jacoondutyá tsi nyivi

⁵⁷ Tsa tsaa quivi tsa cacu sehe ña Elisabet, jacacu ña iin rayi. ⁵⁸ Tan nyivi vehe ña tsihin nyivi tsa iyó yatyin ñi yuvehe ña, si xaan cuñí ñi. Tacan tucu maa ña. Tyin vaha xaan tsa javahá Nyoo tsihin ña.

⁵⁹ Tan tsa quitá una quivi tsa cacu ra, tan tyaa ra naha tuñi Nyoo tsi ra tumaa cuhva iyó maa ñi. Tan cuñí ra naha tsa cunañi ra Zacarías tumaa nañi maa jutu ra. ⁶⁰ Maa tyin sihi ra catyi ña:

—Ña cuví. Tyin Juan cua cunañi ra.

⁶¹ Tan catyi ra naha:

—¿Nacuenda jacunañi un Juan tsi ra? Tan yoñi nyivi ndo nañi tacan —catyi ra naha.

⁶² Tan quitsahá tsicá tuhun ra naha tsihin ndaha ra naha tsi jutu ra. Tyin coto ra naha náa sivi cuñí ra tsa cunañi ra. ⁶³ Tan tsican jutu ra iin vitu, tan

nuu vitu ican tyaa ra: “Juan cua cunañi ra”, tyaa ra.

Tan tandihí maa ra ican naha ra iyo xaan cuñí ra naha tsa tacan. ⁶⁴ Juvín ñi maa hora can nacahan ra Zacarías. Tan quitsahā jacahnú ra tsi Nyoo.

⁶⁵ Tan tandihí maa nyívi iyó yatyin yuvehe ñi, iyo xaan cuñí ñi cuví. Tan tandihí maa nyívi tsa iyó yucu iyó Judea ican nacatyí tuhun tahan ñi tsa cuví can. ⁶⁶ Tan tandihí maa nyívi tsa tsitō can, tsicá iñi ñi, tan tsicá tuhun tahan ñi tsi ñi:

—¿Yóo ra cua cuví ra lee ihya? —catyí ñi.

Tyin nditsa, Nyoo nasocó xaan ra tsi ra.

Nu jacahnú ra Zacarías tsi Nyoo

⁶⁷ Ra Zacarías jutu ra Juan, ñihi nyaá Tatyí Ii Nyoo tsihin ra. Tan tsahā cuenda ra tsa caahán Nyoo tsihin ra, tan catyí ra:

⁶⁸ —Cahnu xaan ra cuví Jutu yo Nyoo cuenda yo nyívi Israel.

Tyin quitsí ra nu yucú yo, tsa cuví yo nyívi maa ra.

Tan jacacú ra tsi yo.

⁶⁹ Tan tsahā ra iin ra tsa cahnu xaan cuví tsi yo, ra cua jacacu tsi yo.

Tata ra David, ra tsa cuví musu Nyoo cuví ra.

⁷⁰ Tacan cua javaha ra, catyí Nyoo tahan tsanaha, quívi cahān ra cuví ndusu yuhu ra, tan catyí ra naha tyehen:

⁷¹ Cua jacacu Nyoo tsi yo ndaha nu xaan iñi tsi yo, tan nuu tandihí nu tsa ndasi cuñí nyehe tsi yo.

⁷² Tan cua cundaahvi iñi ra nyehe ra tsi nyívi yo tsa tsicoq tahan tsanaha.

Tan cua nducuhun iñi ra tsa cahān ra tsihin ñi tahan tsanaha.

73 Cahān maa Nyoo tsihin ra Abraham, tsii tsaahnu yo,

74 tan catyī ra tyin cua jacacu ra tsi yo ndaha nu xaan iñi tsi yo.

Tyin ña cua nayuhvi ca yo jacahnu yo tsi ra.

75 Tan maa ra cua janaha ra cuhva coo yo.

Tan vaha cua coo yo nuu ra tan coo yo maa ñi tsa cuenda maa ra tandihī quīvi tsa cua coo yo ñayīvi —catyī ra Zacarías.

76 Tan catyī ra Zacarías tsihin lee can:

—Sehe luhlu yu, yooho cua cuvi un ndusu yuhu Nyoo, ra nyaá gloria.

Tyin cuhun un ityi nuu Jutu Mañi yo. Tan cua cahan un tuhun ra tsihin nyīvi tyin tsa cuñi quitsi ra.

77 Tan cua jacoto un tsi nyīvi tyin cua jaha Nyoo tucahnu iñi tsi ñi.

Tacan tan cacu añima ñi.

78 Tyin Jutu yo Nyoo cuñi ra tsi yo. Tan cundaahví xaan iñi ra tsi yo.

Tan cua jaquitsi ra iin ra jatyinyee tsi yo. Tan cuvi ra tumaa ñuhū ñicanyii.

79 Tyin cua janaha ra ñuhū nditsin nu iyó nyīvi nu naa, nu ndatú tuhun tsiihī tsi ñi.

Cua janaha ra ityi ra tsi yo, ityi vaha —catyī ra Zacarías.

80 Tan ra luhlu can cua cuahnu ca ra. Ñihi xaan tsicoq tunyee iñi tsi ra tsihin Tatyī Ii Nyoo. Tan tsicoq ra iin tsiqui ndi nda cuanda quīvi tsa nacoto nyīvi Israel tsi ra.

2

Quivi cacu ra Jesús (Mt. 1.18-25)

¹ Quivi ican tsicoo iin ra ndacá ñaha, ra cuví rey cahnu, nañí ra Augusto. Tava tyiñu ra tsi ra nyisó tyiñu naha ra na tyaa ra naha sivi tandihí nyivi taní cahnu ñuu ñayivi. ² Ihya cuví tsa jihna ñi tsinyaa sivi nyivi. Tan ra Cirenio cuví ra ra ndacá ñaha tandihí ñuu nu cuví Siria. ³ Tan tandihí nyivi cuanuhu ñi ñuu ñi, tyin cua ndaca ñi sivi ñi. ⁴ Yacan quee ra José ñuu Nazaret tsa canyí Galilea. Tan cuahán ra ñuu Belén tsa canyí Judea, nu cacu ra rey David, tyin tata ra David cuví ra. ⁵ Cuahán ra cuandacá ra sivi ra tsihin ña María, tan tsa nyaá maa tsa cua tindaha ñi. Tan ñuhú sehe ña. ⁶ Tan tsa ndi yucú ca ñi ñuu Belén ican tan quitsaha cuuhví tsitsi ña tyin tsa cua cacu sehe ña. ⁷ Tan ican cacu sehe nuu ña. Tan cava nuu ña jahma tsi ra. Tan nacaquin ña tsi ra tsitsi iin canuva nu tsatsí quiti itya. Tyin ña ñihí ñi iin vehe coo ñi.

Cuhva cahan ángel tsihin ra jahá cuenda mbee

⁸ Yatyin ñi ñuu Belén can yucú ra jahá cuenda mbee tsa tsacuaa. ⁹ Tan sana iñi ra naha quituvi iin ángel Nyoo. Tan jandunditsin Jutu yo Nyoo taní cahnu nu yucú ra naha. Tan nayuhví xaan ra naha.

¹⁰ —Ña nayuhvi ndo —catyí ángel can—. Tyin vatsí cahan yu iin tsa vaha xaan tsihin ndo. Sii xaan cua cuñí tandihí cuí maa nyivi tsa cuenda tsi. ¹¹ Vityin nda ñuu ra David cacu iin ra cua jacacu tsi nyivi. Cuví ra Cristo, ra cuví Jutu Mañi yo. ¹² Tan tsihin cuhva ihya cua nacoto ndo tsi ra: cua nañihi

ndo tsi ra lee ican, cavá nuu ra jahma tan canyií ra tsitsi iin canuva nu tsatsí quití —catyí ángel can tsihin ra jahá cuenda mbee can.

¹³ Tan juvin ñi cuhva ican quituví cuaha xaan ángel tsihin ángel can, tan jacahnú xaan ra naha tsi Nyoo, tan catyí ra naha:

¹⁴ Cahnu xaan cuví Nyoo, ra nyaá gloria.

Tan nu ñuhu ñayivi, na coo tsa vaha añima nyivi tsa ñihí tumañi iñi Nyoo, catyí ra ángel naha ra.

¹⁵ Tacan tan tsa cuanuhu ángel ican nda gloria. Tan catyí iin tan inga ra jahá cuenda mbee can naha ra:

—Cohon ndo Belén. Cunyehe yo náa cuví. Tyin maa Jutu yo Nyoo jacotó tsi yo —catyí ra naha.

¹⁶ Tacan tan numi xaan cuahán ra naha, tan nañihí ra naha tsi ra lee can tsihin ña María tan tsihin ra José. Tan canyií ra lee can tsitsi iin canuva nu tsatsí quití itya. ¹⁷ Tan cuhva tsa nyehe ra naha tsi ra, quítsahá natuhún ra naha tandihí tuhun cahán ángel tsihin ra naha tsa cuenda lee ican tsihin ñi. ¹⁸ Tan tandihí nyivi tsa tsiñi tuhun caahán ra naha, iyo xaan cuñí ñi. ¹⁹ Maa tyin ña María naquihin cuenda ña tuhun ican tsitsi añima ña, tan tandihí tuhun ican tsicá iñi ña. ²⁰ Tan cuanuhu ra jahá cuenda mbee ican naha ra. Tan jacahnú xaan ra naha tsi Nyoo tsa cuenda tandihí tsa nyehe ra naha tan tsa tsiñi ra naha. Tyin cundaa cuhva tsa catyí ángel ican tsihin ra naha.

Nu tyaa cuenda ñi tsi ra Jesús ndaha Nyoo tsitsi vehe ñuhu cahnu

²¹ Tsa ndu una quivi ra Jesús, tan tyaa ñi tuñi Nyoo tsi ra tyin tacan catyí tuhun tsahnu maa ñi. Tan jacunañi ñi Jesús tsi ra. Juvin ñi maa sivi tsa

catyí ángel tsihin ña María quiví tsa ndi cumañi ca cuhun ra Jesús tsitsi ña.

²² Tan tsa yahā quiví cuhva catyí ley Nyoo tsa tyaa ra Moisés tsa cuenda tsa nduvaha ña nuu Nyoo tsa cacu sehe ña; tacan tan cuahán ñi tsihin ra lee nda ñuu Jerusalén, tyin tyaa cuenda ñi tsi ra ndaha Nyoo. ²³ Tacan ñi javahā ñi tyin catyí ley Nyoo tyin: “Tandihí sehe nuu ñi tsa cuví rayii, cua tyaa cuenda ñi tsi ra ndaha Jutu yo Nyoo”, catyí ley ican. ²⁴ Tan tsahan ñi tsijamañi ñi uvi taahan quití, tyin tacan catyí maa ley Jutu yo Nyoo, nu catyí tsi tyehen: “Cuhva ndo uvi taahan curuu a uvi taahan paloma”, catyí ley can.

²⁵ Tan quiví can iyó iin ra ñuu Jerusalén nañi ra Simeón. Iin ra cuiti xaan cuví ra, tan jacahnú ra tsi Nyoo. Ndatú ra nda cacu ra cua jacacu tsi ra tsihin tandihí ca nyiví ñuu Israel ican. Tan nyaá Tatyí li Nyoo tsihin ra Simeón. ²⁶ Tan jacotó Tatyí li tsi ra tyin ña cúu naha ra tsa ndi cumañi ca nyehe ra tsi ra Cristo, ra cua jaquitsi Jutu yo Nyoo. ²⁷ Tan Tatyí li jacuhun ra tsi ra Simeón can nda vehe ñuhu. Tan juvin ñi cuhva can tsaā jutu ra tan sihi ra Jesús tsihin maa ra nu cuví vehe ñuhu cahnu can, tyin javaha ñi cuhva catyí maa ley. ²⁸ Tan cuhva tsa tsaā ñi nu nyaá ra Simeón tan quihin ra Simeón tsi ra Jesús. Tan tyihí jucun ndaha ra tsi ra. Tacan tan quitsahā jacahnú ra tsi Nyoo, tan catyí ra:

²⁹ —Jutu Mañi yu, vityin tsa cundaā cuhva tsa catyí maa un tsihin yu, tsa cuví yu musu un, cuví jaña ndaha un tsi yu vityin, tan na cúu yu tsihin tsa vaha.

³⁰ Tyin tsa nyehe tsihin nuu yu tsi ra cua jacacu tsi ndi.

³¹ Tsa iyó ra ihya ityi nuu tandihí nyívi.

³² Tan cua cuví ra ñuhu tsa cua jandunditsin añima nyívi tsa ñavin nyívi Israel cuví.

Tan cahnu ca cua jaha ra tsi nyívi Israel, tsa cuví ndi nyívi cuenda maa un —catyí ra Simeón.

³³ Tan ra José tsihin sihi ra Jesús, iyo xaan cuñí ñi tsa tsiñí ñi tsa cahan ra Simeón tsa cuenda lee ican.

³⁴ Tacan tan tsicán tahvi ra Simeón tsa cuenda ñi. Tan catyí ra tsihin ña María sihi ra Jesús:

—Nyehé tsi lee ihya. Cuaha xaan nyívi Israel ñuu Nyoo cua tsinu iñi tsi ra quívi coto ñi tuhun ra, tan cua cacu ñi. Maa tyin cuaha ñi ña cua tsinu iñi ñi tsi ra. Nyoo tsaha ra tsi ra tan cuví ra tumaa seña tsa cuenda yo. ³⁵ Tacan tan coto tandihí yo náa tsicá iñi nyívi tun tsinú iñi ñi o ña tsinú iñi ñi tsi ra. Maa tyin tsa cuenda yoohe, María, tsehe cuví tumaa iin mityi xaan tsa cua yaha añima un —catyí ra Simeón tsihin ña.

³⁶ Tan ican, tsitsi vehe ñuhu cahnu can, nyíi tucu iin ñaha tsa cuví ndusu yuhu Nyoo. Nañí ña Ana, tan sehe ra Fanuel, iin ra cuví tata ra Aser, cuví tsi ña. Tan tsa tsahnu xaan ña. Tan nda luhlu ña tan tindahá ña, maa tyin utsa cuiya ñi tsicoo ña tsihin yi ña tan tsihi ra. ³⁷ Tan vityin tsa cumi xico cumi cuiya ña. Tan ña quitá maa ña tsitsi vehe ñuhu cahnu can, tyin nduvi tan ñiñu jacahnú ña tsi Nyoo, tan tsicán tahvi ña tan iyó nyitya ña. ³⁸ Tan juvin ñi tsa ndi nyíi ca ra José tan ña María tsihin lee ican, tan tsaa ña Ana nu yucú ñi. Tan quitsaha nacuhvá ña tyahvi nyoo tsi Nyoo. Tan cahan ña tuhun ra Jesús tsihin tandihí nyívi tsa yucú ican, nyívi tsa ndatú tsa cacu ñuu Jerusalén.

Nu cuanuhu ñi nda ñuu Nazaret

³⁹ Tacan tan tsa yaha tsa javaha ñi tandihí maa tsa taahán tsi javaha ñi cuhva catyí ley Jutu yo Nyoo, tan cuanuhu ñi nda ñuu Nazaret tsa canyí Galilea nu cuví ñuu maa ñi. ⁴⁰ Tan ra luhlu Jesús vatsí cuahnu ca ra. Tan cua ndunyee ca ra, tan tsihin tsa tsiñi tuñi tsi maa ra. Tan Nyoo nasocó xaan ra tsi ra.

Nu cahān ra luhlu Jesús tsihin ra maestro cuenda ley vehe ñuhu naha ra

⁴¹ Ra José tsihin sihi ra Jesús tuhvá ñi tsicá vico pascua nda ñuu Jerusalén ndihí ñi cuiya. ⁴² Tan tsa quita tsa utsi uvi cuiya ra Jesús, tan tsahan tandihí ñi nda ñuu Jerusalén, cuhva tuhun tsa iyó maa ñi. ⁴³ Tan quivi ndihí vico, tan vatsí nuhu ñi, maa tyin ra luhlu Jesús ndoo ra ñuu Jerusalén can. Tan ña jaha jutu ra tan sihi ra cuenda. ⁴⁴ Tsicá iñi maa ñi tyin vatsí maa ra tyañu tandihí nyivi ican. Tan ndihí iin quivi tsicá ityi ñi. Tacan tan quitsaha nanducú ñi tsi ra tyañu nyivi nacotó tsi ñi. ⁴⁵ Maa tyin ña nañihí ñi tsi ra. Tacan tan cuahán ñi nda ñuu Jerusalén inga tsaha cuananducú ñi tsi ra.

⁴⁶ Tan tsa yaha uñi quivi tan nañihí ñi tsi ra tsitsi vehe ñuhu cahnu ican. Nyaá ra tyañu ra cuví maestro cuenda ley vehe ñuhu naha ra. Tyaá soho ra tuhun caahán ra naha. Tan tsicá tuhun ra tsi ra naha. ⁴⁷ Tan tandihí nyivi tsiñi tsa caahán ra, iyo xaan cuñi ñi tsihin tsa tsiñi tuñi tsa iyó tsi ra, tan tsihin tsa nacatyí tuhun ra. ⁴⁸ Cuhva tsa nyehe jutu ra tan sihi ra tsi ra, iyo xaan cuñi ñi, tan sihi ra catyí ña tsihin ra:

—Sehe luhlu yu. ¿Nacuvi tyin javahā un tyehen? Jutu un tan yuhu tuñú xaan cuñí ndi tan nanducú xaan ndi tsi un —catyí ña.

⁴⁹ Tacan tan catyí ra Jesús:

—¿Nacuenda nanducú ndo tsi yu? ¿A ña tsitó ndo tyin ñiñi ca cuñí tsi nyehé yu tyiñu Jutu yu? —catyí ra.

⁵⁰ Maa tyin ña cutuñi iñi ñi tsa caahán ra tsihin ñi.

⁵¹ Tacan tan cuanuhu ra tsihin ñi nda ñuu Nazaret. Tan vaha javahā ra tyin tyaá yahvi ra tsi ñi. Tan sihi ra naquihin vaha ña tandihi tuhun ihya tsitsi añima ña. ⁵² Tan ra Jesús cua cuahnu ca ra tan tsaá ca tsa tsiñi tuñi jiñi ra. Tan sii xaan cuñí Nyoo tsihin ra, tacan tucu nyivi, sii xaan cuñí ñi tsihin ra.

3

Nu cahan ra Juan, ra jacoondutya tsi nyivi, tuhun Nyoo nuu tsiqui

(Mt. 3.1-12; Mr. 1.1-8; Jn. 1.19-28)

¹ Tsa quitā tsahun cuiya tsa cuví ra Tiberio rey cahnu, tan ra Poncio Pilato ndacá ñaha Judea. Tan ra Herodes ndacá ñaha ra Galilea. Tan yañi ra, ra Felipe ndacá ñaha ra Iturea tsihin Traconite. Tan ra Lisantias ndacá ñaha ra Abilinia quivi can. ² Tan ra Anás tsihin ra Caifás cuví ra naha jutu tsaahnu tsa cuví ityi nuu. Quivi can cahan Nyoo tsihin ra Juan sehe ra Zacarías iin nu tsiqui. ³ Tan ra Juan tsicá nuu ra tandihi ñuu tsa cayucú yatyin ñi yutya cahnu Jordán, caahán ra tuhun Nyoo tsihin nyivi. Tan catyí ra tsihin ñi tyin na ndu uvi iñi ñi cuatyí ñi tan coondutya ñi. Tacan tan Nyoo cua jaha ra tucahnu iñi cuatyí ñi, catyí ra. ⁴ Tumaa caahán

tuhun tsa nyaá nu libru tsa tyaa ra Isaías, ra cuví ndusu yuhu Nyoo taħan tsanaha. Tan catyí ra:

Cua tyaa soho yo ndusu ra nu caná tsaa ra nu tsiqui tan catyí ra:

“Nuña ndo iin ityi cuiti tan natyiso vaha ndo tsi ndo tyin tsa vatsi Jutu Mañi yo.

⁵Tumaa tsa tahví ndo yucu tan jandutú ndo xahva cunu, jandoó ndo ityi yacua, tan janduvahá ndo nu quiñi.

⁶Tacan tan tandihí nyívi cua nyehe ñi tsi ra tsa cua jaquitsi Nyoo tyin jacacu ra tsi yo.”

Tacan tan caħan ra Juan tsihin nyívi.

⁷Tan tsa cuahán nyívi tsa cuñi ñi jacoondutya ra tsi ñi, tan catyí ra tsihin ñi:

—¡Nyooho cuví ndo tumaa tata coo! ¿A cuñi ndo tyin tsihin tsa coondutya ñi ndo tan ña cua tatsi tuñi ca Nyoo tsi ndo? Ña cuví. ⁸Yacan nasama ndo cuhva iyó ndo, na nyehe yo tyin tsa ndu uvi iñi ndo cuatyí ndo nuu Nyoo. Tan ña nduyaa ndo caħan ndo tyin nyívi tata ra Abraham cuví ndo. Tyin cuanda tsihin yuu ihya, Nyoo cuví jananduvi ra iin nyívi ra Abraham. ⁹Tsa ndatú yatsa Nyoo tsi tandihí ndo tyin cuví ndo tumaa yutun tsa ña tsahá tsiti vaha, cua tyahnya tun tan cua cayu tun, tacan cua javaha Nyoo tsihin ndo —catyí ra Juan.

¹⁰Tacan tan nducu tuhun ñi tsi ra tan catyí ñi:

—¿Tan nácaa javaha ndi? —catyí ñi.

¹¹Tacan tan nacahan ra Juan:

—Ra tsa iyó uvi taahan jahma, taahán tsi cuhva ra intuhun tsi tsi ra tsa nduve jahma. Tan ra tsa iyó tsa catsi, taahán tsi cuhva ra luxu catsi ra tsa nduve tsa catsi —catyí ra.

¹² Tan tsaá tucu ra tsa tavá xuhun cuenda ra ndacá ñaha nda ñuu Roma, tsa cuñí ra naha coondutya ra naha. Tan nducú tuhun ra naha tsi ra Juan:

—Maestro, ¿nácaa javaha tucu nyuhu? —catyí ra naha.

¹³ Tan catyí ra Juan tsihin ra naha:

—Cuhva catyí ley ñi tava ndo xuhun. Tan ña jandaa ca ndo yahvi.

¹⁴ Tacan tan tsicá tuhun tucu andaru naha ra tsi ra:

—Tan nyuhu tucu, ¿nácaa javaha ndi? —catyí ra naha.

Tan nacahan ra Juan tan catyí ra:

—Ña quinyaa ca ndo tsa tsii nyívi. Tan ña jayuhvi ca ndo tsi ñi. Ña tyaa ndo cuatyí tsi ñi tatun nduve cuatyí ñi. Tan ndoo ndo vaha tsihin yahvi ndo —catyí ra Juan.

¹⁵ Tan quívi can tandihí nyívi ndatú ñi tsi ra Cristo. Tan tsicá iñi ñi tun juvin ra Juan cuví Cristo.

¹⁶ Maa tyin ra Juan catyí ra tsihin tandihí ñi:

—Tsa nditsa tyin jacoondutyá yu tsi ndo tsihin ndutya. Maa tyin vatsí inga ra tsa cahnu ca cuví, tan iyó ca tunyee iñi Nyoo tsi ra tan ñavin ca yuhu. Yacan cuenda ña taahán tsi tsi yu ndi tsa cuvi yu musu ra tan ndatsi yu ñi nditsan ra. Tan ra ican cua jacoondutya ra tsi ndo tsihin Tatyí li Nyoo, tan tsihin ñuhu ihñi. ¹⁷ Tan ra ican ndahá ra pala tyin cua jandava ra trigu. Cua natava sñn ra trigu vaha tan cua naquihvi vaha tsi jaha ra. Tan cua cahmi ra tsahan tsa quita tsihin trigu can tsihin ñuhu tsa ña cua ndahva maa —catyí ra Juan tsihin ñi.

¹⁸ Tan tacan caḥan ra Juan tsihin nyivi can. Tan náa ndihi ca maa cuhva caḥan ra tan jacoto ra tsi ñi nácaa tsa cua quitsi Sehe Nyoo. ¹⁹ Tacan tucu ñi nduxaan ra Juan tsi ra Herodes, ra ndacá ñaha Galilea, tsa cuenda tsa naquihin ra tsi ña Herodías, ñasihí ra Felipe, yañi ra, tsihin tsa cuenda náa ndihi tsa ña vaha javahá ra. ²⁰ Maa tyin ña tyaa yahvi maa ra Herodes tuhun caḥan ra Juan. Nu ndihi tuhun tinyi ra tsi ra Juan tsitsi vehe caa.

Nu jacoondutyā ra Juan tsi ra Jesucristo
(Mt. 3.13-17; Mr. 1.9-11)

²¹ Tsa ndi cumañi ca cuhun ra Juan vehe caa tan jacoondutyā ra tsi tandihi nyivi. Tan jacoondutyā ndihi ra tsi ra Jesús. Tsa yaha tsicoondutyā ra, tsican tahvi ra tsi Nyoo, tacan tan nuña andivi. ²² Tan nuu Tatyí li Nyoo siqui ra tumaa iin paloma. Tan caḥan iin ndusu ityi siqui andivi, tan catyí tsi tyehen:

—Yooḥo cuví Sehe yu, tan cuñí xaan yu tsi un. Tan si xaan cuñí yu nyehé yu tsi un —catyí ndusu ican tsihin ra.

Cuhva quitsi tata ra Jesucristo
(Mt. 1.1-17)

²³ Tan tsa iyó maa tan oco utsi cuiya ra Jesús tan quitsaha jahá tyiñu ra tyiñu Nyoo. Tan tandihi nyivi cuñí maa ñi tyin sehe ra José cuví tsi ra. Tan ra José, sehe ra Elí cuví tsi ra. ²⁴ Tan ra Elí, sehe ra Matat cuví tsi ra. Tan ra Matat, sehe ra Leví cuví tsi ra. Tan ra Leví, sehe ra Melqui cuví tsi ra. Tan ra Melqui, sehe ra Jana cuví tsi ra. Tan ra Jana, sehe ra José cuví tsi ra. ²⁵ Tan ra José, sehe ra Matatías cuví tsi ra. Tan ra Matatías, sehe ra Amós cuví tsi

ra. Tan ra Amós, sehe ra Nahum cuv̄i tsi ra. Tan ra Nahum, sehe ra Esli cuv̄i tsi ra. Tan ra Esli, sehe ra Nagai cuv̄i tsi ra. ²⁶ Tan ra Nagai, sehe ra Maat cuv̄i tsi ra. Tan ra Maat, sehe ra Matatías cuv̄i tsi ra. Tan ra Matatías, sehe ra Semei cuv̄i tsi ra. Tan ra Semei, sehe ra José cuv̄i tsi ra. Tan ra José, sehe ra Judá cuv̄i tsi ra. ²⁷ Tan ra Judá, sehe ra Joana cuv̄i tsi ra. Tan ra Joana, sehe ra Resa cuv̄i tsi ra. Tan ra Resa, sehe ra Zorobabel cuv̄i tsi ra. Tan ra Zorobabel, sehe ra Salatiel cuv̄i tsi ra. Tan ra Salatiel, sehe ra Neri cuv̄i tsi ra. ²⁸ Tan ra Neri, sehe ra Melqui cuv̄i tsi ra. Tan ra Melqui, sehe ra Adi cuv̄i tsi ra. Tan ra Adi, sehe ra Cosam cuv̄i tsi ra. Tan ra Cosam, sehe ra Elmodam cuv̄i tsi ra. Tan ra Elmodam, sehe ra Er cuv̄i tsi ra. ²⁹ Tan ra Er, sehe ra Josué cuv̄i tsi ra. Tan ra Josué, sehe ra Eliezer cuv̄i tsi ra. Tan ra Eliezer, sehe ra Jorim cuv̄i tsi ra. Tan ra Jorim, sehe ra Matat cuv̄i tsi ra. ³⁰ Tan ra Matat, sehe ra Leví cuv̄i tsi ra. Tan ra Leví, sehe ra Simeón cuv̄i tsi ra. Tan ra Simeón, sehe ra Judá cuv̄i tsi ra. Tan ra Judá, sehe ra José cuv̄i tsi ra. Tan ra José, sehe ra Jonán cuv̄i tsi ra. Tan ra Jonán, sehe ra Eliaquim cuv̄i tsi ra. ³¹ Tan ra Eliaquim, sehe ra Melea cuv̄i tsi ra. Tan ra Melea, sehe ra Mainán cuv̄i tsi ra. Tan ra Mainán, sehe ra Matata cuv̄i tsi ra. Tan ra Matata, sehe ra Natán cuv̄i tsi ra. ³² Tan ra Natán, sehe ra David cuv̄i tsi ra. Tan ra David, sehe ra Isaí cuv̄i tsi ra. Tan ra Isaí, sehe ra Obed cuv̄i tsi ra. Tan ra Obed, sehe ra Booz cuv̄i tsi ra. Tan ra Booz, sehe ra Salmón cuv̄i tsi ra. Tan ra Salmón, sehe ra Naasón cuv̄i tsi ra. ³³ Tan ra Naasón, sehe ra Aminadab cuv̄i tsi ra. Tan ra Aminadab, sehe ra Aram cuv̄i tsi ra. Tan ra Aram, sehe ra Esrom cuv̄i tsi ra. Tan ra Esrom, sehe ra Fares cuv̄i tsi ra. Tan ra

Fares, sehe ra Judá cuṽi tsi ra. ³⁴ Tan ra Judá, sehe ra Jacob cuṽi tsi ra. Tan ra Jacob, sehe ra Isaac cuṽi tsi ra. Tan ra Isaac, sehe ra Abraham cuṽi tsi ra. Tan ra Abraham, sehe ra Taré cuṽi tsi ra. Tan ra Taré, sehe ra Nacor cuṽi tsi ra. ³⁵ Tan ra Nacor, sehe ra Serug cuṽi tsi ra. Tan ra Serug, sehe ra Ragau cuṽi tsi ra. Tan ra Ragau, sehe ra Peleg cuṽi tsi ra. Tan ra Peleg, sehe ra Heber cuṽi tsi ra. Tan ra Heber, sehe ra Sala cuṽi tsi ra. ³⁶ Tan ra Sala, sehe ra Cainán cuṽi tsi ra. Tan ra Cainán, sehe ra Arfaxad cuṽi tsi ra. Tan ra Arfaxad, sehe ra Sem cuṽi tsi ra. Tan ra Sem, sehe ra Noé cuṽi tsi ra. Tan ra Noé, sehe ra Lamec cuṽi tsi ra. ³⁷ Tan ra Lamec, sehe ra Matusalén cuṽi tsi ra. Tan ra Matusalén, sehe ra Enoc cuṽi tsi ra. Tan ra Enoc, sehe ra Jared cuṽi tsi ra. Tan ra Jared, sehe ra Mahalaleel cuṽi tsi ra. Tan ra Mahalaleel, sehe ra Cainán cuṽi tsi ra. ³⁸ Tan ra Cainán, sehe ra Enós cuṽi tsi ra. Tan ra Enós, sehe ra Set cuṽi tsi ra. Tan ra Set, sehe ra Adán cuṽi tsi ra. Tan ra Adán, sehe Nyoo cuṽi tsi ra.

4

*Nu nduc̃u cuhva nu ña vaha tsi ra Jesús
(Mt. 4.1-11; Mr. 1.12-13)*

¹ Tan ñihi nyaá Tatyí Ii Nyoo tsihin ra Jesús tsa yahā tsicoondutyā ra, quitā ra yutya Jordán tan cuanuh̃u ra. Tan quih̃in Tatyí Ii Nyoo tsi ra, tan tsah̃an ra iin nu cuṽí nu tsiqũi ² nu tsinyĩi ra uvi xico nduvi. Tan ña tsatsĩ maa ra tandĩhi quivĩ ican. Yahā can tan quitsĩ tsa tsisocó ra. Tan nduc̃u cuhva nu ña vaha tsi ra. ³ Tan catyí nu tsihin ra:

—Tatun juvin Sehe Nyoo cuṽí tsi un, cahan tsihin yuu ihyā, na nanduvi tsi paan catsi un.

⁴ Tan ra Jesús nacahan ra tan catyí ra:

—Tuhun Nyoo tsa nyaá nu tutu, catyí tsi tyin ña maa ñi tsihin tsa catsi nyivi coonyito ñi, tyin coonyito ñi tsihin tandihi tuhun caahán Nyoo —catyí ra Jesús tsihin nu ña vaha.

⁵ Tacan tan quihin nu ña vaha tsi ra Jesús, cuahán ra iin jiñi yucu sucun. Tan iin yaha ñi janahá nu tandihi tsa cuca nu ndacá ñaha nu ñuu ñayivi ihya tsi ra Jesús. ⁶ Tan catyí nu tsihin ra:

—Cuhva yu tandihi tsa nyehé un tun cuñí un tyin maa Nyoo tsahá tsa cundaca ñaha yu tandihi can, tan ndáa ra cuñí yu cuhva yu can, cuvi tsii ra. ⁷ Tatun yoocho tan cuiñi tsiti un nuu yu ihya tan jacahnu un tsi yu, tandihi can cua cuhva yu tsi un —catyí nu ña vaha tsihin ra.

⁸ Tan nacahan ra Jesús, tan catyí ra:

—Jatsiyo nyaha tsi un nuu yu, cuihna. Tyin nu tutu Nyoo catyí: “Jacahnu tsi intuhun ñi maa Jutu Nyoo. Tan tyiñu intuhun ñi maa ra taahán tsi javaha un.”

⁹ Tacan tan quihin nu ña vaha tsi ra Jesús inga tsaha. Tan cuahán nu tsihin ra nda ñuu Jerusalén. Tan jandaá nu tsi ra iin nu sucun xaan nda jiñi vehe ñuhu cahnu. Tan catyí nu tsihin ra:

—Tatun Sehe Nyoo cuví tsi un, ndava nu nyaá un ihya nda cuanda nu ñuhu. ¹⁰ Tyin catyí tsi nu tutu Nyoo tyin:

Nyoo cua tava tyiñu ra tsi ángel ra tan jaha cuenda ra naha tsi un.

¹¹ Cua janahndi ra naha tsi un. Tan ña cua nañi tsaha un nu yuu.

¹² Tacan tan nacahan ra Jesús tan catyí ra:

—Tan juvin ñi catyí tuhun Nyoo: “Ña nducu cuhva xaan un tsi Nyoo un” —catyí ra Jesús.

¹³ Tan tsa ndihí nducu cuhva nu ña vaha tsi ra Jesús, tacan tan nacoq nuu nu tsi ra.

Nu quitsahā caahán ra Jesús tuhun Nyoo tsihin nyiví

(Mt. 4.12-17; Mr. 1.14-15)

¹⁴ Tan tsa yahā tsa nducu cuhva nu ña vaha tsi ra Jesús tan cuanuhū ra nda Galilea tsihin tsa tsitú tunyee iñi Tatyí Ii Nyoo tsi ra. Tan tsitó nyiví tuhun ra ñi cahnu Galilea can. ¹⁵ Tan jacuahā ra tsi nyiví nu cuví vehe ñuhu tandihí ñi ñuu. Tan tandihí ñi jacahnū ñi tsi ra.

Tsa tsaq nyico ra Jesús ñuu Nazaret nu tsahnū ra
(Mt. 13.53-58; Mr. 6.1-6)

¹⁶ Tacan tan tsaq nyico ra Jesús ñuu Nazaret nu tsahnū ra. Tan iin quiví quitatú nyiví, quihví ra tsitsi vehe ñuhu, tumaa tsa tuhvá maa ra tsicá. Tan nduvitā ra cua cahvi ra tuhun Nyoo. ¹⁷ Tan tsahā ra naha iin libru tsa tyaa ra Isaías ra cuví ndusu yuhu Nyoo. Tan cuhva tsa nuñā ra, nañihí ra iin nu catyí tsi:

¹⁸ Iyó Tatyí Ii Nyoo tsihin yu, tyin maa Nyoo tava tyiñu tsi yu

cahan yu tuhun ra tsihin nyiví ndaahvi.

Tan janduvaha yu tsi nyiví tsa uhvi aña.

Tan maa ra tava tyiñu tsi yu tyin jacoto yu tsi nyiví
yihí ndaha nu ña vaha, tyin tsa cua quita
nuña ñi tan maa ra cua jacacu tsi ñi.

Tan cua jananyehe yu tsi nyiví cuaa.

Tan cua nacoq nuña yu tsi nyiví tsa iyó tundoho.

19 Tan jacoto yu tsi nyivi tyin tsa quita quivi tsa nyaá Nyoo tumañi iñi tsihin ñi.

20 Tacan tan ndihi cahvi ra tan nacasi ra nuu libru can. Tan nacuhva ra tsi iin ra tsa jatinyeé tsihin tyiñu vehe ñuhu can. Tan tsinyaá ra Jesús. Tacan tan tandihi nyivi tsa nyecú ican, ndoo ñi tsa nyehé ñi tsi ra. 21 Tacan tan catyí ra tsihin ñi:

—Vityin quivi ihya tsa cundaa cuhva catyí tuhun Nyoo tsa cahvi yu tsiñi ndo —catyí ra Jesús tsihin ñi.

22 Tan tandihi nyivi tsa nyecú can, vaha xaan cahan ñi tuhun ra. Tan iyo xaan cuñi ñi tsihin tandihi tsa vaha tsa cahan ra. Tacan tan quitsaha tsicá tuhun tahan ñi:

—¿A ñavin ra ihya cuví sehe ra José?

23 Tan nacaahan ra Jesús:

—Tsa nditsa tyin tyehen tsicá iñi ndo nyehé ndo tsi yu: “Yooho ra janduvahá tsi nyivi, janduvaha jihna tsi maa un.” Tan cuñi tucu ndo catyí ndo: “Tandihi tsa javaha un ñuu Capernaum tsitó ndi, javaha ndihi tucu can ñuu maa un ihya.”

24 Tan cahan ra Jesús inga tsaha, tan catyí ra:

—Tsa nditsa tyin ndi intuhun ra cuví ndusu yuhu Nyoo, tan ña tsinú iñi nyivi ñuu ra naha tsi ra naha. 25 Tan tsa nditsa tyin cuaha xaan ñi ndaahvi tsa tsihi yi tsicoo Israel ihya quivi tsa tava Nyoo tyiñu tsi ra Elías, ra cuví ndusu yuhu ra, tan ra ican cuví iin ra Israel ihya tsica ra cahan ra tuhun Nyoo. Tan quivi can ña cuun maa savi uñi cuiya sasava. Tan tsicoo tama cahnu xaan. 26 Tan ñavin tsa cuenda ndi intuhun maa ñi Israel ihya tava Nyoo tyiñu tsi ra Elías cuahán ra. Maa tyin tsahan

ra jatyinyee ra tsi iin ñaha ndaahvi tsihi yï tsa tsicoo ñuu Sarepta tsa canyií Sidón.

²⁷ Tacan tucu quivi tsica inga ra cuvi ndusu yuhu Nyoo cuenda nyivi Israel, ra Eliseo. Cuaha xaan ra cuuhvi tsihin cuehe tyaahyú tsicoo Israel ihya, tan ndi intuhun ra naha tan ña nduvaha ra naha. Nduvaha intuhun ñi ra Naamán ra quee ñuu Siria —catyí ra Jesús.

²⁸ Tsa yaha tsiñi ñi tandihi tuhun can, tandihi nyivi tsa yucú tsitsi vehe ñuhu can xaan xaan cuñi ñi cuvi. ²⁹ Tan nduvita ñi. Tan tava ñi tsi ra Jesús nda jiñi yucu sucun nda yuhu ñuu, tsa cuñi ñi janacava ñi tsi ra ican. ³⁰ Maa tyin ra Jesús yaha ra tyañu ñi tan cuahán ra.

Nu quita tatyí ña vaha tsa yihí tsi iin rayi
(Mr. 1.21-28)

³¹ Tan cuahán ra Jesús ñuu Capernaum tsa canyií Galilea. Tan jacuahá ra tsi nyivi tsitsi vehe ñuhu tandihi sauru, quivi tuhvá nyivi quitatú. ³² Tan iyo xaan cuñi ñi tsihin tsa cahan ra. Tyin ñihi xaan cahan ra tumaa tuhvá ra cumi tyiñu caahán. ³³ Tan iin quivi nyii ra Jesús vehe ñuhu tan iin ra yihí tatyí ña vaha catyí ra caná tsaa ra jahá tatyí ña vaha can:

³⁴ —Yoohe Jesús, ra ñuu Nazaret, jaña tsi ndi. ¿Náa nducú un tyihí un tsi un tsihin ndi? ¿A vatsí un vatsí janaa un tsi ndi? Yuhu nacotó vaha yu tsi un. Yoohe cuví Sehe Ii Nyoo.

³⁵ Tacan tan nduxaan ra Jesús tsi tatyí ña vaha tsa yihí tsi ra can tan catyí ra:

—Taxin ñi coo yoohe. Quita tsi ra ihya —catyí ra Jesús tsihin nu.

Tacan tan nyehé ñi nyivi nduva ra can nu ñuhu jahā tatyí ña vaha can, tan nduve ca náa javahā nu tsi ra can. Tan quitā nu cuahán nu. ³⁶ Tandihí nyivi tsa nyehé can, iyo xaan cuñí ñi tan yuuhví ñi cuví. Tan quitsahā tsicá tuhun tahan ñi:

—¿Náa tuhun cuví tsa caahán ra ihya? Tyin nda cuanda tsihin tatyí ña vaha tan ñihi caahán ra, tan quitá tatyí ña vaha ican —catyí ñi.

³⁷ Tacan tan tandihí ñi ityi quitā natuhun nyivi tuhun ra Jesús.

Nu janduvahā ra Jesús tsi ña tyiso ra Simón Pedro

(Mt. 8.14-15; Mr. 1.29-31)

³⁸ Tacan tan quitā ra Jesús tsitsi vehe ñuhu can. Tan cuahán ra vehe ra Simón. Tan nu tsaa ra can, canyií ña tyiso ra Simón cuuhví ña tan ñihi xaan yihí cahñi tsi ña. Tacan tan caahán ndaahvi ñi tsihin ra na janduvaha ra tsi ña. ³⁹ Tacan tan natuhvā ra nu canyií ña tan nacañi nuu ra jiñi ra tan cahān ra tsihin cahñi can na quita tsi. Tacan tan quitā cahñi can iin yaha ñi, tan nduvitā ña can, quitsahā nanducú ña tsa catsi ra Jesús.

Nu cuaha xaan nyivi cuuhví janduvahā ra Jesús
(Mt. 8.16-17; Mr. 1.32-34)

⁴⁰ Tan tsa tyiso ñicanyii, tandihí nyivi tsa iyó ñi cuuhví vehe ñi tsihin siin siin nuu cuehe, quitsi ndaca ñi tsi ñi can tsi ra Jesús. Tan tyiso ndaha ra jiñi intuhun intuhun ñi cuuhví can tan janduvahā ra tsi ñi. ⁴¹ Tan cuaha xaan nyivi quitā tatyí ña vaha tan canā tsaa nahnu, tan catyí nahnu:

—Yoocho cuví Sehe Nyoo.

Maa tyin ra Jesús nduxaan ra tsi nahnu tan ña tsaha ra tsa cahan nahnu, tyin tsitó nahnu tyin juvin ra cuví Cristo.

Nu tsicā ra Jesús cahan ra tuhun Nyoo tandihi ñuu cayucú Galilea

(Mr. 1.35-39)

⁴² Tsa tuvi inga quivi, tan quee ra Jesús ñuu can. Tan cuahán ra iin nu taxin caá. Tan nyivi nanducú ñi tsi ra. Tan tsaā ñi nda nu nyii ra ican. Tan cuñi ñi tsa ña cahun ca ra. ⁴³ Tacan tan catyí ra Jesús tsihin ñi:

—Ndi cuñi ca tsi jacoto yu tsi nyivi tandihi ca ñuu nácaa tan quihvi Nyoo aña ñi tan cundaca ñaha ra tsi ñi. Tyin yacan cuenda vatsí yu nu ñuhu ñayivi ihya.

⁴⁴ Tan tacan ñi tsicá ra Jesús caahán ra tuhun Nyoo vehe ñuhu tandihi ñi ñuu tsa cayucú Galilea.

5

Nu tsaha ra Jesús ndatu tsa cuaha xaan tyaca ñihí ra naha

(Mt 4.18-22; Mr. 1.16-20)

¹ Iin quivi nyaá ra Jesús yuhu miñi nu cuví Genesaret. Tan tsaā cuaha xaan nyivi, tyin cuñi ñi tyaa soho ñi tuhun Nyoo. Tan tihin xaan nyii ra Jesús tyañu ñi. ² Tan nyehe ra uvi taahan yutun ndoo yatyin ñi yuhu miñi ican. Yoñi yucú tsitsi yutun ndoo can tyin tsa quitā ra tiin tyaca. Tan nacatyá ra naha traya. ³ Tacan tan quihvi ra Jesús tsitsi iin yutun ndoo tsa cuví tsii ra Simón. Tan catyí ra Jesús tsihin ra Simón tyin na jacuhun ra can nda mahñu miñi. Tacan tan tsinyaa ra Jesús

tsitsi yutun ndoo can. Tan quitsahā caahán ra tsihin nyívi. ⁴ Cuhva tsa ndihí cahān ra tsihin ñi, tan catyí ra tsihin ra Simón:

—Jacuhun yutun ndoo nda nu cunu ca. Tan jacuhun traya tyin tacan tan tñn ndo tyaca.

⁵ Tan nacahan ra Simón tan catyí ra:

—Maestro, tsa jahā tyiñu xaan ndi ñiñu maa tan ndi intuhun maa tyaca ña ñihí ndi. Maa tyin tatun maa un catyí, cua jacuhun nyico ndi traya.

⁶ Cuhva tsa jacuhun nyico ra naha traya ra, tan cuaha xaan tyaca ñihí ra naha. Ndihi maa traya can quitsahā tyaahnyá tsihin tsa vee tyaca can.

⁷ Tacan tan jandahā ra naha tsi ra tsa yucú inga yutun ndoo tyin quitsi ra naha cutahan ra naha tsihin ra naha. Tacan tan tsaā ra can naha ra. Tan jacutu ra naha nduvi taahan yutun ndoo can tsihin tyaca. Tan cuñi nyee yutun ndoo ra naha tsihin tsa tsitú tyaca. ⁸ Tsa nyehe ra Simón Pedro tsa cuví tacan, tan tsicuiñi tsiti ra nuu ra Jesús, tan catyí ra tsihin ra:

—Jatsiyo tsi un nuu yu, Jutu Mañi yu, tyin yuhu ra iyó cuatyí cuví yu —catyí ra Simón.

⁹ Tyin ra Simón tsihin tandihí ra yucú tsihin ra, nayuhví xaan ra naha tsa cuenda tsa cuaha xaan tyaca ñihí ra naha. ¹⁰ Tacan tucu ra cutahán tsihin ra Simón: ra Jacobo tan ra Juan, sehe ra Zebedeo, nayuhví xaan ra naha. Tan ra Jesús catyí ra tsihin ra Simón:

—Ña nayuhvi un, tyin vityin tan nda nu cuahán ca tsi ityi nuu, tumaa tsa tñn ndo tyaca ihya, tacan cua ñihí un nyívi cua cuví nyívi Nyoo, tan cua tava un tsi ñi nu caquiñi, na quihví ñi cuenda Nyoo —catyí ra Jesús tsihin ra Simón.

¹¹ Tacan tan tava ra naha yutun ndoo can nda nu ñuhu ityi. Tan nacoq ra naha tandihí tsa iyó tsi ra naha. Tan cuahán ra naha tsihin ra Jesús.

Nu janduvaha ra Jesús tsi iin ra ndohó cuehe tyaahyú

(Mt 8.1-4; Mr. 1.40-45)

¹² Iin quívi nyíi ra Jesús iin ñuu nu iyó iin ra ndohó cuehe tyaahyú. Tan tsa nyehe ra tsi ra Jesús, tan tsicuiñi tsiti ra nuu ra. Tan nacañi nuu ra jiñi ra nda nu ñuhu. Tan caahán ndaahvi ra tsihin ra Jesús, tan catyí ra:

—Jutu Mañi yu, tun yoocho tan cuñi un, cuví janduvaha un tsi yu —catyí ra.

¹³ Tacan tan tyiso ndaha ra Jesús jiñi ra cuuhví can, tan catyí ra:

—Cuñi yu janduvaha yu tsi un. Cua nduvaha un vityin —catyí ra Jesús tsihin ra cuuhví can.

Tan iin yaha ñi nduvaha ra. ¹⁴ Tacan tan catyí ra Jesús tsihin ra:

—Coto catyi tuhun un tsihin nyívi. Intuhun ñi tsa cua cahan yu tsihin un, cuaahan nu nyaá ra cuví jutu. Tan janaha tsi un tsi ra. Tan cuhva tsa taahán tsi jamañi un tumaa tsa caahán ley tsa tyaa ra Moisés, tan cua cuví tsi iin tsandaa tsi ra jutu can tan tsi nyívi tyin tsa nduvaha un —catyí ra Jesús tsihin ra.

¹⁵ Vasu ndi maa tsa ña cuñi ra Jesús tsa coto nyívi, ñihi ca quitá tuhun ra. Tan cuaha xaan nyívi ndu iin tyin cuñi ñi tyaa soho ñi tsa caahán ra tan janduvaha ra tsi ñi. ¹⁶ Maa tyin ra Jesús, jatsiyó, jatsiyó ñi ra tsi ra nu iyó nyívi. Tan cuahán ra nu taxin caá, cua ndacan tahvi ra tsi Nyoo Jutu ra.

Nu janduvahā ra Jesús tsi iin ra xii

(Mt. 9.1-8; Mr. 2.1-12)

¹⁷ Iin quivi jacuahá ra Jesús tsi nyivi. Tan yucú juhva ra fariseo, ra tyaá yahvi xaan ley Nyoo tsa tyaá ra Moisés tsanaha. Tan yucú tucu juhva ra maestro cuenda ley vehe ñuhu ican. Quita ra naha ñuu Jerusalén, tan inga ñuu nyihi tani cahnú Galilea tan Judea. Tan iyó xaan tunyee iñi Nyoo tsi ra Jesús tsa janduvaha ra tsi nyivi cuuhví. ¹⁸ Tacan tan tsaá ra naha tan nyisó ra naha iin ra cuuhví tsihin cuehe xii nu tsito. Tan cuñi ra naha quihvi ra naha tsitsi vehe tan caquin ra naha tsi ra cuuhví can nu nyii ra Jesús. ¹⁹ Maa tyin ña ñihi ra naha nu quihvi ra naha tyin tuvi xaan nyivi. Tacan tan ndaá ra naha ityi jiñi vehe. Tan jatsiyó ra naha tyiyo. Tacan tan januu ra naha tsi ra cuuhví can nuu nyii ra Jesús tyañu nu tuvi nyivi can. ²⁰ Tan nyehe ra Jesús tyin tsinú xaan iñi ra naha tsi ra. Tan catyi ra tsihin ra cuuhví can:

—Tsa tsicoo tucahnu iñi tsi un, tsa cuenda cuatyí un —catyi ra Jesús tsihin ra can.

²¹ Tacan tan ra maestro cuenda ley vehe ñuhu tsihin ra cuví fariseo, quitsahā tsicá iñi ra naha: “¿Yóo ra cuví ra ihya? Tsicoo cuatyí ra nuu Nyoo tsa cuenda tsa caahán ra. Tyin catyi ra tyin tsa tsicoo tucahnu iñi tsi ra can, tan intuhun ñi maa Nyoo cuví jaha tucahnu iñi tsi yo”, cuñi ra naha tsicá iñi ra naha.

²² Maa tyin ra Jesús tsitó ra tsa tsicá iñi ra naha. Tan catyi ra tsihin ra naha:

—¿Nacuenda tsicá iñi ndo tacan? ²³ ¿Náa tsa yñi ca catyi yo? ¿A yñi catyi yo: “Cuatyi un tsa yahā ndatsi”, a yñi ca catyi yo tsihin iin nyivi xii:

“Nduvita tan caca un”? ²⁴ Maa tyin vityin cua janaha yu tsi ndo tyin yuhu Ray^h tsa quee nda gloria iyó ndatu tsi yu tsa jahá yu tucahnu ñni tsi ndo —catyí ra Jesús.

Tsa yahā cahan ra tacan, tan catyí ra tsihin ra cuuhví can:

—Nduvita. Naquihin tsito un tan cuanuhu yuvehe un.

²⁵ Tan nduvita ra can, tan naquihin ra tsito ra. Tan cuanuhu ra yuvehe ra, juvin ñi jacahnú ra tsi Nyoo. ²⁶ Tandihí nyívi iyo xaan cuñí ñi. Tan yuuhví xaan ñi. Tan jacahnú ñi tsi Nyoo, tan catyí ñi:

—Vityin nditsa nyehé yo tsa iyo xaan —catyí ñi.

Nu cana ra Jesús tsi ra Leví

(Mt. 9.9-13; Mr. 2.13-17)

²⁷ Yahā can tan quitā ra Jesús vehe can. Tan nanyehé ra tsi iin ra tsa tavá xuhun cuenda ra ndacá ñaha iyó nda ñuu Roma. Tan nañí ra Leví. Tan nyaá ra nu tyahví nyívi. Tan catyí ra Jesús tsihin ra:

—Cohon tsihin yu —catyí ra.

²⁸ Tacan tan nduvita ra Leví. Tan nacoq ra tandihí tsa iyó tsi ra. Tan cuahán ra tsihin ra Jesús.

²⁹ Tacan tan javahā ra Leví iin vico cahnu vehe ra cuenda ra Jesús. Tan cuaha xaan ra tavá xuhun cuenda ra ndacá ñaha nyecú ra naha nu mesa. Tan nyecú tucu inga nyívi. ³⁰ Tan ra fariseo naha ra tsihin ra cuví maestro cuenda ley vehe ñuhu naha ra, quitsahā caahán nyaa ra naha tsi ra tsicá tsihin ra Jesús:

—¿Nacuvi tsatsí ndo tan tsihí ndo tsihin ra tavá xuhun naha ra tan tsihin ra iyó cuatyi naha ra? —catyí ra naha.

³¹ Tan ra Jesús nacahan ra, tan catyí ra:

—Ña tsiñí ñuhu doctor tsi ra tsa vaha maa. Ra cuuhví, cuví ra tsiñí ñuhu doctor. ³² Yuhu ña vatsí yu jatyinyee yu tsi nyívi tsa tsicá ñi tyin vaha ñi, vatsí yu jatyinyee yu tsi nyívi tsitó tyin iyó cuatyí ñi, tan cuví nasama ñi cuhva iyó ñi —catyí ra Jesús tsihin ra naha.

Nu janahá ra Jesús tyin tatun tsa cuahán ra cua coo nyitya nyívi nyicún tsi ra
(Mt. 9.14-15; Mr. 2.18-20)

³³ Tacan tan tsicá tuhun ra naha tsi ra Jesús, tan catyí ra naha:

—Ra tsicá tsihin ra Juan tsicoó nyitya ra naha, tan ña tsatsí ra naha tan nanducú ra naha tsi Nyoo, tan tacan tucu ra cuví fariseo naha ra. Maa tyin ra tsicá tsihin yoohe, ndíhi quívi tsatsí ra naha tan tsihí ra naha. ¿Nacuví? —catyí ra naha.

³⁴ Tan nacahan ra Jesús, tan catyí ra:

—¿A cuví coonyitya nyívi yucú vico tindaha jaha ndo tatun nyíi ra tsa cua tindaha tsihin ñi? Ña cuví. [Tyin sií cuñí ñi, tan cuñí ñi catsi ñi.] ³⁵ Maa tyin cua quita quívi tsa cua jatsiyo ra tindaha ican tsi ra nu yucú ñi. Tacan tan cua coonyitya ñi.

Nu jacuahá ra Jesús tyin ña nacatsí tahan tuhun tsahnu tsa iyó nyívi tsihin tuhun tsaa tsa jacuahá ra
(Mt. 9.16-17; Mr. 2.21-22)

³⁶ Tacan tan cahan tucu ra Jesús iin cuhva tsihin nyívi, tan catyí ra:

—Yoñi tsaahnyá iin jahma tsaa, tan naquicú ñi tsihin jahma tuuhu. Tyin tatun javaha ñi tacan, nandiyi jahma tsaa can. Tan ña ndoo vaha tsi tsihin jahma tuuhu can.

³⁷ Tan tacan tucu, ña cuví tyihi nyívi vinu tsaa tsitsi ñi tsaahnu. Tyin cua tyahnya ñi can tsihin vinu tsaa can. Tan cua tiví vinu can tan tiví ndihí tucu ñi tsaahnu can. ³⁸ Yacan cuenda taahán tsi tyihi yo vinu tsaa tsitsi ñi tsaa. Tyin tacan tan nduvi taahan tsi tan cua jaha cuenda tahan tsi itsi. ³⁹ Tan yoñi tsihí vinu tsahnu, tan cuñí ñi coho ñi vinu tsaa. Tyin catyí ñi, vaha ca vinu tsahnu. [Vinu tsahnu can cuñí tsi catyí tyin cuví tsi cuhva iyó maa ñi.]

6

Nu tuhún ra tsicá tsihin ra Jesús yoco itya trigu quívi quitatú nyívi
(Mt. 12.1-8; Mr. 2.23-28)

¹ Iin quívi quitatú nyívi, yaha ra Jesús mahñu tsa tatsi nyívi. Tan ra tsicá tsihin ra tuhún ra naha yoco trigu. Tan jocoñ ra naha can tsihin ndaha ra naha. Tan tsatsi ra naha tsiti can. ² Tacan tan catyí ra fariseo naha ra tsihin ra naha:

—¿Nacuenda javahá ndo iin tyiñu tsa ña taahán tsi javaha yo quívi quitatú yo? ³ Tan nacahan ra Jesús, tan catyí ra:

—¿A ñaha ca cahvi ndo nu tsahá cuenda tsi tsa javaha ra David tan ra cutahán tsihin ra quívi tsa tsisoco ra naha? ⁴ Quihvi ra tsitsi vehe Nyoo. Tan quihin ra paan tsa tyiso nyívi nuu altar Nyoo. Tan tsatsi ra. Tan tsahá ndihí ra tsi ra tsa cutahán tsihin ra. Tan maa ñi maa ra cuví jutu naha ra taahán tsi catsi paan can —catyí ra Jesús.

⁵ Tacan tan catyí ra Jesús:

—Rayi tsa quee nda gloria iyó ndatu tsi ra tsa cahan ra tsihin intuhun intuhun ndo náa taahán tsi javaha ndo quiivi quitatú yo —catyí ra.

*Nu janduvaha ra Jesús tsi iin ra na ityi ndaha
(Mt. 12.9-14; Mr. 3.1-6)*

⁶ Inga quiivi quitatú nyivi quihvi ra Jesús tsitsi vehe ñuhu. Tan quitsaha jacuahá ra tsi nyivi. Tan nyehe ra tsi iin ra tsa na ityi ndaha cuaha. ⁷ Tan ra cuví maestro cuenda ley vehe ñuhu naha ra tsihin ra cuví fariseo naha ra, nducú cuhva ra naha tsi ra Jesús, tatun janduvaha ra tsi ra cuuhví ican quiivi quitatú nyivi, tyin tacan tan cuvi tyaa ra naha cuatyí tsi ra Jesús. ⁸ Maa tyin ra Jesús tsitó ra tsa tsicá iñi ra naha. Tan catyí ra tsihin ra na ityi ndaha can:

—Nduvita. Cunya nyityi mahñu ra naha ihya.

Tacan tan ra na ityi ndaha can nduvita ra. Tan tsinyaa nyityi ra mahñu ra naha. ⁹ Tacan tan catyí ra Jesús tsihin ra nyecú ican naha ra:

—Cua nducu tuhun yu iin cuhva tsi ndo. ¿Náa taahán tsi javaha yo quiivi quitatú yo? ¿A taahán tsi javaha yo tsa vaha, a tsa ña vaha? ¿A taahán tsi jacacu yo tsi nyivi, o cahñi ndihi yo tsi ñi?

¹⁰ Tacan tan ra Jesús nyehé ra intuhun intuhun ra naha. Yahá can tan catyí ra tsihin ra tsa na ityi ndaha can:

—Cañihi ndaha un.

Tacan tan ra na ityi ndaha ican cañihi ra ndaha ra. Tan nduvaha ndaha ra. ¹¹ Maa tyin ra yucú ican naha ra, cuxaan ra naha. Tan quitsaha tsicá tuhun tahan ra naha tsi ra naha:

—¿Nacaa javaha yo tan cuvi casi yo nu caahán ra Jesús ihya? —catyí ra naha.

Nu nacatsi ra Jesús tsa utsi uvi taahan ra cua caca tyiñu ra

(Mt. 10.1-4; Mr. 3.13-19)

¹² Quivi ican ndaa ra Jesús iin yucu. Tan ñiñu maa tsican tahvi ra tsi Nyoo. ¹³ Tan tsa tuvi, cana ra tsi tandihí ra nyicún tsi ra. Tan nacatsi ra utsi uvi taahan ra naha. Tan jacunañi ra tsi ra naha apóstol, tan cuñi tsi catyi tsi “ra tsa tava tyiñu Nyoo”. ¹⁴ Tan ihya nyaá sivi tandihí tsa utsi uvi ra naha: ra Simón, ra tsa jacunañi ra Cristo “Pedro”; tan yañi ra, ra Andrés; tan ra Jacobo; ra Juan; ra Felipe; ra Bartolomé; ¹⁵ ra Mateo; ra Tomás; ra Jacobo, sehe ra Alfeo; tan ra Simón ra nyanaa cuví ra cuenda partido tsa cuñi cuhun cuatyí siqui ñuu Roma tsa ndacá ñaha tsi ñi; ¹⁶ tan ra Judas, yañi ra Jacobo; tan ra Judas Iscariote, ra tsa xico tsi ra Jesús.

Nu jacuahá ra Jesús tsi nyivi cuaha

(Mt. 4.23-25)

¹⁷ Tacan tan nuu ra Jesús yucu ican tsihin tsa utsi uvi ra naha. Tan ndu iin nyivi tsa nyicún tsi ra tsaha yucu can. Tan tsaa cuaha tucu nyivi quee ñuu Jerusalén tsihin tandihí ca ñuu cayucú Judea, tsihin tucu nyivi quee ityi yuhu ndutya ñuhu tsa cayucú yatyin ñi ñuu Tiro tsihin ñuu Sidón. Tan tsaa ñi tyin tyaa soho ñi tuhun caahán ra Jesús. Tan tandihí nyivi cuuhví cuñi ñi tsa janduvaha ra tsi ñi. ¹⁸ Tan tandihí nyivi tsa yihí tatyí ña vaha janduvaha ra tsi ñi. ¹⁹ Tan tandihí ñi cuñi ñi tñin ñi tsi ra, tyin janduvaha ra tsi ñi tsihin tunyee iñi tsa iyó tsi ra.

Tsehe caḥan ra Jesús tsihin nyivi tsa naquihin ndaahvi ra

(Mt. 5.1-12)

²⁰ Tacan tan nanyehe ra Jesús tsi ra tsicá tsihin ra. Tan catyí ra tsihin ra naha:

—Tandihí nyooḥo tsa ndaahvi, sií xaan cua cuñi ndo, tyin taahán tsi cundaca ñaha Nyoo tsi ndo.

²¹ Tandihí nyooḥo tsa tsisocó vityin, sií xaan cua cuñi ndo. Tyin coo quivi ña cua cusoco ca maa ndo. Tan tandihí nyooḥo tsa tsacú tsa cuiihya cuñi ndo, sií xaan cua cuñi ndo tyin ña cua coo ca ndo tucuiihya iñi. Tan cua vacu naaha xaan ndo tsihin tsa sií cuñi ndo.

²² Cusií iñi ndo, quivi ndasi cuñi nyivi nyehe ñi tsi ndo, quivi tava ñi tsi ndo nu iyó ñi, quivi nduxaan ñi tsi ndo, quivi catyi ñi tyin nyivi ña vaha cuví ndo tyin tsinú iñi ndo tsi maa yu tsa cuví yu Rayií quee nda gloria. ²³ Sií cuñi ndo quivi can tyin tacan tucu javahá nyivi ñi taḥan tsanaha. Cuxaan ñi tsi ra cuví ndusu yuhu Nyoo. Ndava ndo tsihin tsa sií cuñi ndo. Tyin cahnu xaan ndatu cua ñihi ndo nda gloria.

Tsehe caḥan ra Jesús tsihin nyivi ña tsinú iñi tsi ra

²⁴ Maa tyin ndahvi nyooḥo, ñi cuca. Tyin vityin sií xaan cuñi ndo tsihin tandihí tsa cuca ndo. Maa tyin cua coo quivi maa ñi maa tundoho cua nyehe ndo. Tyin nduve tsa cua ñihi ndo nu nyaá Nyoo.

²⁵ Tan ndahvi nyooḥo tsa cuñi maa ndo tyin nduve tsa cumañi tsi ndo tsa vityin, tyin coo quivi cua cusoco ndo. Nyooḥo tsa sií cuñi vityin, ndahvi nyooḥo, tyin coo quivi cua coo ndo tucuiihya iñi. Tan cua vacu xaan ndo. ²⁶ Tan ndahvi nyooḥo tsa

vaha caahán nyívi tuhun ndo. Tyin tacan caa tucu nyívi tsicoo tsanaha, vaha xaan cahan ñi tuhun ra tsa cahan tsa ña nditsa tsihin ñi.

Cuñi ndo tsi nyívi xaan iñi tsi ndo

(Mt. 5.38-48; 7.12)

²⁷ Tandihí nyoocho tsa tsiñí tsa caahán yu, catyí yu tsihin ndo tyin: Cuñi ndo tsi nyívi xaan iñi tsi ndo. Javaha ndo tsa vaha tsihin nyívi tsa ndasi cuñi nyehe tsi ndo. ²⁸ Cahan ndo tsa vaha tsihin nyívi tsa caahán ndavaha ñi tsi ndo. Tan ndacan tahvi ndo tsi Nyoo tsa cuenda nyívi caahán nyaa tsi ndo. ²⁹ Tatun iin ra cañí iin tsiyo nuu ndo, cūhva ndihí ndo inga tsiyo, nacañi ndihí maa ra. Tatun iin ra quinyaá tsaqueta nditsí ndo, cūhva ndihí ndo camiseta ndo. ³⁰ Cūhva ndo náa ndihí tsicán nyívi tsi ndo. Tatun quinyaá ñi náa tsa iyó tsi ndo, ña ndacan ca ndo can tsi ñi. ³¹ Tumaa cuñí ndo tsa javaha nyívi tsa vaha tsihin ndo, tacan javaha tucu maa ndo tsa vaha tsihin ñi.

³² Tatun cuñí ndo tsi maa ñi maa nyívi tsa cuñí tsi ndo, nduve tsa vaha javahá ndo. Tyin tacan icá tucu nyívi quiñi iyó. ³³ Tan tatun tsihin nyívi tsa vaha icá tsihin ndo, tan icá ndo tsa vaha, tan ña icá ndo tsa vaha tsihin inga nyívi, nduve tsa vaha icá ndo cuví can, tyin nyívi caquiñi, tacan icá tucu ñi can. ³⁴ Tatun javahá ndo tumañi iñi tsi iin nyívi, tan nyitá iñi ndo tyin cua javaha tucu ñi can tumañi iñi tsi ndo, nduve tsa vaha icá ndo. Tyin nyívi caquiñi, tacan icá ñi. Tatun náa tumañi iñi javahá ñi tsi nyívi vaha iñi tsi ñi, ndatú ñi tsa nacuhva tucu ñi can tumañi iñi tsi ñi. ³⁵ Maa tyin nyoocho, cuñi ndo tsi nyívi xaan iñi tsi ndo. Tan javaha ndo tsa vaha tsihin ñi. Tan cūhva nuu ndo

náa nducú ñi. Maa tyin ña cuatu ndo náa tumañi ñi cua nacuhva ñi tsi ndo. Tacan tan cahnu xaan tsa cua ñihi ndo nuu Nyoo tan cua cuvi ndo sehe maa Nyoo, ra nyaá gloria. Tyin Nyoo vaha ñi ra nda cuanda tsihin nyivi tsa ña nacuhvá tyahvi nyoo tsi ra, tan tsihin nyivi caquiñi. ³⁶ Cú uhvi ñi ndo tsi nyivi, tumaa uhvi cuñi Nyoo Jutu yo nyehé ra tsi yo.

Ña cahan nyaa yo tsi inga nyivi
(Mr. 7.1-5)

³⁷ 'Ña cahan nyaa ndo tsi nyivi, tacan tan Nyoo ña cua cahan nyaa ra tsi maa ndo. Ña catyi ndo tsa cuhun ñi anyaya, tacan tan ña cua jacuhun Nyoo tsi ndo anyaya. Jaha ndo tucahnu ñi tsi nyivi. Tan Nyoo cua jaha ra tucahnu ñi tsi maa ndo. ³⁸ Cuhva ndo tsa tsiñi ñuhu tsi nyivi. Tacan tan cua cuhva tucu maa Nyoo tsa tsiñi ñuhu tsi maa ndo. Cuaha cua cuhva ra tsi ndo. Tyin tumaa cuhva cua cuhva ndo tsi nyivi, tacan cuhva cua cuhva Nyoo tsi ndo —catyi ra Jesús.

³⁹ Tan tsahá ra Jesús cuhva ihya tsi ñi, tan catyi ra:

—Iin ra cuaa ña cuvi janaha ra ityi tsi inga ra cuaa. Tyin nduvi taahan ra naha ña nyehé ra naha ityi cuahán ra naha. Tan cuvi canacava ra naha tsitsi iin xahva. ⁴⁰ Ndi intuhun ra cutuhvá ña cua cuvi coto ra tsa tsitó ra jacuahá tsi ra. Tyin ndi quitsahá cahvi ra. Cua coto ra nda ndihi cahvi ra.

⁴¹ '¿Nacaa tyin nyehé un tsahan luhlu tsa nyii tinuu yañi un, tan ña jahá un cuenda yutun cahnu tsa nyii tinuu maa un? ⁴² Tatun tinuu maa un nyii iin yutun cahnu, ¿nácaa cua cuvi catyi un tsihin

ra yañi un: “Naha, na tava yu tsahan luhlu tsa nyii tinuu un.”? ¡Yooho tsa jahá tyin vaha xaan un! Tava jihna yutun cahnu tsa nyii tinuu maa un. Tyin tacan tan cuvi nyehe vaha un tsahan luhlu tsa cua tava un tinuu yañi un.

Tsihin tsa javahá nyivi tan nacoto yo tsi ñi tatun ñi vaha, a ñi ña vaha cuví ñi
(Mt. 7.17-20; 12.34-35)

⁴³ 'Iin yutun vaha tsahá tun yucu vixi, yucu vaha. Tan iin yutun ña vaha tsahá tun yucu ña vaha. ⁴⁴ Tandihí yutun nacotó yo tsi tun tsihin tsiti tun. Tyin tiñata, ña cua cuhva tun mangu. Tan ndi intuhun iñu nduuhva ña cua cuhva tun uvas [tsa cuví yucu vixi]. ⁴⁵ Tan tacan tandihí nyivi vaha, vaha caahán ñi, tyin yihí tsa vaha añaima ñi. Maa tyin nyivi ña vaha, maa ñi maa tsa ña vaha caahán ñi tyin yihí tsa caquiñi añaima ñi. Tyin tsihin yuhu yo caahán yo tandihí tsa quitá tsitsi añaima yo.

Cua cacu nyivi tsa tyaá yahvi tuhun caahán ra Jesús, tan nyivi ña tyaá yahvi tsa caahán ra, ña cua cacu ñi
(Mt. 7.24-27)

⁴⁶ '¿Nacuenda catyí ndo tsihin yu, “Jutu Mañi yu, Jutu Mañi yu”, tan ña javahá ndo tsa caahán yu? ⁴⁷ Vityin cua catyí yu tsihin ndo yóo ndacú nyoooho tsa vatsí ndo tsi maa yu, tan tyaá soho ndo tsa caahán yu, tan javahá ndo cuhva catyí yu. ⁴⁸ Cuví ndo tumaa cuví iin ra tsitó janduvita vehe. Tyin jihna ca tahvi cunu xaan ra tan taha ra yuu. Tan tyaá ra tyihyo tsaha vehe can tsata yuu can. Tan quivi nduñihí cuún savi, ndutya can tsatya xaan tsi tsaha vehe, maa tyin vehe can ña tani maa tsi tyin

vaha xaan quita tyihyo tsaha tsi. ⁴⁹ Maa tyin nyivi tsa tsiñi tsa caahán yu tan ña javahá ñi tsa caahán yu, cuví ñi tumaa iin ra javahá vehe tan ña vaha javahá ra itsi. Tyin nduve tyihyo tsaha tsi javahá ra. Tan quivi tsaa savi, tan cuñihí cuún savi, tan yahá ndutya cuaha tsaha vehe can. Tan vehe can, iin yaha ñi tani tsi —tacan catyí ra Jesús.

7

Nu janduvahá ra Jesús musu iin ra capitán andarú

(Mt. 8.5-13)

¹ Ndihi cahan ra Jesús tsihin nyivi, tacan tan cuanuhu ra inga tsaha nda ñuu Capernaum. ² Tan ñuu can iyó iin ra capitán. Tan iyó iin musu ra tsa cuñi xaan ra. Tan cuuhví ra can. Tan tsa cuñi cúu ra. ³ Tan tsa tsitó ra capitán can tuhun ra Jesús, tacan tan tava tyiñu ra tsi juhva ra cuví ra tsahnu ñuu Israel naha ra na cahan ra naha tsihin ra Jesús, tyin na quitsi ra janduvaha ra tsi musu ra. ⁴⁻⁵ Tacan tan tsaa ra tsahnu ican naha ra nu nyii ra Jesús. Tan quitsahá caahán ndaahvi ra naha tsihin ra tan catyí ra naha:

—Iyó iin ra capitán cuenda ñuu Roma. Tan vaha xaan nyivi cuví ra tsihin yo tsa cuví yo nyivi Israel. Nda cuanda javahá ña ra iin vehe ñuhu yo. Tan taahán tsi tyin jatyinyee un tsi ra. Tyin cuuhví xaan musu ra. Tan cuñi ra tyin janduvaha un tsi ra.

⁶ Tacan tan cuahán ra Jesús tsihin ra naha. Maa tyin tsa ndi cumañi ca tsaa ra nda vehe ra capitán can, tan ra capitán can tava tyiñu ra tsi ra vaha iñi

tsi ra. Tacan tan tsaꝯ ra naha nu nyií ra Jesús. Tan catyí ra naha tsihin ra Jesús:

—Taa, catyí ra capitán tyin ña jatyañu un tsi un tsa cuhun un nda yuvehe ra. Tyin ña cahnu cuví ra tan cuhun un vehe ra, catyí ra. ⁷ Yacan ña cana iñi ra quitsi ra nu nyií un. ¿A ña jaha un tumañi iñi tsi ra, tyin ihya cahan un iin tuhun, tan cua nduvaha musu ra, catyí ra? ⁸ Tyin maa ra, capitán cuví ra. Tan ndacá ñaha rey tsi ra. Tan maa ra ndacá ñaha ra tsi ra cuatyí cutahán tsihin ra. Tatun tavá tyiñu ra tsi iin ra cuatyí ican, na cuhun ra, cuahán ra. Tatun catyí ra tsihin inga ra, na quitsi ra, vatsí ra. Tatun jacuhún ra tsi inga ra, na jaha tyiñu ra, cua jaha tyiñu ra. Tan tacan tucu yoohe, tatun catyí un na nduvaha musu ra, tacan tan cua nduvaha ra —catyí ra vaha iñi tsi ra capitán can naha ra tsihin ra Jesús.

⁹ Tsa tsiñi ra Jesús tsa cahan ra can naha ra, tan iyo xaan cuñí ra. Tan nanyehe ra tsi nyivi tsa nyecú tsihin ra, tan catyí ra:

—Nditsa nditsa tyin tsinú xaan iñi ra capitán can. Ñaha ca nañihi yu tsi ndi intuhun ra Israel tsa tsinú xaan iñi tumaa ra ican —catyí ra Jesús.

¹⁰ Tacan tan cuanuhu ra vaha iñi tsi ra capitán can naha ra. Tan tsa tsaꝯ ra naha nda yuvehe, tan nyehe ra naha tyin tsa nduvaha musu ra.

Nu janandotó ra Jesús tsi sehe iin ñaha ndaahvi tsihi yñi

¹¹ Tsa yaha yacan tan cuahán ra Jesús iin ñuu tsa nañi Naín. Tan cuahán tucu ra tsicá tsihin ra. Tan cuahán ndihi tucu cuaha xaan nyivi. ¹² Tacan tan cuhva tsa cua tsaa ra yatyin ñuu ican, nyehe ra

tyin cuaha xaan nyiví quitá ñi ñuu ican. Tan nyisó ra naha iin ndiyí, cua cutsi ra naha sehe iin ñaha ndaahvi tsa tsihí yí. Tan intuhun ñi maa ra cuví sehe ña, tan tsihí ra. ¹³ Tan tsa nyehe ra Jesús tsi ña, tan cundaahvi iñi ra nyehe ra tsi ña. Tan catyí ra tsihin ña:

—Ña vacu un.

¹⁴ Tsahan natuhvā ra tan tñin ra tsatun tsa nyii ndiyí can. Tacan tan ra nyisó tsi ndiyí can naha ra tsicuiñi ra naha. Tan catyí ra Jesús tsihin ndiyí can:

—Nduvita, yoocho ra tyuvaa —catyí ra.

¹⁵ Tacan tan nduvitā ndiyí can. Tan nacunyaā ra. Tacan tan quitsahā caahán ra. Tan ra Jesús nacuhvā cuenda ra tsi ra tsi sihi ra. ¹⁶ Tsa nyehe ñi tsa tacan nandoto ra jahā ra Jesús tan yuuhví xaan ñi, tan quitsahā jacahnú ñi tsi Nyoo. Tan catyí ñi:

—Cahnu xaan ra cuví ndusu yuhu Nyoo tsaā nu yucú yo ihyā.

Tan catyí tucu ñi:

—Maa Nyoo cuví ra vatsí nu iyó yo, vatsí jatyinyee ra tsi yo —catyí ñi.

¹⁷ Tan tandihí maa nyiví taniñi cahnu Judea, tsito ñi tsa javahā ra Jesús.

Nu jacuhun ra Juan uvi taahan ra tsa tsicá tsihin ra nu nyii ra Jesús

(Mt. 11.2-19)

¹⁸ Tan ra tsicá tsihin ra Juan naha ra nacatyí tuhun ra naha tsa javahā ra Jesús. Tacan tan canā ra Juan tsi uvi taahan ra naha. ¹⁹ Tan tavā tyiñu ra tsi ra naha na cuhun ra naha nu nyii ra Jesús, tan ndaca tuhun ra naha tsi ra tatun juvin ra cuví Cristo, ra tsa cua jaquitsi Nyoo. Tyin tatun ñavin ra

Cristo cuví ra, cuatu ra naha tsi inga ra. ²⁰ Tacan tan ra tsa jacuhun ra Juan, cuahán ra naha. Tan tsaá ra naha nu nyíí ra Jesús. Tan catyí ra naha:

—Ra Juan, ra jacoondutyá, tava tyiñu ra tsi ndi tyin ndaca tuhun ndi tsi un tatun juvin un cuví Cristo, ra tsa cua jaquitsi Nyoo. Tyin tatun ñavin un, cuatu ndi tsi inga ra —catyí ra naha tsihin ra Jesús.

²¹ Tan tsa ndi yucú ra tsa jacuhun ra Juan naha ra tan cuaha xaan nyívi cuuhví janduvahá ra Jesús. Tan tacan tucu nyívi yihí tatyí ña vaha. Tan cuaha tucu nyívi cuaa nanyehe ñi jahá ra. ²² Tacan tan catyí ra Jesús tsihin ra tsa jacuhun ra Juan naha ra:

—Cuaahan ndo. Tan nacatyí tuhun ndo tsihin ra Juan tandíhi tsa nyehe ndo, tan tandíhi tsa tsiñi ndo. Tan catyí ndo tsihin ra: ra cuaa nanyehe ra, ra coxo nacacá ra, ra ndohó cuehe tyaahyú nduvahá ra, ra soho nacuñi ra, ndiyi nandoto, tan caahán yu tuhun Nyoo tsihin ñi ndaahvi nácaa cacu ñi. Tan catyí ndo tsihin ra tyin ²³ si xaan cuñí ñi nyicún tsi yu tun ña ndu uví iñi —catyí ra Jesús tsihin ra naha.

²⁴ Cuahán ra tsa jacuhun ra Juan naha ra, tan quitsahá caahán ra Jesús tuhun ra Juan tsihin nyívi. Tan catyí ra:

—¿Náa nyehe ndo quívi tsahan ndo nuu tsiqui ndií ican? ¿A nyehe ndo iin ndoo tsa janduvá tatyí?

²⁵ ¿A iin ra tsa nditsí jahma vaha nyehe ndo? Ñavin. Tyin tsitó ndo tyin ra nditsí jahma vaha, iyó ra tsihin tsa vaha tan iyó ra vehe ra cuví rey. ²⁶ ¿A ña nyehe ndo tsi iin ra cuví ndusu yuhu Nyoo? Juvín. Cahnu ca cuví ra tan ñavin ca ra ndusu yuhu Nyoo.

²⁷ Juvin ñi tuhun ra Juan cuví tsa nyaá nuu tutu tsa tyaa ra Isaías taḥan tsanaha. Tan caahán Nyoo tuhun ra tyehen:

Yuhu cua jacuhun yu iin ra cua cahan tuhun yu tsa ndi cumañi ca cuhun un.

Na natyiso vaha ra ityi nu cua cuhun un.

²⁸ 'Tan catyí yu tsihin ndo tyin tsitsi tsa tandihi ra tsa cacu jahā ñiñaha, yoñi ra cuví ndusu yuhu Nyoo tsa cahnu ca tumaa ra Juan, ra jacoondutyá. Maa tyin ra tsa ndacá ñaha Nyoo añima vasu iin ra luhlu cuii ñi cuví ra, maa tyin cahnu xaan ca cuví ra tan ñavin ca ra Juan.

²⁹ 'Tandihí nyívi tan ra tavá xuhun naha ra, tsa tsicoondutyá jahā ra Juan, nacoto ñi tyin cuhva javahá Nyoo, cuiṭi xaan tsi. ³⁰ Maa tyin tandihí ra fariseo tsihin ra maestro cuenda ley vehe ñuhu, ña cuñí ra naha tsa jacoondutyá ra Juan tsi ra naha, tyin ña cuñí ra naha quihin ra naha tsa tsahá Nyoo tsi ra naha —catyí ra Jesús. ³¹ Tan catyí tucu ra:

—¿Náa cua jandu inducu yu tsihin nyooḥo, nyívi iyó quívi ihya? ¿Yóo caá tumaa caá ndo?

³² Tumaa ra nyihi cuví nyooḥo. Tyin ra nyihi jasiquí nuyahvi. Tan caná tsaa tahan ra naha, tan catyí ra naha: “Tívi ndi tiyoo tan ña tsañi ndo yaa. Tan tsitā ndi yaa cuihya, tan ña tsacu ndo”. catyí ra nyihí. [Tan tacan ñi cuví nyooḥo tyin ndi intuhun cuhva ña taahán iñi ndo.] ³³ Tyin ra Juan, ra jacoondutyá, quitsi ra tan ña tsatsí vaha ra. Tan ña tsihi ra vinu. Tan nyooḥo catyí ndo tyin tatyí ña vaha yihí tsi ra. ³⁴ Tan quitsi tucu yuhu tan cuví yu Rayi tsa quee nda gloria. [Tan tsatsí yu tan tsihi yu.] Tan nyooḥo catyí ndo tyin tsatsí xaan

yu tan tsihí xaan yu vinu. Tan ña taahán iñi ndo tsa cutahán yu tsihin ra iyó cuatyí naha ra, tan tsihin ra tavá xuhun naha ra. ³⁵ Maa tyin catyí yu tsihin ndo tyin tsa tsiñi tuñi Nyoo tsahá ra tsi nyívi naquihín tuhun caahán yu tan tuhun caahán ra Juan. Tan maa ñi cua janaha tsi ndo tyin vaha tsa tsiñi tuñi Nyoo —catyí ra Jesús.

Nu nyii ra Jesús vehe ra Simón ra cuví fariseo

³⁶ Iin ra fariseo tsa nañi Simón jacoto ra tsi ra Jesús tyin cuhun ra cucatsi ra nda yuvehe ra. Tan tsaa ra Jesús vehe ra, tan tsicunyaá ra nu mesa.

³⁷ Tacan tan iin ñaha sii iñi ñuu ican tsito ña tyin nyii ra Jesús ican. Tan tsaa ña tsihin iin yutyi yuu xiñu tsitú tsi ndutya tami. ³⁸ Tan tsinyaá ña yatyin ñi tsaha ra. Tan quitsahá tsacú ña tyin ndu uvi iñi ña cuatyí ña. Tan cuún ndutya nuu ña. Tan tsihin ndutya nuu ña nacatyá ña tsaha ra Jesús. Yaha can tan jana ityi ña tsaha ra tsihin ixi jiñi ña. Tan tyayuhu ña tsaha ra. Tacan tan tyoso ña ndutya tami ican tsata tsaha ra. ³⁹ Tsa nyehe ra fariseo can tsa tacan ica ña, tan tsicá iñi ra: “Tatun nditsa tsa Nyoo jaquitsi tsi ra ihya, cua nacoto ra yóo ñaha tñn tsaha ra, tyin ñaha ican, ñaha iyó cuatyí cuví ña.”

⁴⁰ Tacan tan ra Jesús catyí ra tsihin ra fariseo ican:

—Yooho Simón, iyó iin tsa cua cahan yu tsihin un —catyí ra tsihin ra.

Tacan tan nacañan ra Simón, tan catyí ra:

—Vaha, cañan tsihin yu, Maestro —catyí ra.

⁴¹ Tan catyí ra Jesús tyehen tsihin ra:

—Uvi taahan rayi nyaá cuenda ra xuhun tsi iin ra tsa tuhvá tsahá nuu xuhun. Tan iin ra ican

nyaá cuenda ra uhun cientu denario. Tan inga ra nyaá cuenda ra uvi xico utsi ñi denario. ⁴² Tan nduvi taahan ra, ña cuví tyahvi ra naha. Tan ra tuhvá tsahá nuu xuhun ican, jahá ra tucahnu iñi tsi nduvi taahan ra naha. Tan vityin catyi tsihin yu, yoocho Simón, ¿ndáa ra cua cuñi ca tsi ra tsa tsahá nuu xuhun ican? —catyi ra Jesús.

⁴³ Tacan tan nacahan ra Simón, tan catyi ra:

—Ra tsa cuaha ca jahá ra tucahnu iñi tsi —catyi ra.

Tacan tan catyi ra Jesús:

—Nditsa tsa caahán un —catyi ra.

⁴⁴ Tacan tan nanyehé ra Jesús tsi ñaha ican, tan catyi ra tsihin ra Simón:

—¿A nyehé un tsi ñaha ihya? Yuhu quihvi yu tsitsi vehe un, tan ña tsahá un ndutya tsa ndoo tsaha yu tumaa cuhva tsa iyó yo. Tan ñaha ihya nacatyá ña tsaha yu tsihin ndutya nuu ña. Tan jana ityi ña tsihin ixi jiñi ña. ⁴⁵ Yoocho ña tyayuhú un ndaha yu, tumaa cuhva tsa iyó yo, maa tyin maa ña nda cuanda tsa quihvi yu ihya tan ña jandihí ña tsa tyayuhú ña tsaha yu. ⁴⁶ Tan yoocho ña tyihí un acetye jiñi yu, maa tyin ñaha ihya tyihí ña ndutya tami tsaha yu. ⁴⁷ Tan catyi yu tsihin un, yoocho Simón, vasu cahnu xaan cuatyí ña, maa tyin jahá yu tucahnu iñi tsi ña. Yacan cuenda cuñi xaan ña tsi yu. Tan nyivi tsa jahá yu tucahnu iñi luxu ñi cuatyí ñi, luxu ñi cuñi ñi tsi yu —catyi ra Jesús.

⁴⁸ Tacan tan catyi ra Jesús tsihin ña can:

—Cuatyí un tsa yahá catsiyo, tyin tsa jahá Nyoo tucahnu iñi tsi un —catyi ra Jesús tsihin ña.

⁴⁹ Tacan tan ra yucú tsihin ra quitsaha tsicá iñi ra naha: “¿Yóo ra cuví ra ihya? tyin jahá ra tucahnu iñi cuatyí nyívi.”

⁵⁰ Tacan tan catyí ra Jesús tsihin ñaha ican:

—Cuaahan vityin, tsa cacu un tyin tsinu iñi un tsi yu. Cuaahan tsihin tsa vaha —catyí ra tsihin ña.

8

Ñiñaha tsa jatyinyee tsi ra Jesús

¹ Tsa yaha can, tan cuahán ra Jesús tsicá ra iin iin ñuu nahnu tan iin iin ñuu nyihi. Tan caahán ra tsihin nyívi. Tan jacotó ra tsi ñi tuhun vaha nácaa cuñi Nyoo cundaca ñaha ra tsi ñi. Tan tsa utsi uvi taahan ra tsa tava tyiñu ra, cuahán ra naha tsihin ra. ² Tan cuahán tucu juhva ñiñaha tsa janduvaha ra: ñi cuhví tan ñi yihí tatyí ña vaha. Tan tsihin ñi cuahán ña María tsa quee ñuu Magdala, tan juvin ña cuví ña yihí utsa tatyí ña vaha tan nduvaha ña. ³ Tan cuahán tucu ña Juana, ñasihi ra Chuza, ra cumí tyiñu cuenda ra Herodes, tan ña Susana tsihin tandihi ca ñiñaha tsa jatyinyee tsi ra Jesús tsihin tsa iyó tsi ñi.

Nu caahán ra Jesús tyin tumaa iin ra tatsí tacan cuví ra caahán tuhun Nyoo

(Mt. 13.1-9; Mr. 4.1-9)

⁴ Tan cuaha xaan nyívi quee ñi iin iin ñuu, tyin cua nyehe ñi nu caahán ra Jesús tuhun Nyoo. Tan tuvi xaan ñi nyecú, tan quitsaha caahán ra tsihin ñi tsihin iin cuhva tsaha cuenda ra, tan catyí ra:

⁵ —Quita iin ra vehe ra. Cuahán ra nu iyó tyiñu jahá ra, tyin cua tatsi ra tsiti trigu nu ñuhu ra. Tan cuhva tsa tatsí ra quití ra tsiti can, tan cucoyo juhva

yuhu ityi. Tan tsañi nyivi tsata can. Tan quitsi saa tan tsatsi ti. ⁶ Tan juhva ca tsiti can cucoyo tyañu yuu. Cana tsiti ican. Maa tyin na ityi tsi tyin luxu cuii ñi ñuhu yihí tsaha tsi. Tan nduve catsin. ⁷ Tan juhva ca tsiti cucoyo tyañu iñu. Maa tyin quivi cana trigu iin caa ñi tsihin iñu can, iñu can tsahñi tsi trigu can. ⁸ Maa tyin juhva ca tsiti cucoyo nu ñuhu vaha. Tan quivi tsahnü tsi, vaha xaan tsaha tsi tsiti. Tyin tsa iin ñi tsiti ican, cientu tsiti quita tsihin tsi —catyí ra Jesús.

Tan tsa yahá tsahá ra cuhva can, tan quitsahá caná tsaa ra tyin na tyaa soho nyivi, tan catyí ra:

—Tatun iyó soho ndo, tyaa soho ndo tuhun caahán yu —catyí ra.

Nu jacoto ra Jesús nacuenda jacuahá ra tsi nyivi tsihin cuhva caahán ra tsihin ñi
(Mt. 13.10-17; Mr. 4.10-12)

⁹ Yahá can tan ra tsicá tsihin ra, nducu tuhun ra naha tsi ra náa cuñí tsi catyí cuhva tsa cahan ra tsihin nyivi. ¹⁰ Tacan tan catyí ra tsihin ra naha:

—Tsi nyooho jacoto Nyoo tuhun xeehe, nácaa ndacá ñaha ra. Maa tyin tandihi ca ñi ican, tsihin cuhva ñi caahán yu tsihin ñi. Tacan tan nyehé ñi tan cuví tsi tumaa tsa ña nditsin nyehé ñi, tan tsiñi ñi maa tyin ña cua cutuñi iñi ñi náa tuhun cuví can.

Nu tsahá cuenda ra Jesús cuenda ra tsa tatsi
(Mt. 13.18-23; Mr. 4.13-20)

¹¹ 'Cuhva tsa tsahá yu tsi ñi, cuñí tsi catyí tsi tyehen: tsiti can, tuhun Nyoo cuví tsi. ¹² Tan nu cucoyo tsiti trigu ican yuhu ityi, nyivi tsa tsiñi tuhun Nyoo cuví can. Maa tyin quitsi nu ña vaha tan quinyaa nu tuhun Nyoo tsi ñi tan coto tsinu iñi

ñi tan cacu ñi. ¹³ Tan nu cucoyo tsiti can tyañu yuu, juvin ñi nyivi tsa tsiñi tuhun Nyoo cuví can. Sii xaan naquihñin vaha ñi itsi juhva ñi quivi. Maa tyin ña yihí vaha yoho ñi, juhva ñi quivi tsinu iñi ñi, tan quivi tsa quitsaha nyehé ñi tundoho, tan jandihñi ñi tsa tsinú iñi ñi. ¹⁴ Tan nu cucoyo tsiti tyañu iñu, juvin ñi nyivi tsiñi tuhun Nyoo cuví can. Tsiñi ñi tuhun Nyoo maa tyin ña nasama ñi cuhva iyó ñi. Tyin yihí ñi, tyaá ca iñi ñi tuhun tundoho tan ñavin ca tuhun Nyoo. Tan inga ñi, nyiyo ca iñi ñi tsa cuca. Tan inga tucu ñi sii ca cuñi ñi tsihin tsa sii caá tsa iyó nu ñuhu ñayivi. Tan cuví ñi tumaa cuví yutun tsa ña tsaha tsiti. ¹⁵ Maa tyin nu cucoyo tsiti nu ñuhu vaha, yacan cuví nyivi tsa tsiñi tuhun Nyoo, tan vaha aña ñi tyin tsinú iñi ñi tsihin tani aña ñi. Tan vaha tyaá soho ñi tuhun Nyoo, tan ña naá maa iñi ñi tuhun ra. Tan javahá ñi tandihñi tuhun caahán ra.

Nu cahan ra Jesús tyin ña cua tyihi xeehe yo ñuhu tsa jandunditsín Nyoo aña yo coto quinyaa ra itsi (Mr. 4.21-25)

¹⁶ 'Ndi intuhun yo ña tyaá yo ñuhu tyuma tan tyihí xeehe yo xuu tsito a inga nu xeehe. Tyaá yo ñuhu tyuma maa tyin tsaquin nyaa yo can iin nu sucun, tacan tan quihví nyivi tsitsi vehe maa tyin nditsin. ¹⁷ Tyin nduve iin tsa nyii xeehe, tan ña cua quituvi can. Tan ndi intuhun tsa xeehe, tan ña cua quita tsi nu nditsin, tan tsahan nacoto yo. ¹⁸ Yacan cuenda tyaa soho ndo tuhun caahán yu. Tyin tatun tyaá yahvi ndo tuhun caahán yu, cuaha ca cua janaha yu tsi ndo. Maa tyin tatun ña cua

tyaa soho ndo, tacan tan cua quinyaa Nyoo nda cuanda tsa luxu ñi tsa cuñi maa ndo tyin cumi ndo.

Nu tsaha cuenda ra Jesús tyin tumaa yañi ra, tan tumaa sihi ra, tacan cuvi nyivi tyaá yahvi tuhun Nyoo

(Mt. 12.46-50; Mr. 3.31-35)

¹⁹ Tacan tan tsaa sihi ra Jesús tsihin yañi ra nu nyii ra. Maa tyin ña cuvi tsaa ñi tyin tuvi xaan nyivi. ²⁰ Tacan tan jacoto nyivi nyecú ican tsi ra Jesús, tan catyi ñi:

—Sihi un tsihin ra yañi un naha ra nyecú ñi tsata vehe. Tan cuñi ñi cahan ñi tsihin un.

²¹ Tacan tan nacahan ra Jesús, tan catyi ra:

—Tandihí maa nyivi tsa tyaá soho tuhun Nyoo tsa caahan yu tan tyaá yahvi ñi itsi, juvin ñi cuvi sihi yu, tan juvin ñi cuvi yañi yu —catyi ra Jesús.

Nu jacutaxin ra Jesús tatyí ñihi nu miñi

(Mt. 8.23-27; Mr. 4.35-41)

²² Cuví tsi iin quivi quihvi ra Jesús tsitsi iin yutun ndoo tsihin ra tsicá tsihin ra. Tan catyi ra tsihin ra naha:

—Cohon ndo inga tsiyo miñi ihya.

Tacan tan cuahan ra naha tsihin yutun ndoo ican. ²³ Tan tsa ndi cuahan ca ra naha mahñu miñi ican, quixi ra Jesús. Tacan tan sana iñi ra naha tan tsaa tatyí ñihi xaan. Tan quitsaha tyihí tsi ndutya tsitsi yutun ndoo ican. Tan cuñi nyee yutun ndoo can tyin cuaha xaan ndutya quihvi. ²⁴ Tacan tan jandoto ra naha tsi ra Jesús. Tan catyi ra naha tsihin ra:

—¡Maestro! ¡Maestro! Tsa cuñi nyee yo tsitsi ndutya —catyi ra naha.

Tacan tan nduvita ra Jesús. Tan caahán ra tsihin tatyí can tan tsihin ndutya can, na cutaxin tsi. Tan cutaxin tsi. ²⁵ Tacan tan catyí ra tsihin ra tsicá tsihin ra:

—[¿Nacuvi yuuhví ndo?] ¿Numaa cuahán tsa tsinú iñi ndo? —catyí ra tsihin ra naha.

Maa tyin ra ican naha ra, nayuhví xaan ra naha. Tan iyo xaan cuñí ra naha. Tan quitsahá tsicá tuhun tahan ra naha:

—¿Yóo ra cuví ra ihya? Tyin nda cuanda tatyí tan ndutya tan tyaá yahvi tsi tsa caahán ra.

Nu nduvahá iin ra yihí tatyí ña vaha nda Gadara (Mt. 8.28-34; Mr. 5.1-20)

²⁶ Tacan tan tsaa ra naha nda Gadara tsa canyíi yuhu miñi ityi nuu Galilea tsa canyíi inga tsiyo miñi can. ²⁷ Tan quita ra Jesús tsitsi yutun ndoo ican. Tan ican tsaa iin ra ñuu tsa canyíi Gadara can tsijatahan ra tsi ra. Tan tsanaha xaan yihí tatyí ña vaha tsi ra, tan ña nditsí ca maa ra jahma. Tan ña iyó ra vehe ra. Tsicá nuu ñi maa ra nu ñaña cumí santu. ²⁸⁻²⁹ Tan tuhvá tatyí ña vaha ican jacunú sana nu tsi ra. Tan yacan cuenda tuhvá ñi tsaahñí ndaha ra tan tsaha ra tsihin cadena. Maa tyin tatyí ña vaha ican tsahá tunyee iñi tsi ra tsa cahnya ra can. Tan jacunú nu tsi ra. Tan tsindacá nu tsi ra iin nu nduve maa nyivi iyó. Ra ican tsaa ra nu nyii ra Jesús. Tan cuhva tsa nyehe ra can tsi ra Jesús, tsicuiñi tsiti ra nuu ra. Tan caná tsaa ra tan catyí ra:

—¿Nacuvi tyihí un tsi un tsihin yuhu, yooho Jesús, Sehe Nyoo nyaá gloria? Tsicán yu tsi un ña janyehe un tundoho tsi yu —catyí ra yihí tatyí ña

vaha ican tsihin ra Jesús, tyin ra Jesús tava tyiñu ra tsi nu tsa quita nu tsi ra ndaahvi ican.

³⁰ Tan nducü tuhun ra Jesús tsi tatyí ña vaha ican, tan catyí ra:

—¿Náa nañí un?

Tan tatyí ña vaha ican jacahan nu tsi ra can, tan catyí ra:

—Nyuhu nañí ndi, Legión.

Tacan catyí ra tyin cuaha xaan tatyí ña vaha yihí tsi ra. [Cuenda mil nahnu yihí tsi ra.] ³¹ Tacan tan catyí nahnu tsihin ra Jesús tyin ña jacuhun ra tsi nahnu tsitsi Yavi Cunu nu cua nyehe nahnu tundoho tan ña cuvi maa quita nahnu. ³² Tan tsican nahnu tsi ra Jesús na cuhva ra quihvi nahnu tsitsi quini tsa yucú yuhu miñi ican tsatsí ti naha ti. Tacan tan tsahā ra Jesús ndatu tsa quihvi nahnu tsitsi quini ican naha ti. ³³ Tan quita nahnu tsi ra ndaahvi can. Tan quihvi nahnu tsitsi quini ican naha ti. Tacan tan tsinü quini can naha ti. Tan yatyin ican nyaá iin xahva cunu yuhu miñi ican. Ican cucoyo ti naha ti tsitsi miñi ican. Tan tsihi ti naha ti tsitsi ndutya.

³⁴ Tacan tan ra jahá cuenda tsi quini ican naha ra, nayuhvi xaan ra naha. Tan tsinú ra naha cuahan ra naha cua nacatyí tuhun ra naha tsa cuvi can tsihin nyivi nda ñuu. Tan tandihi ñi nyivi tsa nyehe ra naha, tan nacatyí tuhun ra naha tsa cuvi ican. ³⁵ Tacan tan tsahan nyivi tsinyehe ñi náa tsa cuvi, tan tsaā ñi nu nyii ra Jesús. Tan nañihí ñi tsi ra tsa tsa yahā quita tatyí ña vaha can. Nyaá ra tsaha ra Jesús. Tan tsa ñuhú ra jahma. Tan tsa vaha cuñí jiñi ra. Tan nayuhvi xaan ñi cuvi. ³⁶ Tacan tan

tandihi ñi tsa nyehe tsa cuvi ican, nacatyí tuhun ñi tsihin tandihi ca nyivi nácaa quita tatyí ña vaha tsi ra ndaahvi can, tan nduvahā ra. ³⁷⁻³⁹ Tacan tan tandihi nyivi iyó Gadara can quitsahā caahán ñi tsihin ra Jesús na cunuhu ra ityi nu quee ra. Tyin nayuhvi xaan ñi tsa javahā ra tsihin nu tatyí ña vaha ican. Tacan tan ra tsa quita nu tatyí ña vaha can nahnū, cahan ndaahvi ra tsihin ra Jesús, na cuhva ra cuhun ndihi ra tsihin ra. Maa tyin catyí ra Jesús tsihin ra:

—Cuanuhu yuvehe un. Tan cuhva cuenda un tsi nyivi vehe un náa ndihi tsa javahā Nyoo tsihin un —catyí ra.

Tacan tan ra Jesús quihvi ra tsitsi yutun ndoo ican. Tan cuanuhu ra tsihin ra tsicá tsihin ra. Tacan tan ra ndaahvi tsa nduvahā ican, cuanuhu ra nda ñuu ra. Tan ityi cuahán ra nacatyí tuhun ra tsihin tandihi nyivi ñuu ican nácaa janduvahā ra Jesús tsi ra.

Nu nduvahā ña sehe ra Jairo tan ñaha tsa tñn jahma ra Jesús

(Mt. 9.18-26; Mr. 5.21-43)

⁴⁰ Quivi tsa tsaa ra Jesús inga tsaha tsa tsahan ra inga tsiyo miñi can, cuaha xaan nyivi ndatú tsi ra. Tan si xaan cuñí ñi tyin tsaa nyico ra. ⁴¹ Tacan tan tsaa iin ra tsa nañí Jairo, ra cuví ityi nuu vehe ñuhu, tan tsicuiñi tsiti ra nuu ra Jesús. Tan quitsahā caahán ndaahvi ra tsihin ra na cuhun ra vehe ra. ⁴² Tyin iyó iin ñaha sehe ra, tan iyó utsi uvi cuiya ña. Tan tsa cuñí cúu ña jahá cuehe. Tacan tan cuahán ra Jesús vehe ra. Tan cuaha xaan nyivi cuahán tsihin ra, tan tyañu xaan nu cuahán ra tyañu ñi. ⁴³ Tan tsihin nyivi ican cuahán iin ñaha cuuhví. Tsa

iyó utsi uvi cuiya ndohó ña cuehe tsa cuún niñi ña. Tan tsa ndihi maa xuhun ña janaa ña tsihin doctor tan ña nduvaha ña. ⁴⁴ Maa tyin tsa ña nu cuahán ra Jesús, ityi tsata ra. Tan tñin ña jahma ra. Tan iin yaha ñi, tan tsicuiñi tsa cuún niñi ña.

⁴⁵ Tacan tan catyí ra Jesús:

—¿Yóo tñin jahma yu?

Tan tandihi ñi cuahán tsihin ra catyí ñi:

—Yoñi.

Tan ra Pedro tsihin ra cutahan tsihin ra, catyí ra naha tsihin ra Jesús:

—Maestro, cuaha xaan nyivi cuahán tsihin un, tan tyañu xaan nu cuahán un. Tan juvin ñi maa ñi tyandahñi tsi un. Tan nducú tuhun ca un “¿Yóo tñin jahma yu?” —catyí ra naha.

⁴⁶ Maa tyin ra Jesús catyí ra:

—Tsitó maa yu tyin iyó iin nyivi tñin jahma yu, tyin tuví iñi yu cuahán juhva tunyee iñi tsa iyó tsi yu —catyí ra.

⁴⁷ Tacan tan ñaha can nyehé ña tyin tsa tsitó ra.

Tan quitsaha nihi ña tsihin tsa yuuhví ña. Tan tsicuiñi tsiti ña nuu ra. Tan nacatyí tuhun ña tsihin ra nacuenda tñin ña jahma ra, tan nácaa nduvaha ña iin yaha ñi ican. Tan tsiñi tandihi nyivi tsa nacatyí tuhun ña. ⁴⁸ Tacan tan catyí ra Jesús tsihin ña:

—Tsa nduvaha un tyin tsinú iñi un tsi yu. Cuaahan tsihin tsa vaha —catyí ra.

⁴⁹ Ndi caahán ca ra Jesús, tan tsa ñi iin ra quee vehe ra Jairo, ra cuví ityi nuu vehe ñuhu. Tan catyí ra tsihin ra Jairo:

—Sehe un tsa yaha tsihi ña. Ña cuhva ca un tsihi tsi ra Maestro ihya —catyí ra.

⁵⁰ Maa tyin tsa tsiñi ra Jesús tsa cahan ra ican, tan catyí ra tsihin ra Jairo:

—Ña nayuhvi un. Tsinu iñi. Tan ña sehe un cua nduvaha ña —catyí ra.

⁵¹ Tan cuhva tsa tsaá ra Jesús vehe ra Jairo, ña tsahá ra quihvi nyivi tsitsi vehe. Maa ñi maa ra Pedro tan ra Jacobo tan ra Juan tan jutu ñaha luhlu can tsihin sihi ña quihvi ñi tsitsi vehe nu canyií ñaha luhlu tsa tsihi can. ⁵² Tan tandihi ñi tsacú xaan ñi tsa cuenda tyin tsihi ña. Maa tyin ra Jesús catyí ra tsihin ñi:

—Ña vacu ca ndo. Tyin ña tsihi ña. Quixí ña —catyí ra.

⁵³ Maa tyin tsacú naaha ñi tsa caahán ra tacan. Tan ña tsinú iñi ñi, tyin tsitó ñi tyin tsa tsihi ña.

⁵⁴ Tacan tan tiin ra Jesús ndaha ña. Tan tsaá nacaahan ra tan catyí ra tsihin ña:

—Nduvita, ñaha luhlu —catyí ra.

⁵⁵ Tacan tan nandoto ña. Tan iin yaha ñi nduvita ña. Tan catyí ra Jesús:

—Cuhva ndo tsa catsi ña.

⁵⁶ Tan jutu ña tsihin sihi ña, iyo xaan cuñi ñi. Maa tyin catyí ra Jesús tsihin ñi tyin yoñi maa tsihin cua cahan ñi tsa cuvi ican.

9

Nu tava ra Jesús tyiñu tsi tsa utsi uvi taahan ra tsicá tsihin ra tyin cahan ra naha tuhun Nyoo (Mt. 10.5-15; Mr. 6.7-13)

¹ Cana ra Jesús tsa utsi uvi taahan ra tsicá tsihin ra. Tan tsahá ra tunyee iñi cahnu tsi ra naha tyin

cuví tava ra naha tatyí ña vaha tsi nyívi, tan cuví janduvaha ra naha tsi nyívi cuuhví.

² Tan tava tyiñu ra tsi ra naha na cahan ra naha nácaa ndacá ñaha Nyoo tsi nyívi. Tan tava tucu ra tyiñu tsi ra naha na janduvaha ra naha tsi nyívi cuuhví. ³ Tan catyí ra tsihin ra naha:

—Nduve tsa cuiso ndo ityi cuhun ndo, ndi tatun ña cundaha ndo. Ndi marali tan ndi tsa catsi ndo tan ña cundaha ndo. Tan ndi xuhun ña cundaha ndo. Tan iin nditsi ñi jahma ñuhú ndo cuhun tsihin ndo. ⁴ Tan ndáa cuví ñi vehe tsaa ndo, ndoo ndo ican nda cuanda quita quívi tsa cuhun ndo inga ñuu. ⁵ Tan nu ña cuñí nyívi tyaa soho ñi tsa caahán ndo, quita ndo ñuu ican. Tan naquisi ndo nyaca ñuhu tsaha ndo. Tan yacan janahá tyin ndoó cuatyí ñi síqui ñi —catyí ra Jesús tsihin ra naha.

⁶ Tacan tan cuahán ra naha tandihí maa ñuu. Tan caahán ra naha tuhun Nyoo tan nácaa cuñí tsi tan cacu ñi. Tan janduvahá ra naha tsi nyívi cuuhví.

Nu cuñí ra Herodes coto ra yóo ra cuví ra tsicá nuu caahán tuhun Nyoo tan janduvahá ra nyívi (Mt. 14.1-12; Mr. 6. 14-29)

⁷ Ra Herodes, ra cuví ra ndacá ñaha [tanií cahnu Galilea], ñihí tuhun ra tsa javahá ra Jesús. Tan ña ñihí vaha ra cuhva yóo ra cuví ra. Tyin yihí nyívi catyí ñi tyin ra Juan nandoto. ⁸ Tan yihí ñi catyí ñi tyin ra Elías quituvi nyico. Tan yihí ñi catyí ñi tyin inga ra cuví ndusu yuhu Nyoo tsanaha nandoto. ⁹ Maa tyin catyí ra Herodes:

—Maa maa yu tyihí tyiñu tsa tyahnya jucun ra Juan. Tun tacan, ¿yóo ra cuví ra tsa caahán xaan

nyivi tuhun catyí ñi tsiñí yu tyin cuaha xaan tsa iyo javahá ra? —catyí ra.

Tan ra Herodes can nducú xaan ra cuhva nyehe ra tsi ra.

Nu tsahá ra Jesús tsa catsi uhun mil rayi

(Mt. 14.13-21; Mr. 6.30-44; Jn 6.1-14)

¹⁰ Tan cuhva tsa tsaa nyico ra tava tyiñu ra Jesús, tan nacatyí tuhun ra naha tsihin ra Jesús tandihi maa tsa cuví nu tsahan ra naha. Tacan tan tava siin ra Jesús tsi ra naha tan cuahán ra naha yatyin ñi iin ñuu tsa nañi Betsaida. ¹¹ Maa tyin cuhva tsa ñihí tuhun nyivi tyin cuahán ra Jesús ndacan, tan cuahán ñi nda nu nyii ra. Tan naquihin cuenda ra tsi ñi. Tacan tan quitsahá caahán ra tsihin ñi nácaa ndacá ñaha Nyoo tsi ñi. Tan janduvahá ra tsi nyivi cuuhví.

¹² Tan tsa tseñi cuii ña, tsa utsi uvi taahan ra tsicá tsihin ra Jesús catyí ra naha tsihin ra:

—Cahan tsihin nyivi ihya, na cunuhu ñi na qui-tatu ñi, na nanducu ñi tsa catsi ñi ñuu tsa canyii yatyin ñi ihya, tyin ihya nduve maa tsa catsi yo iyó —catyí ra naha.

¹³ Tacan tan catyí ra Jesús tsihin ra naha:

—Cuhva nyoocho tsa catsi ñi —catyí ra.

Tacan tan catyí ra naha:

—Nduve maa tsa iyó ihya. Uhun taahan ñi paan, tan uvi taahan ñi tyaca iyó. Maa tyin ña ñihi tsa catsi tandihi nyivi ihya. Ndi maa cuhun ndi cujata ndi, maa tyin ña cua ñihi tsa catsi ñi tyin cuaha xaan ñi —catyí ra naha.

¹⁴ Tyin vasiqui quitá maa uhun mil rayi yucú ican. Tan siin maa ñiñaha tsihin sehe ñi. Tacan tan ra Jesús catyí ra tsihin ra naha:

—Na cunyecu nyivi tsa uvi xico utsi taahan ñi iin iin nu cunyecu ñi.

¹⁵ Tacan tan tsicunyecu tandihi ñi jahā ra naha.

¹⁶ Tan quihin ra Jesús uhun taahan paan ican tsihin uvi taahan tyaca ican. Tan nanyehe ndaa ra ityi andivi, tan nacuhva ra tyahvi nyoo tsi Nyoo tsa cuenda can. Tan tsahnya sava ra paan tan tyaca ican. Tan tsaha ra tsi ra tsicá tsihin ra, na tsatsa ra naha can tsi nyivi. ¹⁷ Tacan tan tandihi ñi tsatsi ñi, tan ndaha vaha iñi ñi. Yaha can tan ndoo ca tsa ñahñu, tan jacutu ra naha utsi uvi taahan tyica tsihin tsa ñahñu ican.

Nu catyi ra Pedro tyin ra Jesús cuvi ra Cristo, ra jacacú tsi yo

(Mt. 16.13-19; Mr. 8.27-29)

¹⁸ Iin quivi quita siin ra Jesús tsihin ra tsicá tsihin ra. Tan tsican tahvi ra tsi Nyoo. Tan nu ndihi tsican tahvi ra, tan tsica tuhun ra tsi ra tsicá tsihin ra tan catyi ra tsihin ra naha:

—¿Náa catyi nyivi tuhun yu, yoo ra cuvi yu, catyi ñi?

¹⁹ Tan nacañan ra tsicá tsihin ra, tan catyi ra naha:

—Yihí ñi catyi ñi tyin ra Juan, ra jacoondutya tsi nyivi, cuvi un. Tan yihí ñi catyi ñi tyin ra Elías cuvi un. Tan yihí ñi catyi ñi tyin inga ra cuvi ndusu yuhu Nyoo tahañ tsanaha cuvi un —catyi ra naha.

²⁰ Tacan tan nducu tuhun ra Jesús tsi ra naha, tan catyi ra:

—Tan nyooho, ¿yoo ra cuvi yuhu, cuñi maa ndo?

Tan nacañan ra Pedro, tan catyi ra:

—Yooho cuvi ra Cristo, ra tsa quee nu nyaá Nyoo.

²¹ Tan catyí ra Jesús tsihin ra naha tyin ña cahan ra naha can tsihin nyívi.

*Nu jacoto ra Jesús nácaa cua cahñi nyívi tsi ra
(Mt. 16.20-28; Mr. 8.30—9.1)*

²² Tacan tan catyí ra tsihin ra naha inga tsaha:

—Yuhu Rayi tsa quee nda gloria cuví yu. Tan taahán tsi tyin cuaha xaan tundoho cua nyehe yu. Tan ra cuví mandoñi naha ra, tan ra cuví jutu tsa cuví ityi nuu naha ra, tsihin ra maestro cuenda ley naha ra ña cua tsinu iñi ra naha tsi yu. Tan cua cahñi ra naha tsi yu. Maa tyin tsa tsinu uñi quívi cua nandoto yu —catyí ra Jesús.

²³ Tacan tan catyí ra tsihin ra naha:

—Nyoocho tsa cuñi cunyicun tsi yu, cahnya iñi ndo tsa cuñi maa ndo javaha ndo, tacan tan cuvi javaha ndo tsa cuñi Nyoo. Ña ndu uvi iñi ndo tsa yihí ndo cuenda yu vasu tandihí quívi nyehé ndo tundoho. Tyin yacan cuví tumaa cruu tsa taahán tsi cuiso ndo tatun cua cunyicun ndo tsi yu. ²⁴ Tan nyoocho tsa ña cuñi nyehe tundoho tan ña cuñi ndo cuhva ndo ñayívi iyó ndo tsa cuenda yu, cua nyehe ndo tundoho anyaya. Maa tyin nyoocho tsa cua cuhva ñayívi iyó ndo tsa cuenda yu, cua cacu ndo.

²⁵ Nduve yahvi nyaá cua ñihi ndo tandihí tsa iyó nu ñuhu ñayívi ihya, tun ña cua cacu añima ndo.

²⁶ Tyin tatun cahan nuu ndo tsa xaan cuñi nyívi nyehé ñi tsi ndo tsacatyí yuhu, tan tsacatyí tuhun caahán yu, cua nducahan tucu nuu maa yu nyehe yu tsi ndo na tsaa quívi quitsi yu inga tsaha. Tyin cua quitsi nyico yuhu Rayi tsa quee nda gloria tsihin tsa cahnu cuví yu, tan tsa cahnu cuví Nyoo Jutu yo, tan ángel tsa cuenda ra. ²⁷ Tan tsa nditsa

catyí yu tsihin ndo tyin yíhí ndo tsa nyecú ndo ihya vityin, ña cua cúu ndo nda cuanda yaha nyehe ndo nácaa cuví nu ndacá ñaha Nyoo.

Nu uñi taahan ra tsicá tsihin ra Jesús nyehé ra naha nácaa cuví nu ndacá ñaha Nyoo

(Mt. 17.1-8; Mr. 9.2-8)

²⁸ Una quiví yahá tsa cahan ra Jesús yacan, tan ndaa ra iin yucu tyin cua ndacan tahvi ra tsi Nyoo. Tan cuahán ra Pedro, ra Jacobo tan ra Juan tsihin ra. ²⁹ Tan tsa ndi tsicán tahvi ca ra Jesús, tan nasama cuhva caá nuu ra tan jahma ra. Sií xaan cuitsin tsi tan xiñu tsi. ³⁰ Tacan tan quituví uvi taahan ra natuhún tsihin ra, ra Moisés tan ra Elías. ³¹ Tan nditsin xaan nu yucú ra naha. Tan caahán ra naha cuenda tsa cua nyehe ra Jesús tundoho ñuu Jerusalén tan cua cúu ra. ³² Tan vasu cuñí xaan ra Pedro naha ra cusu ra naha, maa tyin ña quixí maa ra naha tyin nyehé ra naha tsa nditsin cuví nu nyaá ra Jesús tsihin ra nyecú tsihin ra. ³³ Cuhva tsa cuahán ra tsinyecu tsihin ra Jesús, tan catyí ra Pedro:

—Maestro, vaha xaan tsa yucú ndi ihya. Na javaha ndi uñi taahan tyahva, iin tsi maa un, iin tsi ra Moisés, tan iin tsi ra Elías —catyí ra Pedro, maa tyin ña tsitó ra tsa caahán ra.

³⁴ Tan tsa ndi caahán ca ra tan quitsí iin vico siquí ra naha. Tan nayuhví xaan ra naha tsa quihví ra naha tsitsi vico ican. ³⁵ Tacan tan tsitsi vico ican tsiñí ra naha iin ndusu tsa catyí:

—Juvín ra ihya cuví Sehe yu, tan cuñí xaan yu tsi ra. Tyaa soho ndo tsa caahán ra —catyí ndusu ican.

³⁶ Tan tsa yaha caḥan ndusu ican, tan nanyehe ra naha tyin intuhun ña maa ra Jesús nyaá ican. Tan yoñi maa tsihin caḥan ra naha tsa nyehe ra naha.

Nu janduvaha ra Jesús tsi iin ra luhlu tsa yihí tatyí ña vaha

(Mt. 17.14-21; Mr. 9.14-29)

³⁷ Tan tsa inga quivi tsa nuu ra Jesús yucu ican, cuaha xaan nyivi tsijatahan tsi ra. ³⁸ Tacan tan cana tsaa iin ra cuahan tsihin nyivi cuaha tsa tsijatahan tsi ra Jesús, tan catyí ra:

—Maestro, jaha tumañi iñi. Cundaahvi iñi tsi sehe yu. Tyin intuhun ñi maa ra cuví sehe yu.

³⁹ Tan tuhvá tatyí ña vaha quihví tsi ra. Tan tuhvá ra caná tsaa jahá nu. Tan janduvá nu tsi ra ndasava. Tan quitá tiñuu yuhu ra. Quiñi xaan taahan ra jahá nu. Tan ña cuñi maa nu tatyí ña vaha ican jaña nu tsi ra. ⁴⁰ Tsa caḥan yu tsihin ra tsicá tsihin un na tava ra naha tsi nu tatyí ña vaha ican, maa tyin ña cuví tava ra naha tsi nu —catyí ra.

⁴¹ Tacan tan nacaḥan ra Jesús tan catyí ra:

—Nyooḥo, nyivi ña tsinú vaha iñi. Tan caquiñi ndo. ¿Najava taahan ca quivi cunyaa yu tsihin ndo tan cunyeet iñi yu nyehe yu tsi ndo nda cuanda cutuhva ndo tan tsinu iñi ndo tsi yu?

Tan catyí ra tsihin ra ican:

—Ndaca sehe un tsi yu.

⁴² Tan cuhva tsa natuhva ra luhlu can nu nyaá ra Jesús, tan janduvá nu tatyí ña vaha ican tsi ra ndasava. Maa tyin ra Jesús tava ra tsi nu tatyí ña vaha ican. Tan janduvaha ra tsi ra. Tacan tan

nacuhva cuenda ra tsi ra tsi jutu ra. ⁴³ Tan tandihi nyivi, iyo xaan cuñi ñi tsa cahnu tsa javaha Nyoo nu yucú ñi.

Tsitsi tsa iyo cuñi nyivi tsa javaha ra Jesús, tan catyí ra tsihin ra tsicá tsihin ra:

Nu cahan ra Jesús inga tsaha tyin cua cahñi nyivi tsi ra

(Mt. 17.22-23; Mr. 9.30-32)

⁴⁴ —Tyaa soho vaha ndo tuhun caahán yu. Tan ña naa iñi ndo. Tyin Rayi tsa quee nda gloria, cua cuhva cuenda nyivi tsi ra tsi ra xaan iñi tsi ra —catyí ra Jesús.

⁴⁵ Maa tyin ra tsicá tsihin ra ña cutuñi iñi ra naha nacuenda cahan ra tacan. Tyin Nyoo ña tsaha ra tsa cutuñi iñi ra naha. Tan yuuhvi ra naha nducu tuhun ra naha tsi ra Jesús náa cuví tsa caahán ra.

Nu janaha ra Jesús yoo ra tsa cahnu ca cuví nu ndacá ñaha Nyoo

(Mt. 18.1-5; Mr. 9.33-37)

⁴⁶ Tacan tan ra tsicá tsihin ra quitsaha caahán yuhu tahan ra naha, ndaa ra cahnu ca cuví tsitsi tsa utsi uvi taahan ra naha. ⁴⁷ Tan tsitó ra Jesús tsa tsicá iñi ra naha, tan quihin ra iin ra luhlu. ⁴⁸ Tan catyí ra tsihin ra naha:

—Tatun tsihin sivi yu naquihín cuenda ndo tsi iin nyivi tsa ña cahnu jahá ñi tsi ñi tumaa ra luhlu ihya, tsi yuhu naquihín cuenda ndo cuví can. Tan tatun naquihín cuenda ndo tsi yu, tsi maa Nyoo tsa jaquitsi tsi yu, naquihín cuenda ndo. Tyin nu yucú ndo, ra tsa ña cahnu cuví, juvin ra cuví ra cahnu cuví nuu Nyoo —catyí ra Jesús.

Nyivi tsa ña cuxaán tsi yo, juvin ñi ican jatyinyeé tsi yo

(Mr. 9.38-40)

⁴⁹ Tacan tan ra Juan catyí ra tsihin ra Jesús:

—Maestro, nyehe ndi tsi iin ra tavá tatyí ña vaha. Caahán ra sivi un tan tavá ra tatyí ña vaha. Maa tyin ña tsahá ca ndi javaha ra tacan. Tyin ñavin tsihin yo tsicá ra —catyí ra.

⁵⁰ Tacan tan catyí ra Jesús tsihin ra:

—Ña casi ndo tsi ra. Tyin ra ican, ñavin ra xaan iñi tsi yo cuví ra, juvin ra cutahán tsihin yo cuví ra —catyí ra.

Nu cahān ra Jesús tsihin ra Juan tan tsihin ra Jacobo tyin ña vaha tsa tsicá iñi ra naha

⁵¹ Tuví iñi ra Jesús tyin tsa nyaa naa yatyin quivi tsa cunuhu ra gloria. Tan jandu iin ra iñi ra, tan quihin ra ityi tan cuahán ra ñuu Jerusalén. ⁵² Tan tava tyiñu ra na cuhun ra tsicá tsihin ra ityi nuu ca. Tan cuahán ra naha nda iin ñuu cuenda Samaria, tyin nducú ra naha nu quitatu ra Jesús. ⁵³ Maa tyin nyivi Samaria ican, ña cuñí ñi tsa ndoo ra ndacan, tyin tuví iñi ñi tyin Jerusalén cuahán ra, tan nyivi Samaria ndasi cuñí ñi nyehe ñi tsi nyivi ñuu Jerusalén. ⁵⁴ Tan tsa tsitó ra Jacobo tan ra Juan tsa ña tsahá ñi Samaria ican tsa ndoo ra ican, catyí ra naha tsihin ra Jesús:

—Jutu Mañi ndi, ¿A cuñí un tsa ica yo tumaa ica ra Elías? Cua ndacan yo tsi Nyoo na jaquitsi ra ñuhu andivi tyin cayu ñi Samaria ican tyin ña cuñí ñi tsa ndoo yo ñuu ñi —catyí ra naha.

⁵⁵ Tacan tan nyehe ra Jesús nuu ra naha. Tan cuxaān ra tsi ra naha tan catyí ra:

—Taxin ñi ndo. Ña vaha tsicá iñi ndo tyin ña cutuñí iñi ndo náa tyiñu vatsí yuhu. ⁵⁶ Tyin Rayi tsa quee nda gloria, ña vatsí ra tyin janaa ra tsi nyivi, maa tyin vatsí ra tyin jacacu ra tsi ñi —catyí ra.

Tacan tan cuahán ra naha inga ñuu.

*Nyivi tsa cuñí quihvi cuenda ra Jesús
(Mt. 8.19-22)*

⁵⁷ Tan tsitsi tsa tsicá ityi ra naha, quita iin ra, tan catyí ra tsihin ra Jesús:

—Jutu Mañi yu, cuñí yu cunyicun yu tsi un. Tan cuhun yu tsihin un tandiñi ñi ityi cuhun un —catyí ra.

⁵⁸ Tacan tan catyí ra Jesús tsihin ra:

—¿A nditsa un? Tyin ñicuii iyó vehe ti. Tan saa iyó taca ti. Maa tyin Rayi tsa quee nda gloria ndi nu cava jiñi ra tan nduve iyó —catyí ra tsihin ra ican.

⁵⁹ Tacan tan catyí ra Jesús tsihin inga ra:

—Cohon tsihin yu.

Tacan tan nacahan ra ican, tan catyí ra:

—Taa, cuatu nuu tsi yu, na cuhun jihna yu cucutsi yu tsi jutu yu —catyí ra.

⁶⁰ Tacan tan ra Jesús nacahan ra tan catyí ra tsihin ra:

—Nacoo tsi nyivi ña iyó Nyoo aña na cucutsi tahan maa ñi tsi ñi tsitsi ñuhu tun tsihi ñi. Maa tyin yoocho cuaahan cahan un tuhun Nyoo tsihin nyivi na cuhva cuenda ñi tsi ñi tsi Nyoo na cundaca ñaha ra tsi ñi —catyí ra.

⁶¹ Tacan tan catyí inga ra tsihin ra Jesús:

—Cuñi yu cunyicun yu tsi un, tata. Maa tyin cuhva na cuhun jihna yu cucahan yu tsihin nyivi vehe yu —catyi ra.

⁶² Tan ra Jesús catyi ra tsihin ra:

—Tumaa iin ra tahvi ñuhu tsihin indiqui, tatun nanyehe tsata ra, ña quita vaha yucun nu jahá tyiñu ra. Tan tacan cuvi iin ra nyicún tsi yu, tatun cuñi nyico ra tsa tsa nacoq ra, ña cuvi cuhva ra tsi ra cundaca ñaha Nyoo —catyi ra Jesús tsihin ra.

10

*Nu tava ra Jesús tyiñu tsi uñi xico utsi taahan ra
cua cahan tuhun Nyoo tsihin nyivi*

¹ Tsa yaha can tan nacatsi Jutu Mañi yo Jesús tsi inga uñi xico utsi ca ra naha. Tan jacuhun ra tsi ra naha tandih ñi ñuu, uvi uvi ra cuahan tsa iin nu cuahán ra nu cua cuhun ra Jesús. ² Tan catyi ra tsihin ra naha:

—Tumaa iin itu cahnu xaan, tacan cuvi tyiñu jahá yu. Maa tyin cumañi xaan musu. Yacan cuenda ndacan ndo tsi Nyoo na jaquitsi ca ra musu, tyin jatyyinee ra naha tsi ndo cahan ndo tuhun Nyoo tsihin nyivi. ³ Tan cuaahan ndo tan nyehe ndo tyin cua jacuhun yu tsi ndo tumaa mbee mahñu lobo tsa cuvi quiti xaan. Tyin lobo tuhvá ti tsahñi tsi mbee. Tan tacan tucu cua cuñi nyivi cahñi ñi tsi ndo. ⁴ Tan ña cua cuiso ndo ndi marali tan ndi nu yih xuhun ndo, tan ndi inga pari nditsan ndo ña cuiso ndo. Janumi ndo. Tun taahán ndo nyivi ityi cuahán ndo cuhva ndo nacumi tsi ñi tan ña cucuiñi ndo natuhun ndo tsihin ñi. ⁵ Cuhva tsa quihvi ndo tsitsi vehe iin nyivi, cahan ndo tsihin ñi. Tan catyi ndo, na coo tsa vaha aña ñi.

⁶ Tan tacan tucu tatun iyó nyívi vaha ñi vehe ican, cua ndoo tsa vaha can tsihin ñi. Maa tyin tatun yofñi ñi vaha añima, ña cua ndoo tsa vaha tsihin ñi. ⁷ Tan ndoo ndo juvin ñi maa vehe ican. Tatun tsahá ñi tsa catsi ndo, catsi ndo. Tatun tsahá ñi tsa coho ndo, coho ndo itsi. Tyin ra jahá tyiñu, iyó ndatu tsi ra tsa catsi ra tsa jahá canaa ra. Iin ñi maa vehe ican cuyucu ndo nda cuanda tsa tsaa quívi tsa cuhun ndo inga ñuu. ⁸ Tan nu tsaa ndo iin ñuu tan vaha cahan ñi tsihin ndo, catsi ndo tandihí tsa cuhva ñi catsi ndo. ⁹ Tan janduvaha ndo tsi ñi cuuhví ñuu ican. Tan catyi ndo tsihin ñi: “Tsa nyanaá yatyin Nyoo, ra cuñí quihví añima ndo cundaca ñaha ra tsi ndo.” ¹⁰ Maa tyin tatun tsaa ndo iin ñuu tan ña cuñí nyívi tyaa soho ñi tsa caahán ndo, quita ndo ityi cahnu. Tan catyi ndo tsihin ñi: ¹¹ “Nda cuanda nyaca ñuhu ñuu ndo tsa iñí tsaha ndi, tan cua naquisi ndi. Tyin cuñí tsi catyi tyin cuatyí ndo ndoó can siqui ndo. Tyin Nyoo nyanaá yatyin ra tsihin ndo tan ña tyaá soho ndo tsa caahán ra nácaa cuñí tsi tsa cundaca ñaha ra tsi ndo.” Tacan catyi ndo tsihin ñi —catyi ra Jesús tsihin ra tsa uñi xico utsi can naha ra.

¹² Tan catyi tucu ra tsihin ra naha:

—Quívi cua tatsi tuñi Nyoo tsi nyívi, yaha ca cuhva cua nyehe nyívi ñuu ican tundoho tan ñavin ca nyívi tsicoo tahan tsanaha ñuu Sodoma, —catyi ra Jesús.

Nyívi ña tyaá soho tuhun caahán ra Jesús cua nyehe ñi tundoho

(Mt. 11.20-24)

¹³ Tan catyi ra Jesús:

—¡Ndahvi nyoooho, nyivi ñuu Corazin! Tan ndahvi nyoooho nyivi ñuu Betsaida! Tyin nyehé ndo tsa iyo javahá yu, tan ña cuñí ndo nasamá ndo cuhva iyó ndo. Maa tyin nyivi ñuu Tiro tan ñuu Sidón nduve tsa nyehe ñi. Maa tyin tun tsatyin nyehe ñi tsa nyehé nyoooho vityin, numi xaan cua cunditsi ñi jahma tucuihaya iñi tan cunyecú ñi nu nyaa: tsa ndu uvi iñi ñi cuatyí ñi cuví can. ¹⁴ Yacan cuenda, nyoooho nyivi ñuu Corazin tsihin ñuu Betsaida, ñihi ca cua tatsi tuñi Nyoo tsi ndo tan ñavin ca nyivi ñuu Tiro tan nyivi ñuu Sidón can. ¹⁵ Tan nyoooho nyivi ñuu Capernaum, cuñí maa ndo tyin cundaa ndo nda cuanda andivi. Maa tyin cua nuu ndo nda cuanda nu yucú ndiyi anyaya, tyin ña tyaá yahvi ndo tuhun Nyoo —catyí ra Jesús.

¹⁶ Tan catyí ra tsihin tsa uñi xico utsi taahan ra can naha ra:

—Nyivi tsa tyaá soho tsa caahán nyoooho, tsa caahán yuhu tyaá soho ñi. Tan nyivi ña tyaá soho tsa caahán nyoooho, tsa caahán yuhu ña tyaá yahvi ñi. Tan ñi ña tyaá yahvi tsa caahán yuhu, tsa caahán ra tsa jaquitsi tsi yu, ña tyaá yahvi ñi —catyí ra Jesús tsihin ra naha.

Nu tsa nyico tsa uñi xico utsi ra tsa tsahan tsicahan tuhun Nyoo

¹⁷ Ihya cuví nu tsa nyico tsa uñi xico utsi ra tsa tsahan tsicahan tuhun Nyoo tsihin nyivi. Tan si xaan cuñí ra naha. Tan catyí ra naha tsihin ra Jesús:

—Jutu Mañi nyuhu, nda cuanda nu tatyí ña vaha tan tyaá yahvi nahnu tsa cahan ndi tsihin si un —catyí ra naha.

¹⁸ Tacan tan catyí ra Jesús tsihin ra naha:

—Tacan tyin yuhu nyehe yu andiví nu canacava nu ña vaha, nu nañí Satanás. Tumaa cañí iin tatsa savi, tacan canacava nu. ¹⁹ Tan maa yuhu, tsaha tunyee iñi tsi ndo tyin cuví cañi tahan ndo tsihin nu ña vaha. Tan cuví cuañi ndo tsata coo tan tujuhma, tan nduve tsa cua jaha ti naha ti tsi ndo. ²⁰ Maa tyin ña cusii xaan iñi ndo tyin cuví tava ndo tatyi ña vaha ican. Cusii ca iñi ndo tyin nyaá sivi ndo nu libru Nyoo nda gloria —catyí ra Jesús tsihin ra naha.

Nu jacahnú ra Jesús tsi Nyoo tsa sii cuñí ra tyin janahá Nyoo tsa vaha tsi nyivi ndaahvi
(Mt. 11.25-27; 13.16-17)

²¹ Tacan tan sii xaan cuñí ra Jesús jahá Tatyí Ii Nyoo, tan catyí ra:

—Jacahnú yu tsi un, Jutu yu, tyin yooho cuví ra ndacá ñaha andiví tan nu ñuhu ñayivi ihya. Tyin maa un janahá un tuhun maa un tsi nyivi ndaahvi ihya. Tan ña janahá un tsi un tsi ra tsitó tan ra nyityi. Tacan cuví tsi Jutu yu tyin tacan cuñí maa un —catyí ra Jesús.

²² Tan catyí ra Jesús tsihin tandihi ra naha:

—Tandihí maa tsaha Jutu yu tsi yu. Yoñi tsitó tsi yu, intuhun ñi maa Jutu yu tsitó tsi yu. Tan yoñi tsitó yóo ra cuví Sehe Nyoo, intuhun ñi maa Jutu ra tsitó tsi ra. Tan yoñi tsitó yóo ra cuví Nyoo Jutu, intuhun ñi Sehe ra tsitó tsi ra. Tan coto tucu nyivi tsa cuñí Sehe Nyoo jacoto ra tsi ñi —catyí ra Jesús.

²³ Tacan tan nanyehe ra nu nyecú ra tsicá tsihin ra. Tan caahán xeehe ra tsihin ra naha:

—Sii xaan cuñí nyoocho tan nyivi tsa iyó vityin tyin nyehé ndo tsa javahá yu. ²⁴ Tyin cuaha xaan

rey tan ra cuví ndusu yuhu Nyoo taḥan tsanaha, cuñi ra naha nyehe ra naha tsa nyehé nyoocho vityin. Maa tyin ña nyehe ra naha. Tan cuñi ra naha tyaa soho ra naha tsa tsiñi nyoocho vityin. Maa tyin ña tsiñi ra naha —catyí ra Jesús tsihin ra tsa tsicá tsihin ra.

Nu jacuahā ra Jesús tsi yo tyin taahán tsi jatyinyee yo tsi tandihi ñi maa nyivi

²⁵ Tacan tan tsaa iin ra maestro cuenda ley vehe ñuhu. Tan quitsahā tsicá tuhun ra tsi ra Jesús, tyin nducú cuhva ra tsi ra. Tan catyí ra:

—Maestro, ¿nácaa cua javaha yu tan cuhun yu coo yu ñayivi nyito tsa ña cua naa maa?

²⁶ Tacan tan nacahan ra Jesús, tan catyí ra tsihin ra:

—¿Náa catyí nu ley? ¿Nacaa catyí tsa cahvi un?

²⁷ Tacan tan nacahan ra maestro cuenda ley ican tan catyí ra:

—Catyí ley tyin cuñi yo tsi Nyoo tsihin taniñi añaima yo tan tsihin tandihi cuhva tsicá iñi yo, tan tsihin tandihi tunyee iñi tsa iyó tsi yo, tan tsihin tandihi tsa tsiñi tuñi tsa iyó tsi yo. Tan cuñi yo tsi nyivi tumaa tsa cuñi yo tsi maa yo. Tacan catyí ley —catyí ra ican.

²⁸ Tacan tan catyí ra Jesús tsihin ra:

—Nditsa tsa caahán un. Tacan javaha un tan coo un ñayivi nyito tsa ña cua naa maa —catyí ra Jesús.

²⁹ Maa tyin ra maestro cuenda ley can cuñi ra cuvi ra ra vaha nuu ra Jesús, tan catyí ra tsihin ra:

—¿Tan yóo nyivi cuñi yu? —catyí ra.

³⁰ Tacan tan nacahan ra Jesús, tan catyí ra:

—Iin ra quee ñuu Jerusalén cuahán ra nda ñuu Jericó. Tan taḥan ra tsi nu ñasuhu nahnu. Tan

suh_u nahnu tandi_{hi} maa tsa nyisó ra, nda cuanda jahma ra. Tan cañi_i nahnu tsi ra nda cuanda tsaqu_in taxin ña nahnu tsi ra. Tan naco_o ihñi nahnu tsi ra ican. ³¹ Tacan tan yaha_i iin ra cuví jutu ityi can. Maa tyin tsa nyehe_e ra tsi ra canyií ican, ndasava ñi yaha_i tsiyo ra. ³² Tacan tan yaha_i tucu iin ra yihí cuenda vehe ñuhu, ra cuví tata ra Leví. Maa tyin tsa nyehe_e ra tsi ra canyií ican, juvin ñi ndasava yaha_i ra. ³³ Tacan tucu iin ra Samaria yaha_i ra juvin ñi ityi can. Tan nyehe_e ra tsi ra canyií ican, tan quitsi_i tsa ndaahvi cuñi_i ra nyehé ra tsi ra. ³⁴ Tan natuhva_i ra nu canyií ra, tan quitsaha_i tyaá ra numeri tsi ra, tyih_i ra acetye tsihin vinu nu uhvi can. Tan tyaá ra iin jahma vita nu uhvi can. Yaha_i can tan janda_a ra tsi ra tsata burru jana ra, tan quih_in ra tsi ra, cuahán tsihin ra nu nyaá iin vehe. Tan jaha_i cuenda ra tsi ra. ³⁵ Tan tsa inga quiv_i tsa cuñi_i cuhun ra Samaria. Tan tava_i ra uvi taahan xuhun. Tan tsaha_i ra tsi ra jatsii vehe can. Tan catyí ra tsihin ra: “Jaha cuenda vaha tsi ra ihya. Tan cuhva_i tsa catsi ra. Tan jata un numeri tsi ra na nduvaha ñi ra. Tatun cuñi_i ca tsi xuhun, tyahvi maa yu tsi un tsa quitsi nyico yu”, catyí ra. Tacan tan cuahán ra —catyí ra Jesús.

³⁶ Nu ndih_i nacaty_i tuhun ra Jesús, tan nducu tuhun ra tsi ra maestro can, tan catyí ra:

—Vaha. ¿Tsa uñi taahan ra naha, tan ndáa ra cuví ra vaha iñi tsi ra ndaahvi tsa tsinya_a ndaha nu ñasuhu nahnu? —catyí ra Jesús.

³⁷ Tacan tan catyí ra maestro ican:

—Ra tsa cundaahvi_i iñi tsi ra —catyí ra.

Tacan tan catyí ra Jesús:

—Cuaahan tan ica tucu yooho tacan tsihin nyivi tsa nyehé tundoho —catyí ra.

Nu tsinyaa ra Jesús vehe ña Marta tsihin ña María

³⁸ Tan quihin ra Jesús ityi cuahán ra. Tan tsaá ra iin ñuu. Tan ican iyó iin ñaha tsa nañí Marta. Tan tsaá ra vehe ña. Tan tsahá ña quihvi ra tsitsi vehe ña. ³⁹ Tan ña Marta, iyó iin tahan ña nañí María. Tan ña María tsicunyaá ña yatyin ñi tsaha ra Jesús, tyin tyaa soho ña tsa caahán ra. ⁴⁰ Tan ña Marta cuaha xaan tyiñu javahá ña. Tan tsaá ña nu nyaá ra Jesús, tan catyí ña tsihin ra:

—Yooho tata. ¿A ña tsicá iñi yooho tyin ña tahan yu nacoó ña tsi intuhun ñi maa yu tsihin tyiñu ihya? Cahan tsihin ña na jatyinyee ña tsi yu —catyí ña tsihin ra.

⁴¹ Maa tyin ra Jesús catyí ra tsihin ña:

—Marta, Marta, tsicá xaan iñi un tan tuñu xaan cuñí un tsihin tyiñu can. ⁴² Maa tyin iyó intuhun tsa ñiñi ca taahán tsi caca iñi yo. Tan ña María ihya nacatsi ña tyiñu vaha ca javahá ña. Tan yoñi cuví quinyaa can tsi ña —catyí ra Jesús tsihin ña Marta.

11

Nu jacuahá ra Jesús tsi ra tsicá tsihin ra nácaa ndacan tahvi ra naha tsi Nyoo

(Mt. 6.9-15; 7.7-11)

¹ Cuví iin tsaha tsa tsicán tahvi ra Jesús. Tsa ndihí tsicán tahvi ra, tan catyí iin ra tsicá tsihin ra:

—Janaha nácaa ndacan tahvi ndi tsi Nyoo, tu-maa janahá ra Juan tsi ra tsicá tsihin ra —catyí ra.

² Tacan tan catyí ra Jesús tsihin ra:

—Cua cuhva yu cuhva tsi ndo nácaa. Tyehen ndacan tahvi ndo, catyi ndo:

Jutu Mañi ndi, yoocho tsa nyaá un gloria. Jacahnú xaan ndi tsi un.

Na quitsi quivi tsa ndaca ñaha un nu ñuhu ñayivi ihya.

Na javaha nyivi nu ñuhu ñayivi ihya tandihi cuhva cuñi maa un, tumaa cuhva cuvi nda gloria.

³ Cuhva tsa catsi ndi tan yaha ndi iin iin quivi.

⁴ Jaha tucahnu iñi tsi ndi tsa cuenda cuaty ndi. Tyin nyuhu jahá tucu maa ndi tucahnu iñi tsi nyivi xaan iñi tsi ndi.

Ña cua cuhva un tsa nducu cuhva nu ña vaha tsi ndi. Tan jacacu tsi ndi tan ña cua cunyeen nu ña vaha tsihin ndi.

Tacan ndacan tahvi ndo —catyi ra Jesús.

⁵ Tan catyi tucu ra:

—Na catyi yo tyin iin nyoocho iyó iin ra vaha iñi tsi ndo, tan tsaá ra vehe ndo tsa tsa cuaa tan catyi ra tsihin ndo: “Jaha tumañi iñi tsi, xin. Cuhva nuu uñi taahán paan tsi yu. ⁶ Tyin iin ra vaha iñi tsi yu ndi tsaá ra yuvehe yu. Tan cañi xaan quee ra. Tan nduve tsa cuhva yu catsi ra.” ⁷ Tan nyoocho cua nacahan ndo tan catyi ndo tsihin ra: “Ña jatyañu un tsi yu, xin. Tyin ndasí yuvehe yu. Tan ndi quixí yu tsihin sehe yu. Tan ña cuvi nduvita yu tan cuhva yu tsa cuhva yu tsi un tsa vityin.” Tacan cua catyi ndo tsihin ra. ⁸ Tan catyi yu tsihin ndo. Vasu ra vaha iñi ndo cuvi tsi ra can, ña cua nduvita ndo tan cuhva ndo tsa nducú ra tsa numi ñi. Maa tyin tatun caahán yuhu ra tsihin ndo, jandatsan ra yuvehe ndo tan caná tsaa ra tsi ndo tsa ña cua cuvi cusu ndo, tacan tan cua nduvita ndo tan cuhva

ndo tsa nducú ra. Tacan tan ña cua jatyañu ca ra tsi ndo. ⁹Tan tacan tucu nyoocho tsihin Nyoo, ndacan ndo tsi ra. Tan cua cuhva ra tsi ndo. Nanducu ndo tan cua ñihi ndo. Jandatsan ndo yuvehe tan cua nuña. ¹⁰Tyin tatun ndacan ndo, cua ñihi ndo. Tatun nanducu ndo, cua nañihi ndo. Tatun cua jandatsan ndo yuvehe, cua nuña tsi.

¹¹'Tacan tucu nyoocho tsa iyó sehe. Tuhvá ndo tsahá tsa vaha tsi sehe ndo. Ña tuhvá ndo cuhva iin yuu itsi tun tsicán tsi paan. Tan ña tuhvá ndo cuhva iin coo itsi tun tsicán tsi tyaca. ¹²Tan ña tuhvá ndo cuhva tujuhma tsi sehe ndo tatun tsicán tsi ndivi catsi tsi. ¹³Nyoocho quiñi iyó ndo, maa tyin tsitó ndo nácaa cuhva ndo tsa vaha tsi sehe ndo. Tan vihi ca maa Jutu Mañi yo, ra nyaá gloria, cuhva ra Tatyí li ra cunyaa aña ndo tun ndacan ndo tsi ra.

Nu xaan iñi tsi ra Jesús catyí nahnu tyin tsihin tunyee iñi nu ña vaha javahá ra tsa iyo (Mt. 12.22-30; Mr. 3.20-27)

¹⁴Ra Jesús tava ra tatyí ña vaha tsa janduñihi tsi iin rayi. Tsa quita nu tatyí can tsi ra can, cuvi nacahan ra. Tacan tan iyo xaan cuñi nyivi tsa nyehe ñi tsa cuvi. ¹⁵Tan yihí ñi catyí ñi:

—Ra ihya, tava ra tatyí ña vaha tsihin tunyee iñi nu Beelzebú nu cuvi ityi nuu tsihin tandihi tatyí ña vaha —catyí ñi.

¹⁶Tan yihí ñi cuñi ñi nducu cuhva ñi tsi ra, tan tsicán ñi tsi ra Jesús na javaha ra iin tsa iyo tsa quita andivi. ¹⁷Maa tyin ra Jesús tsitó ra tsa tsicá iñi ñi. Tan catyí ra tsihin ñi:

—Tatun ra ndacá ñaha naha ra tan natahvi ra naha, tan cañi tahan ra naha, tacan tan cundihí tyiñu tsa ndacá ñaha ra naha. Tan tatun iin vehe tan natahvi nyívi tsihin tahan ñi, tacan tan cua tiví nu yucú ñi. ¹⁸ Tan tacan tucu nu ña vaha, tatun natahvi nahnu, cua cundihí tunyee iñi tsa iyó tsi nahnu. Caahán yu tyehen tsihin ndo, tyin catyí ndo tyin tsihin tunyee iñi nu Beelzebú tavá yu tsi nu tatyí ña vaha nahnu. ¹⁹ Maa tyin tun tsatyin tavá yu tsi nahnu tumaa cuhva catyí ndo, ndāca tuhun ndo tsi ra nyecú tsihin ndo yóo tsahá tunyee iñi tsi ra naha tan tavá ra naha tsi nahnu. Maa ra naha cua cahan tsa nditsa tsihin ndo tyin nyooho soho xaan tsicá iñi ndo. ²⁰ Maa tyin catyí yu tsihin ndo tyin yuhu tavá yu tatyí ña vaha tsihin tunyee iñi Nyoo. Tan cuñí tsi catyí yacan tyin nditsa tyin Nyoo, ra taahán tsi cundaca ñaha tsi nyívi, tsa tsaa ra nu yucú ndo.

Nu jacuahā ra Jesús tyin ñihi ca tunyee iñi Nyoo tan ñavin ca tunyee iñi nu ña vaha

²¹ Tatun iin ra tan iyó xaan tunyee iñi tsi ra tan nyisó ra mityi ra, tan jahá cuenda ra vehe ra, nu yihí xeehe vaha ndaha tyiñu ra tsitsi vehe ra, tsa ña cua cuví quinyaa ñasuhu. ²² Maa tyin tatun quitsi iin ra tsa cuaha ca tunyee iñi iyó, tan cañi tahan ra tsihin ra, tan cuví jaha canaa ra tsi ra, tacan tan quinyaa ra ndaha tyiñu ra tan natsatsa ra tsi ra vaha iñi tsi ra.

²³ Nyívi ña jahá tyiñu tsihin yu, jatíví ñi tyiñu jahá yu. Tan tatun ña caahán ñi tuhun Nyoo tsihin nyívi, tyin cunyicun ñi tsi yu; cuñí tsi catyí tsi tyin ña tsahá ñi tsa cunyicun nyívi tsi yu.

Nu jacuahā ra Jesús tsi yo nácaa quihvi tatyí ña vaha tsi yo inga tsaha tatun naa iñi yo

²⁴ 'Tatun iin nu tatyí ña vaha quita nu tsi iin nyivi, tsicá nuu nu iin ñuhu ityi, nanducú nu nu quitatu nu. Maa tyin ña nañihí maa nu nu quitatu nu, tacan tan tsicá iñi nu: "Cunuhu nyico yu nda vehe yu nu quee yu." ²⁵ Tacan tan tsaa nyico nu añaima nu quee nu. Tan nyehé nu tyin ndi xaan tan si xaan caá. ²⁶ Tacan tan cua quihin nu utsa taahan ca tatyí ña vaha tsa yaha ca caquiñi tan ñavin ca maa nu. Tacan tan iin caa ñi cua quihvi tandihí nahnu añaima ñi ican. Yacan cuenda yaha ca caquiñi ñi tan ñavin ca tsa jihna ñi —catyí ra Jesús.

Nyivi tsa nditsa iyó vaha ñi nu ñuhu ñayivi

²⁷ Tsitsi tsa ndi caahán ca ra Jesús yacan, tan cana tsaa iin ñaha tsa nyii mahñu nyivi ican. Tan catyí ña:

—¡Náa tsa si cuñi ñaha tsa jacacu tsi un, ñaha tsa jacaxin tsi un! —catyí ña.

²⁸ Maa tyin ra Jesús catyí ra:

—Si xaan ca cuñi nyivi tsa tsiñi tuhun caahán Nyoo tan tyaá yahvi ñi itsi —catyí ra.

Nyivi ña vaha, maa ñi maa tsa iyo cuñi ñi nyehe ñi

(Mt. 12.38-42; Mr. 8.12)

²⁹ Tacan tan tsaa ca nyivi nu nyii ra Jesús. Tan catyí ra tsihin ñi:

—Nyivi tsa iyó vityin quiñi xaan iyó ñi. Tan nyiyo xaan iñi ñi. Cuñi ñi nyehe jihna ñi tsa iyo. Maa tyin intuhun ñi tsa iyo cua nyehe ñi, yacan cuví tsa javahā Nyoo tsihin ra Jonás, ra cuví ndusu

yuhu Nyoo tsanaha. Nduve inga ca tsa iyo cua nyehe ñi. ³⁰ Tumaa tsa janahā ra Jonás tsi nyivi ñuu Nínive taḥan tsanaha tyin ii Nyoo, tacan tucu yuhu, Rayi tsa quee nda gloria, janahá yu tsi nyivi tsa iyó vityin tyin ii Nyoo. ³¹ Quivi cua tatsi tuñi Nyoo tsi nyivi, cua nandoto ñaha cuvi reina ityi sur taḥan tsanaha, tan cua catyi ña tyin cuhun ndo anyaya tyin maa ña vasu cañi ñuu ña, maa tyin quitsi ña, quitsi tyaa soho ña tsa tsiñi tuñi tsa caḥan ra Salomón. Tan vityin cahnu ca cuvi ra nyaá tsihin ndo tan ñavin ca ra Salomón. ³² Tan quivi cua cutuñi tandihi nyivi, cua nandoto nyivi tsicoo ñuu Nínive taḥan tsanaha, tan cua catyi ñi tyin nyooḥo nyivi tsa iyó vityin cuhun ndo anyaya, tyin nyivi Nínive ican, nasama ñi cuhva iyó ñi quivi caḥan ra Jonás tuhun Nyoo tsihin ñi. Tan vityin cahnu ca cuvi ra nyaá tsihin ndo tan ñavin ca ra Jonás.

*Nu janahā ra Jesús tyin na jaha yo cuenda aña
yo na coo tsa nditsin jahá Nyoo
(Mt. 5.15; 6.22-23)*

³³ Ndi intuhun ndo tan ña tuhvá ndo tyaa ñuhu tyuma tan tyihí xeehe ndo can, a tinyií ndo can tsitsi iin caja. Tyin ñuhu can taahán tsi cunyií can nu sucun. Tyin tatun quihvi nyivi tsitsi vehe ndo, nditsin. ³⁴ Tinuu yo, iin ñuhu nditsin cuvi tsi tsa cuenda cuñu ñuhu yo. Tan tacan tucu tsa nditsin Nyoo, tsa cuenda aña yo. Tatun iyó tsa nditsin jahá Nyoo aña yo, vaha nyivi cuvi yo. Tatun nduve tsa nditsin jahá Nyoo aña yo, tumaa iin ra cuaa cuvi yo, ña cuvi nyehe yo ityi vaha tsa cuahán nu nyaá Nyoo. ³⁵ Yacan cuenda jaha ndo cuenda

tsi ndo, na coo tsa nditsin jahá Nyoo añima ndo, tan ña coo tsa naa. ³⁶ Tatun tsitú añima ndo tsihin tsa nditsin jahá Nyoo, nduve ca maa tsa naa iyó tsihin ndo, tyin jandunditsín tsi tanií cahnu ndo. Tumaa tsa nyaá iin ñuhu tyuma jandunditsín tsi tanií cahnu ndo cuví can —catyí ra Jesús.

Nu cuxaḡn ra Jesús tsihin ra maestro cuenda ley vehe ñuhu naha ra tan tsihin ra fariseo naha ra (Mt. 23.1-36; Mr. 12.38-40; Lc. 20.45-47)

³⁷ Tsa ndihí caḡn ra Jesús tsihin nyívi, iin ra fariseo, catyí ra tsihin ra, na cuhun ra cucatsi ra yuvehe ra. Tan tsaḡ ra Jesús vehe ra. Tan quihvi ra tsicunyaḡ ra nu mesa.

³⁸ Tacan tan ra fariseo ican iyo cuñí ra tyin ña nacatyḡ ra Jesús ndaha ra tsa ndi cumañi ca catsi ra, tumaa cuhva iyó maa ra naha. ³⁹ Maa tyin Jutu Mañi yo Jesús catyí ra tsihin ra:

—Nyooḡo, ra cuví fariseo, tumaa tsa tsata ñi vasu tan coho nacuhvá ndo. Maa tyin ityi tsitsi, quiñi xaan caá can tyin ña nacatyá ndo can. Tacan cuví nyooḡo. Tyin cuñí nyívi tyin vaha ndo. Maa tyin xeehe ñi suhú ndo tan javahá ndo tsa ña vaha.

⁴⁰ Ndava xaan iñi ndo. ¿A ña tsitó ndo tyin ra tsa javahḡ ityi tsata ndo, juvin ñi maa ra javahḡ ityi tsitsi ndo? ⁴¹ Taahán tsi javaha ndo tumañi iñi tsi nyívi ndaahvi, tan jatyinyee ndo tsi ñi tsihin tanií añima ndo. Javaha ndo tsa vaha tsihin ñi, tacan tan nduvaha tucu ityi tsitsi ndo.

⁴² ¡Ndahvi nyooḡo ra fariseo! tyin nyooḡo, cahví ndo ndaha menta tan ndaha lura tan náa ndihí ca yucu tsa tsatsí ndo, tan tavá ndo intuhun tsi tsa iin iin utsi tan tsahá ndo tsi Nyoo, maa tyin ña tyaa

yahvi ndo tsa vaha tsa cuñí Nyoo javaha yo tan tsa cuñí yo tsi ra. Taahán tsi tsa cuñí vaha ca ndo tsi Nyoo tan javaha ndo cuhva cuñí ra, tan ña jandihi ndo tsa cuhva ndo diezmo can. ⁴³ ¡Ndahvi nyoo ho tsa cuví ndo fariseo! tyin cuñí ndo cunyaa ndo nu tyayu vaha tsitsi vehe ñuhu. Tan cuñí ndo tsa tyaa yahvi nyívi tsi ndo nuyahvi. ⁴⁴ ¡Ndahvi nyoo ho ra maestro cuenda ley, tan nyoo ho ra fariseo! Vaha xaan jahá ndo tsi ndo tan ña nditsa ndo. Cuví ndo tumaa iin ñaña ndiyi tsa ña nditsin ca canyií. Tyin tsañi nyívi tsata can tan ña tsitó ñi tyin nyii ndiyi tsitsi ñaña ican. Tyin nduve ca cuhva canyií nu nyii ndiyi ican. Cuñí maa nyívi tyin vaha ndo, tan ña tsitó ñi tyin ña vaha añima ndo —catyí ra Jesús.

⁴⁵ Tacan tan nacahan iin ra maestro cuenda ley vehe ñuhu, tan catyí ra:

—Maestro, tsa catyí un tacan, caahán nyaa ndihi un tsi ndi —catyí ra.

⁴⁶ Tacan tan catyí ra Jesús tsihin ra naha:

—¡Ndahvi tucu nyoo ho ra maestro cuenda ley vehe ñuhu! tyin jacuahá ca ndo ley tsa tsaha Nyoo tahañ tsanaha. Tan ña taahán tsi. Tan yoñi ndoyó carga can, tan jañiñi ca ndo na javaha nyívi can, tan maa ndo ndi luxu ña jatyinyeé ndo tsi ñi.

⁴⁷ ¡Ndahvi nyoo ho! tyin janduvahá vaha ndo ñaña nu ñuhú yiqui ra cuví ndusu yuhu Nyoo tsa tsahñi ra cuví tsii tsaahnu ndo tahañ tsanaha. ⁴⁸ Yacan cuñí tsi catyí tyin ndoó ndo vaha tsa javaha tsii tsaahnu ndo naha ra. Tyin tsii tsaahnu ndo tsahñi ra naha tsi ra cuví ndusu yuhu Nyoo. Tan nyoo ho janduvahá ca ndo ñaña ra naha. ⁴⁹ Yacan cuenda catyi Nyoo tahañ tsanaha tsihin tsa tsiñi tuñi ra tyin cua jaquitsi ra tsi ra cua cuvi ndusu yuhu ra

tan ra caca tyiñu ra nu iyó ndo. Tan cua cahñi ndo juhva ra naha tan inga ra cua jacunu ndo tsi ra naha. ⁵⁰ Tan nditsa tyin tacan javahá ndo. Nyoo cua tatsi tuñi ra tsi ndo tan tsi nyivi iyó vityin tsa cuenda tandihí ra cuví ndusu yuhu ra tsa tsahñi tsii tsaahnu ndo naha ra nda cuanda tsinu ñuhu ñayivi tan nda cuanda vityin. ⁵¹ Nda cuanda niñi ra Abel tsa tsati tsa tsahñi ra Caín yañi ra tsi ra, tan nda cuanda niñi ra Zacarías tsa tsahñi nyivi tsitsi vehe ñuhu yatyin nu nyaá altar. Yacan cuenda catyí Nyoo tyin cua tatsi tuñi ra tsi nyivi tsa iyó vityin tsa catyí cuatyí nyivi tsa tsicoq tahan tsanaha. ⁵² ¡Ndahvi nyoocho ra maestro cuenda ley vehe ñuhu! tyin tumaa tsa tyihí xeehe ndo ndaha tucu yuvehe nu quihví nyivi ityi nu nyaá Nyoo. Tan ndi maa ndo ña quihví ndo nu nyaá Nyoo. Tan ndi ña tsahá ndo tsa quihví inga nyivi tsa cuñi quihví —catyí ra Jesús.

⁵³ Ndihi cahan ra Jesús tacan. Tan ra maestro cuenda ley vehe ñuhu naha ra tsihin ra fariseo naha ra, nduxaan xaan ra naha tan quitsaha nducú tuhun xaan ra naha tsi ra Jesús. ⁵⁴ Tyin cuñi ra naha tsa cahan ra Jesús iin tsa ña vaha, tyin tacan tan cuví tyaa ra naha cuatyí tsi ra.

12

Nu jacuahá ra Jesús tyin ña cuví tyihi xeehe yo cuatyí yo

¹ Cuenda mil nyivi ndu iin nda cuanda catyihí tahan ña ñi, tyin cuaha xaan ñi. Tacan tan ra Jesús cahan jihna ra tsihin ra tsicá tsihin ra:

—Jaha ndo cuenda tsi ndo tsihin ra fariseo naha ra tsihin cuatyí ra tsa cuví tumaa yutsan iya. Tyin ndaá paan jahá yutsan iya, tan tacan cuví cuatyí ra can naha ra. Tyin jahá ra naha tyin vaha ra. Maa tyin ña cuví tyihi xeehe ra naha cuatyí ra naha. ² Tyin nduve iin tsa yihí xeehe tan cuñí yo, tyin ña cua quituvi. Tan nduve tsa xeehe tan cuñí yo, tyin ña cua coto nyívi. ³ Yacan cuenda, náa ndihi tsa caahán ndo nu xeehe, cua quita tsi nu nditsin. Tan náa ndihi tsa caahán ndo tsitsi vehe ndo, cua cana tsaa nyívi jiñi vehe.

*¿Yóo taahán tsi nayuhvi yo, a tsi nyívi a tsi Nyoo?
(Mt. 10.28-31)*

⁴ Tan catyí yu tsihin ndo tsa cuví ndo ra vaha iñi tsi yu, tyin ña nayuhvi ndo tsi nu tsahñi cuñu ñuhu yo. Tyin yaha can tan nduve ca tsa cuví javaha nu tsi yo. ⁵ Maa tyin cua catyí yu tsihin ndo yóo taahán tsi nayuhvi ndo. Nayuhvi ndo tan tyaa yahvi ndo tsi Nyoo, ra cuví quinyaa tsa nyito ndo. Tan yaha yacan tan cuví tyihi ra tsi ndo anyaya.

⁶ Saa, ña yahvi nyaá ti. Cuví jata yo uhun taahan ti tsihin uvi ñi xuhun. Vasu ndi maa nyihi ñi ti, Nyoo ña naá iñi ra tsi ndi intuhun ti. ⁷ Tan nyoocho, nyaá yahvi ca ndo nu Nyoo tan ñavin ca tsa cuaha saa can, tan nda cuanda ixi jiñi ndo tan tsitó Nyoo najava taahan tsi iyó tyin tsa nacahvi ra intuhun intuhun tsi. Yacan cuenda ña nayuhvi ndo.

*Na ña nayuhvi yo cahan yo tuhun ra Jesucristo
tsihin nyívi*

(Mt. 10.32-33; 12.32; 10.19-20)

⁸ Catyí yu tsihin ndo tyin tandihi nyoocho tsa janahá ndo tsi nyívi tyin tsinú iñi ndo tsi yu, tacan

tucu maa yu, cua cahan yu tuhun ndo nuu ángel Nyoo nda gloria. Tyin yuhu Rayi nda gloria quee yu. ⁹ Maa tyin nyoocho tsa janahá ndo tyin ña tsinú iñi ndo tsi yu, tacan tucu maa yu, cua cahan yu nuu ángel Nyoo tyin ñavin nyivi cuenda yu cuví ndo. ¹⁰ Tan vasu cuxaan nyivi tsi yuhu, Rayi tsa quee nda gloria, Nyoo cua jaha ra tucahnu iñi tsi ñi. Maa tyin nyivi caahán tsa ndavaha ñi siqui Tatyí li Nyoo ña cua coo tucahnu iñi tsi ñi cuenda yacan.

¹¹ Quivi tsa cua cundaca nyivi tsi ndo tsitsi vehe ñuhu, nu juez, a nuu ra cumí tyiñu naha ra, ña caca iñi ndo náa tuhun cua nacahan ndo. ¹² Tyin cuhva tsa cua nacahan ndo, cua cuhva maa Tatyí li Nyoo náa tuhun taahán tsi cahan ndo —catyí ra Jesús.

Nu tsaha cuenda ra Jesús tyin ña taahán tsi nyiyo iñiyo tsa cuca

¹³ Iin ra tsa nyii tsihin nyivi cuaha tsa ndu iin nu nyii ra Jesús, catyí ra tsihin ra Jesús:

—Maestro, cahan tsihin ra yañi yu na natahvi ra tsa tsii jutu ndi, cuhva ra tsa taahán tsi tsi yu.

¹⁴ Tacan tan catyí ra Jesús tsihin ra:

—¿Tsaa, yoo tsaha tsi yu tsa cuví yu juez tan natahvi yu ndaha tyiñu ndo? —catyí ra.

¹⁵ Tan yahá can tan catyí ra nuu nyivi cuaha can:

—Jaha xaan ndo cuenda tan ña nyiyo xaan iñi ndo tyin ña tsiñi ñuhu tsa coo cuaha ndaha tyiñu yo tan coonyito yo.

¹⁶ Tacan tan tsaha cuenda ra Jesús iin cuhva tsi tandihí nyivi, tan catyí ra:

—Tsicoo iin ra cuca. Tan cuaha xaan ndaha tyiñu ñihí ra nu jahá tyiñu ra. ¹⁷ Tacan tan tsicá

iñi ra: “¿Nacaa javaha yu? Nduve nu quihí tandihí ndaha tyiñu ihya.” ¹⁸ Tan catyí ra: “Tsa tsitó yu nácaa cua javaha yu. Cua caní yu tandihí yaca nyihí yu, tan cua javaha yu tsa nahnu ca, tan natyihí yu tandihí ndaha tyiñu can tsihin tandihí ca tsa iyó tsi yu tsitsi can. ¹⁹ Tacan tan cua catyí yu tsihin yu: Cuaha xaan ndaha tyiñu naquihín vaha un, tan vityin cuahán maa cuiya, quitatu, catsi vaha, cōho vaha, tan cusí iñi.” ²⁰ Tan Nyoo catyí ra tsihin ra can: “Ra soho, tsacuaa vityin cua cúu un, tan tsa naquihín vaha un ¿Yóo tsii cua cuví yacan?” catyí Nyoo tsihin ra can. ²¹ Tacan cuví iin ra tsa jatacá tan tyihí vaha ra tsa cuca tsi ra; maa tyin nuu Nyoo ra ndaahví cuví ra —catyí ra Jesús.

Ña caca xaan iñi yo náa ndihí tsa tsiñí ñuhu tsi yo (Mt. 6.25-34)

²² Tacan tan catyí ra Jesús tsihin ra tsicá tsihin ra:

—Tacan ñi catyí yu tsihin ndo, ña caca xaan iñi ndo nácaa ñihi ndo tsa catsi ndo, tan ndi jahma tsa cunditsi ndo. ²³ Tyin nyaá yahví ca ñayiví tsa nyito yo tan ñavin ca tsa catsi yo. Tan nyaá yahví ca cuñu ñuhu yo tan ñavin ca tsa nditsí yo. ²⁴ Jaha ndo cuenda saa tyin ña jahá tyiñu ti. Tan ndi ña tyihí vaha ti tsa catsi ti. Maa tyin tsatsí ti, tyin Nyoo tsahá ra tsa catsi ti. Tan nuu Nyoo nyaá yahví ca nyoocho tan ñavin ca saa. ²⁵ Tan vasu ndi maa tsicá xaan iñi ndo maa tyin ña cuví jandusucun ndo luxu ca tsi ndo. ²⁶ Tatun ndi luxu can tan ña cuví jahá ndo, ¿nacuenta tsa tsicá xaan iñi ndo tandihí ca tsa tsiñí ñuhu tsi ndo?

²⁷ Jaha ndo cuenda nácaa iyó yutun ita tyin ña jahá tyiñu tun tan ndi ña taví tun yuhva. Maa

tyin catyí yu tsihin ndo tyin ndi ra rey Salomón tsihin tandihí tsa cuca ra tan ña sñ caá tsa tsinditsí ra tumaa tsa jacunditsí Nyoo tsi yutun ita ican. ²⁸ Tatun tacan ñi jacunditsí Nyoo tsi yutun ita tsa iyó nu tsiquí vityin, tan ityaan cua cayu tun tsitsi horno, tan nyooho cahnu ca cuví ndo nuu ra tan ñavin ca yutun ita. ¿A ña cua cuhva ra tsa cunditsi ndo? Maa tyin maa ndo ña tsinú vaha iñi ndo tsi ra. ²⁹ Ña caca xaan iñi ndo tuhun tsa catsi ndo tan tsa coho ndo. ³⁰ Tyin nyivi tsa ña tsinú iñi tsi Nyoo tsicá iñi ñi yacan. Maa tyin Jutu yo Nyoo tsitó ra náa tsiñí ñuhu tsi ndo. ³¹ Vaha ca tsa nducu ndo nácaa cuhva cuenda ndo tsi ndo tsi Nyoo na cundaca ñaha ra tsi ndo. Tan cuhva tucu ra tandihí tsa tsiñí ñuhu tsi ndo.

Tsa vaha tsa iyó gloria
(Mt. 6.19-21)

³² Ña nayuhvi nyooho, mbee jana yu. Ña cuaha ndo maa tyin Jutu yo Nyoo cuñí ra tsi ndo. Yacan cuenda cua cuhva ra quihvi ndo nu ndacá ñaha ra. ³³ Xico ndo tsa iyó tsi ndo. Tan jatyinyee ndo tsi nyivi ndaahvi. Tatun javahá ndo tacan, jacayá ndo tsa vaha nuu nyaá Nyoo. Tyin nuu nyaá Nyoo ña ndihí tsa vaha. Tyin yoñi yóo jativí can ndacan, ndi nu ñasuhu, tan ndi quití. ³⁴ Tyin nuu iyó tsa cuca ndo, ican cuví nu nyita iñi ndo. Tan ndacan cua coo ndihí añima ndo —catyí ra.

Nu jacuahá ra Jesús tsi yo nácaa cuatu yo tsi ra quivi quitsi ra inga tsaha

³⁵ Cuatu vaha ndo tsi yu tsihin ñuhu nditsin Nyoo quivi quitsi yu inga tsaha. ³⁶ Tan cuvi ndo tumaa musu tsa ndatú tsi tsitoho ra ñaha náa

cuhva quitsi ra tsa cuahán ra iin vico tindaha. Tan ndatú ra naha, tyin tacan tan numi ñi cua nuña ra naha yuvehe cuhva tsa jandatsan tsitoho ra naha tsa tsaa ra. ³⁷⁻³⁸ Tan sii xaan cua cuñi ra naha nyehe ra naha tsi ra cuví tsitoho ra naha. Tyin ndatú ra naha tsi ra nda cuanda tsa tsaa ra, vasu ñuu taxin, vasu tsa naha ca. Tan cua tyaa ra tsi ra musu ican naha ra yuhu mesa tan cuhva ra tsa catsi ra naha. Tacan tan sii xaan cua cuñi musu can naha ra. ³⁹ Tan coto ndo tyin tatun tsitoho vehe, tan tsitó ra náa cuhva cua quihvi ñasuhu vehe ra, cua jaha ra cuenda vehe ra. Tan ña cua cuhva ra quihvi nu ñasuhu ican tsitsi vehe ra. ⁴⁰ Tan tacan cuví tucu nyooho, cuatu ndo. Tyin yuhu, Rayii tsa quee nda gloria, sana iñi ndo tan cua quitsi yu —catyí ra Jesús.

Musu vaha tan musu ña vaha
(Mt. 24.45-51)

⁴¹ Tacan tan quitsahā nducú tuhun ra Pedro tsi ra Jesús:

—Jutu Mañi yu, ¿yóo cuenda caahan un yacan? ¿A tsa cuenda maa ñi maa ndi, a tsa cuenda tandihi nyivi?

⁴² Tacan tan nacahan ra Jesús, tan catyí ra tsihin ra:

—Musu tsa tyaá soho tsa caahán tsitoho ra, juvin ra cuví musu vaha. Tyin jahá cuenda ra vehe tsitoho ra. Tan vaha cuhva tsahá ra tsa catsi tandihi ca musu ican. ⁴³ Tan sii xaan cuñi musu ican tatun cuhva tsa jahá tyiñu ra, tan cua tsaa tsitoho ra. Tyin tyaá yahvi ra tandihi tsa taahán tsi ica ra. ⁴⁴ Tan catyí yu tsihin ndo tyin tsa nditsa. Tyin tsitoho ra cua nacuhva ra tandihi tsa cumí ra, cua quihí ndaha ra. Tyin vaha tyaá yahvi ra

tsihin tyiñu jahá ra. ⁴⁵ Maa tyin tatun tsicá iñi musu ican tyin naha xaan cuahán tsitoho ra, tan quitsahá cañi ra tsi inga musu tsa cutahán tsihin ra tan ñiñaha jahá tyiñu ican, tan ña cuñi ra jaha tyiñu ra. Tyiñu tsatsi ñi tan tyiñu tsiñi nyixi ñi iyó ra. ⁴⁶ Tacan tan sana iñi ra cua tsaa tsitoho ra quivi tsa ña ndatú ra tsi ra, tan cuhva tsa ña tsitó ra. Tacan tan ñihi xaan cua tatsi tuñi tsitoho ra tsi ra, tumaa tuhvá maa ra icá tsihin nyivi tsa ña tsiñú iñi tsa caahán ra.

⁴⁷ Tan iin musu tsa tsitó nácaa iyó tsitoho ra tan ña javahá ra cuhva cuñi tsitoho ra, cuaha xaan tundoho cua nyehe ra. ⁴⁸ Maa tyin tatun iin musu tsa ña tsitó, tan javaha ra tsa ña vaha, cua tatsi tuñi tsitoho ra tsi ra, maa tyin luxu ñi. Tyin ña tsitó ra can, tan javahá ra. Tatun iin musu tan cuaha tsa tsahá tsitoho ra tsi ra, cuaha tyiñu taahán tsi nacuhva cuenda ra tsi tsitoho ra. Tan ra tsa cuaha xaan yihí ndaha can, cuaha xaan tyiñu taahán tsi nacuhva cuenda ra tsi tsitoho ra.

Nu cahan ra Jesús tyin tsacatyí ra cua cañi tahan nyivi tsihin nyivi ñi

(Mt. 10.34-36)

⁴⁹ Tumaa tsa jatahán yu ñuhu nu ñuhu ñayivi, tacan cuví tyiñu vatsi yu. ¡Tan cuñi xaan yu tsa nacayu catyin ña ñuhu ihya! ⁵⁰ Tyin nyaá cua yaha yu iin tundoho cahnu, tan cahnu xaan tundoho iyó yu nda cuanda ndihi tyiñu jahá yu. ⁵¹ Cuñi maa ndo tyin tsa vatsi cuhva yu tsa taxin coo ndo nu ñuhu ñayivi ihya. Maa tyin yuhu vatsi yu tyin jasiin yu tsi ndo. ⁵² Tyin tsa vityin tan ityi nuu ca, uhun taahan nyivi iin vehe ñi cua cusiin ñi. Uñi taahan ñi cua cañi tahan tsihin uvi taahan ñi. Tan uvi taahan

ñi cua cañi tahan tsihin uñi taahan ñi. ⁵³ Tan ra iyó sehe, cua cañi tahan ra tsihin sehe ra. Tan ra cuví sehe can cua cañi tahan ra tsihin jutu ra. Tan ñaha iyó sehe sihi cua cañi tahan ña tsihin sehe sihi ña. Tan ña cuví sehe sihi can cua cañi tahan ña tsihin sihi ña. Tan ñaha cuví tyiso cua cañi tahan ña tsihin tsanu ña. Tan ñaha cuví tsanu can cua cañi tahan ña tsihin tyiso ña —catyí ra Jesús.

Nu cahan ra Jesús tsihin nyivi tyin ña nacotó ñi tyin tsa tsaq Sehe Nyoo nu yucú ñi

(Mt. 16.1-4; Mr. 8.11-13)

⁵⁴ Catyí tucu ra Jesús tsihin nyivi cuaha tsa yucú ican:

—Tatun nyehé ndo tyin tsa yihí vico, catyí ndo tyin tsa cua cuun savi. Tan tacan tsa cuii cuví.

⁵⁵ Tatun tsa nyehé ndo tyin tsa yihí tatyí quee ityi ndutya ñuhu, catyí ndo tyin tsa cua ndu ihñi. Tan quita tsa cuii nu caahán ndo. ⁵⁶ Nyoocho jahá ndo tsa tsitó xaan ndo, tan nacotó ndo tandihí tsa cuví andivi, tan tandihí tsa cuví nu ñuhu ñayivi ihya. Tan ¿nacuenda tsa ña nacotó ndo náa tyembu iyó ndo vityin?

Nducu yo cuhva nácaa coo vaha yo tsihin ra tsicán cuatyí tsaha yo coto cuhun yo anyaya

(Mt. 5.25-26)

⁵⁷ ¿Nacuenda ña jahá ndo cuenda, ndáa tsa vaha tan ndáa tsa ña vaha? ⁵⁸ Tatun iin ra tsicán cuatyí tsaha ndo tan cuahán ndo tsihin ra nu nyaá ra cumí tyiñu, ityi cuahán ndo nducu ndo cuhva coo vaha ndo tsihin ra tsa ndi cumañi ca tsaa ndo nu nyaá ra cumí tyiñu. Coto nacuhva cuenda ra tsi ndo tsi juez. Tan juez ican cua nacuhva

cuenda ra tsi ndo tsi ra vitya naha ra. Tan ra vitya naha ra cua tyihi ra naha tsi ndo tsitsi vehe caa.
⁵⁹ Tatun tacan cua cuvi, catyí yu tsihin ndo tyin ña cua quita ndo nda cuanda tyahvi ndo tandihí tsa taahán tsi tyahvi ndo —catyí ra Jesús.

13

Cuñí tsi tsa nasama yo cuhva iyó yo, tun ña cuñí yo cuhun yo anyaya

¹ Tacan tan juvin ñi quivi can nyecu juhva ra naha. Tan quitsahá nacatyí tuhun ra naha tsihin ra Jesús tsa javahá ra Pilato tsihin juhva ra Galilea naha ra. Tyin tavá ra tyiñu na cahñi andaru naha ra tsi ra Galilea tsa tsijamañi quiti jana ra naha tsi Nyoo. Tan tacan sacá nuu niñi ra ican naha ra tsihin niñi quiti tsa tsijamañi ra ican naha ra. ² Tan nacahan ra Jesús tan catyí ra tsihin ra naha:

—¿A tsicá iñi nyoocho tyin cahnu xaan ca cuatyí ra Galilea ican naha ra tan ñavin ca tandihí ca ra ñuu ra naha, tan yacan tsihi ra naha? ³ Ñavin. Tyin tatun nyoocho tan ña nasama ndo cuhva iyó ndo, tacan cua cunaa ndo. ⁴ Tan tsa tsahun uñi taahan ra tsihi can naha ra tsa canacavá torre Siloé ican tsata ra naha, ¿a cuaha ca cuatyí ra naha tan ñavin ca inga ra tsa tsicoo ñuu Jerusalén, cuñí maa ndo? ⁵ Ñavin. Tyin tatun nyoocho tan ña nasama ndo cuhva iyó ndo, cua cunaa ndo.

Nu tsahá cuenda ra Jesús iin cuhva nácaa ndatú Nyoo tsa nasama yo cuhva iyó yo

⁶ Tacan tan tsahá cuenda ra Jesús iin cuhva ihya. Tan catyí ra:

—In ra iyó yutun tsa nañi higuera tsi ra. Tan nyaá tun nu ñuhu ra. Tan tsahan ra tsinyehē ra tatun iñi tsiti tun. Tan nyehe ra tyin nduve. ⁷ Tan catyí ra tsihin ra jahá cuenda tsi tun: “Tsa uñi cuiya tsa tyito ñi quitsi nyehe yu tatun iyó tsiti tun. Tan nduve maa tsiti tun iñi. Cahnya tsi tun. Tyin nyaá cuatu ñi maa tun nu ñuhu ihya. Tyin nduve tsiti tsahá tun”, catyí ra. ⁸ Maa tyin ra tsa jahá cuenda ñuhu ican catyí ra: “Taa, ña cua cahnya naha yo tsi tun vityin. Na cunyaá nuu maa tun inga cuiya ihya. Cua janduvita yu ñuhu tsaha tun tan cua tyihi yu ñuhu tyaahyú. ⁹ Vasiqui tacan tan cua cuhva tun tsiti. Maa tyin tatun ña cuhva tun tsiti, tacan tan cahnya yo tsi tun”, catyí ra tsa jahá cuenda ñuhu can —catyí ra Jesús.

Quivi quitatú nyivi janduvahā ra Jesús tsi iin ñaha tihí tsata

¹⁰ In quivi tsa quitatú nyivi, jacuahá ra Jesús tsi nyivi tsitsi vehe ñuhu. ¹¹ Tan ican nyaá iin ñaha tsa yihí tatyí ña vaha. Tan tsa tsahun uñi cuiya cuuhví ña tsa tihí tsata ña. Tan ña cuví ndundoo ña. ¹² Tacan tan nyehe ra Jesús tsi ña. Tan canā ra tsi ña. Tan quitsahā caahán ra tsihin ña, tan catyí ra:

—Tsa nduvahā un. Nduve ca cuehe ndohó un —catyí ra tsihin ña.

¹³ Tacan tan tyisó ra ndaha ra jiñi ña. Tan iin yaha ñi tan ndundoo ña. Tacan tan quitsahā jacahnú ña tsi Nyoo. ¹⁴ Maa tyin ra cuví ityi nuu vehe ñuhu, cuxaān xaan ra tsi ra. Tyin quivi quitatú janduvahā ra tsi ña. Tan catyí ra tsihin nyivi nyecú ican:

—Iyó iñu taahan quiví taahán tsi jaha tyiñu yo. Tacan quiví quitsi ndo cuvi ndo numeri. Tan ña quitsi ndo quiví quitatú yo —catyí ra.

¹⁵ Tacan tan Jutu Mañi yo Jesús catyí ra tsihin ra:

—Nyoocho tsa jahá ndo tyin vaha ndo. ¿A ña ndatsí tucu nyoocho quiti jana ndo tan jacohó ndo ndutya tsi ti quiví quitatú yo? ¹⁶ Tan tacan tucu ñaha ihya, tata ra Abraham cuví tsi ña. Tan tsa tsahun uñi cuiya tsa nuuhñi ña tsihin cuehe ihya jahá nu ña vaha. Tan yoñi ndatsi tsi ña. ¿A ña taahán tsi ndatsi yo tsi ña vasu ndi maa quiví quitatú yo cuví vityin? —catyí ra Jesús.

¹⁷ Tacan tan cuhva tsa cahān ra Jesús yacan, tandihi maa nu xaan iñi tsi ra nducahan nuu nahnu. Maa tyin tandihi ca maa nyivi si xaan cuñi ñi tsihin tsa cahnu tsa iyo javahā ra Jesús.

Nu cahān ra Jesús tyin tumaa iin tsiti mostaza cuví tsa ndacá ñaha Nyoo tsi yo

¹⁸ Tacan tan catyí ra Jesús:

—¿Náa cuví tsa ndacá ñaha Nyoo tsi yo? ¿Tan náa tsihin jandu inducu yo itsi? ¹⁹ Tumaa iin tsiti mostaza, tacan cuví tsi. Tyin iin ra tatsi ra iin tsiti ican nu ñuhu ra, tan canā iin yutun luhlu, tan tsahnū tun. Tan cuví tun iin yutun cahnu xaan. Tacan tan tsaā saa naha ti nuu yutun ican. Tan javahā ti taca ti nuu tun.

Nu cahān ra Jesús tyin tumaa yutsan iya, tacan cuví tsa ndacá ñaha Nyoo tsi yo

(Mt. 13.33)

²⁰ Tacan tan catyí ra Jesús inga tsaha:

—¿Náa ca tsihin jandu inducu yu nácaa ndacá ñaha Nyoo tsi yo? ²¹ Cuví tsi tumaa yutsan iya

tša nasacá nuu iin ñaha tsihin uñi jahma yutyi paan. Tyin tumaa ndaá tani yutsan paan ican jahá yutsan iya ican, tacan cuví tša ndacá ñaha Nyoo tsi yo —catyí ra.

Yuvehe tihin tan ityi cuiñi tša cuahán nu nyaá Nyoo

(Mt. 7.13-14, 21-23)

²² Ityi cuahán ra Jesús ñuu Jerusalén caahán ra tuhun Nyoo tsihin nyivi tandihí ñi ñuu nu yahá ra.

²³ Tan iin ra tsicá tuhun ra tsi ra:

—Jutu Mañi yu, ¿a cuaha maa nyivi cua cacu? —catyí ra.

Tacan tan nacahan ra Jesús, tan catyí ra:

²⁴ —Nanducu ndo cuhva quihvi ndo yuvehe tihin. Tyin tacan cuví quihvi ndo nu ndacá ñaha Nyoo. Tyin cuaha xaan ndo cuiñi ndo quihvi ndo ndacan, tan ña cuvi. ²⁵ Tyin tumaa tsitoho iin vehe, tacan cuví Nyoo. Tan tsitoho vehe ican cua nacasi ra yuvehe. Tacan tan nyoocho tša nyecú ndo ityi tsata cua jandatsan ndo yuvehe, tan cua catyi ndo: “Ñuña yuvehe.” Tan ra ican cua catyi ra tsihin ndo: “Ña tsitó yu ndáa ityi quee nyoocho.”

²⁶ Tacan tan nyoocho cua catyi ndo: “Nyuhu tsatsi ndi tan tsihi ndi tsihin un. Maa un jacuahá un tuhun Nyoo tsi ndi ityi nu nyecú vehe ndi”, cua catyi ndo tsihin ra. ²⁷ Maa tyin ra ican cua nacahan ra tsihin ndo tan cua catyi ra: “Tša catyi yu tsihin ndo tyin ña tsitó yu ndáa ityi quee ndo. Catsbyo nyaha ndo nu nyaá yu tandihí nyoocho nyivi javahá tša ña vaha” ²⁸ Tacan tan cua vacu ndo tan catsan ña cua cuvi nuhu ndo tša cua nyehe ndo tsi ra Abraham tsihin ra Isaac tan ra Jacob, tan

tsihin tandihí ra cuví ndusu yuhu Nyoo tsa tsicoo tahan tsanaha. Tyin nyecú ra naha nu ndacá ñaha Nyoo. Tan nyooho ndoo ndo ityi tsata. ²⁹ Tan cua quitsi nyívi ityi ndutya ñuhu, tan ityi norte, tan ityi nu caná ñicanyii, tan ityi nu tyisó ñicanyii. Tan cua cunyecu ñi catsi ñi tsihin Nyoo nu ndacá ñaha ra. ³⁰ Tan juhva nyívi tsa cuahán ityi nuu vityin, ñi can cuhun nu ndihí. Tan juhva nyívi tsa cuahán nu ndihí ña, ñi can cua cuhun ityi nuu —catyí ra.

Nu cuihya xaan cuñí ra Jesús nyehé ra tsi nyívi ñuu Jerusalén

(Mt. 23.37-39)

³¹ Juvín ñi maa quívi can tsaá juhva ra fariseo. Tan catyí ra naha tsihin ra Jesús:

—Quita ihya tyin ra Herodes cuñí ra cahñi ra tsi un —catyí ra naha.

³² Tan catyí ra Jesús tsihin ra naha:

—Cuaahan ndo tan cahan ndo tsihin ra tsa cuví tumaa ñicuii, tyin nda cuanda quita quívi tsa ndihí tyiñu jahá yu tsa tavá yu tatyí ña vaha tsi nyívi tan tsa janduvahá yu tsi nyívi cuuhví tsihin cuehe, tacan tan cundihí tyiñu jahá yu. ³³ Maa tyin nda cuanda tahan tsi tsa ndihí maa tyiñu jahá yu, tacan tan cuhun maa yu cua cúu yu nda ñuu Jerusalén. Tyin ña cuví cúu iin ra cuví ndusu yuhu Nyoo ityi tsata ñuu Jerusalén.

³⁴ ¡Ndahvi nyooho nyívi Jerusalén! tyin tsahñi ndo tsi ra cuví ndusu yuhu Nyoo. Tan cañi ndo yuu tsi tandihí ra tsa jaquitsi Nyoo nu yucú ndo. Tan yuhu cuaha xaan tsaha cuñí yu jaha cuenda yu tsi ndo, tumaa jahá cuenda iin ndiví sihi sehe ti, tan naquihín vaha ti tsi ti naha ti tsitsi nditsin

ti. Maa tyin maa ndo ña cuñí ndo. ³⁵ Nyehe ndo vityin tyin tsa nacoꝝ yu tsi ndo. Tan catyí yu tsihin ndo tyin ña cua nyehe ca ndo tsi yu nda cuanda quita quiví tsa cua catyí ndo tyin cahnu xaan ra vatsí tsihin siví Nyoo Jutu yo —catyí ra Jesús.

14

Nu janduvahā ra Jesús tsi iin ra cuuhví tsa iyó cuiñu quiví quitatú nyiví

¹ Cuví tsi iin quiví quitatú nyiví. Tan ra Jesús cuahán ra cua catsi ra vehe iin ra cuví ityi nuu tsihin ra fariseo naha ra. Tan juhva ca ra fariseo ican ndatú ra naha nyehé ra naha náa cuatyí cuví tyaa ra naha tsi ra Jesús. ² Tacan tan yatyin ñi nuu ra Jesús nyaá iin ra cuuhví tsa iyó cuiñu. ³ Tan catyí ra Jesús tsihin ra maestro cuenda ley vehe ñuhu naha ra tan tsihin ra fariseo naha ra:

—¿A vaha janduvaha yo nyiví cuuhví quiví quitatú yo? ¿Náa catyí ley Nyoo? —catyí ra.

⁴ Tacan tan tandihí ra naha, taxin ña tsinyecú ra naha. Tacan tan tyiso ndaha ra Jesús jiñi ra cuuhví can. Tan janduvahā ra tsi ra. Tan catyí ra tsihin ra na cunuhu ra. ⁵ Tacan tan catyí ra Jesús tsihin ra fariseo naha ra:

—Tatun nyoocho tan canacavā iin burru jana ndo, a inga quiti jana ndo, tsitsi xahva, ¿a ña cua tava ndo tsi ti tsa numi ñi, vasu ndi maa quiví quitatú yo cuví? —catyí ra.

⁶ Tacan tan taxin ña tsinyecú ra fariseo naha ra. Tyin ña ñihí ca ra naha náa nacahan ra naha.

Nu jacuahā ra Jesús tsi yo tyin ña vaha tsa cahnu jaha yo tsi yo

⁷ Nyehe ra Jesús tyin tandihi ra nyecú vico ican nacatsi ra naha tyayu vaha ca cunyecú ra naha. Tacan tan tsahā cuenda ra tyehen tsi ra naha:

⁸ —Ndáa quivi cuhun ndo vico tindaha, ña nanducu ndo tyayu vaha ca cunyecú ndo. Tyin coto quitsi inga ra tsa cahnu ca cuvi tan ñavin ca maa ndo, ⁹ tan coto quitsi ra tsa cana tsi ndo tan catyí ra tsihin ndo: “Cuhva tyayu can tyin cunyaa ra ihya.” Tacan tan nyooho tsihin tsa cahan nuu ndo, tan cua cuhva ndo tyayu can. Tacan tan cua cunyecú ndo nu ndihi ña. ¹⁰ Maa tyin catyí yu tsihin ndo, tyin ndáa quivi cana ra tsi ndo, cuaahan ndo, tan ñavin nu vaha cunyecú ndo. Tyin tacan tan cua quitsi maa ra tsa cana tsi ndo tan cua cahan ra tsihin ndo: “Amigos, naha ndo, cunyecú ndo nu tyayu vaha ihya.” Tan tacan cua jacahnu ca ra tsi ndo nu nyivi nyecú yuhu mesa tsihin ndo. ¹¹ Tyin ra tsa cahnu jahá tsi maa ra, cua tahan ra ticanuu. Tan ra tsa ndaahvi jahá tsi ra, cahnu ca cua cuvi ra —catyí ra Jesús.

¹² Tacan tan catyí tucu ra tsihin ra cana tsi ra nu iyó vico can:

—Ndáa quivi coo vico vehe un, ña cua cana un tsi ra vaha iñi tsi un, ndi tsi ra yañi un, ndi tsi ra cuví nyivi un, ndi tsi nyivi nyecú yuvehe un, ñi cuca. Tyin ñi ican cuví cana tucu ñi tsi maa un, na coo tucu vico vehe maa ñi. Tacan tan nacahnya ñi cuenda tsa tsahan ñi vico vehe un. ¹³ Maa tyin catyí yu tsihin un tyin ndáa quivi coo vico vehe un, cana tsi nyivi ndaahvi, nyivi cuuhví, nyivi coxo, tan tsihin nyivi cuaa. ¹⁴ Tacan tan sii cua cuñi un, tyin ñi ican ña cua cuvi natyahvi ñi tsi un. Maa

tyin cua natyahvi Nyoo tsi un quiví cua nandoto un tsihin nyiví vaha.

Nu tsahā cuenda ra Jesús iin cuhva nácaa caná ra tsiyo na quihviyo nu ndacá ñaha Nyoo
(Mt. 22.1-10)

¹⁵ Tan tsiñi iin ra tsa nyaá yuhu mesa ican tsa caahán ra Jesús. Tan catyí ra tsihin ra:

—Sii xaan cua cuñi nyiví tsa cua catsi nu ndacá ñaha Nyoo —catyí ra.

¹⁶ Tacan tan catyí ra Jesús tsihin ra:

—Iin ra ican jacoq ra iin vico cahnu xaan vehe ra. Tan canā ra cuaha xaan nyiví. ¹⁷ Tacan tan tsaā cuhva tsa cua cuxiñi ñi, tan jacuhún ra tsi musu ra na cuquihin ra tsi ñi, tyin tsa taħan tsi cuhva cuxiñi ñi. ¹⁸ Maa tyin tandihí ñi ican quitsahā caahán ñi tyin ña cua cuhun ñi. Tan iin ra ican catyí ra: “Ndi jata yu iin ñuhu. Tan cuñí tsi cuhun yu cunyehe yu itsi. Yacan tsicán yu na jaha ra tucahnu iñi tsi yu tyin ña cua cuhun yu.” ¹⁹ Tacan tan inga ra ican catyí ra: “Ndi jata ñi yu uhun taahan yunta. Tan cuhun yu cunyehe yu tatun vaha ti naha ti. Yacan tsicán yu tumañi iñi tsi ra na jaha ra tucahnu iñi tsi yu, tyin ña cua cuvi cuhun yu.” ²⁰ Tacan tan inga tucu ra ican catyí ra: “Ndi tindahā cuii ñi yu, tan ña cua cuvi cuhun yu”, catyí ra. ²¹ Tacan tan musu ra ican cuanuhu ra. Tan catyí tuhun ra tandihí tsa cuvi ican tsihin ra tsitoho ra. Tsa tsiñi tsitoho ra tsa tacan, tan cuxaan xaan ra. Tan catyí ra tsihin musu ra: “Cuaahan vityin tandihí maa ityi. Tan quitsi ndaca un tsi nyiví ndaahvi, nyiví cuuhví, nyiví coxo, tan tsihin nyiví cuaa”, catyí ra. ²² Tan tsa yahā tsaā nyico

musu ican tan catyí ra tsihin ra tsitoho ra: “Tsa javaha yu tandihi maa tsa cahan un tsihin yu. Tan nuña ca tsitsi vehe”, catyí ra. ²³ Tacan tan tsitoho ra catyí ra tsihin ra: “Cuaahan cua nducu ca nyivi tandihi maa ityi. Tan jañiñi un tsi ñi na quitsi ñi, tyin na cutu tsitsi vehe yu. ²⁴ Tyin catyí yu tsihin un tyin ndi intuhun ñi tsa cana yu tsa jihna, ña cua catsi ñi tsihin yu”, catyí ra —catyí ra Jesús.

Cuaha xaan tundoho nyehé yo tatun cuenda ra Jesús yihí yo
(Mt. 10.37-38)

²⁵ Cuaha xaan nyivi nyicún tsi ra Jesús. Tacan tan nanyehé ra tsi ñi, tan catyí ra tsihin ñi:

²⁶ —Tandihí nyoocho tsa nyicún tsi yu, tatun cuñí ca ndo tsi nyivi ndo tan ñavin ca tsi yuhu, ñavin cuenda yu yihí ndo. Tan tatun cuñí ca ndo tsi maa ndo tsa nuu yuhu, ñavin cuenda yu yihí ndo.

²⁷ Tyin nyoocho tsa ña cuñí nyehe tundoho tsa cunyicun ndo tsi yu, ña taahán tsi cuvi ndo nyivi cuenda yu, tyin tsa nyehé ndo tundoho, yacan cuví cruu tsa taahán tsi cuiso ndo. ²⁸ Tyin tun cua javaha ndo iin vehe, nacañí nuu jihna ndo jiñi ndo tan tyihi tuñi iñi ndo tun quita vehe cahnu can tsihin xuhun tsa nyii tsi ndo. ²⁹ Tyin tatun quitsaha jandaá ndo vehe ican, tan ña cuvi jandihí ndo tyin nduve ca xuhun ndo, cua vacu nducu nyivi tsi ndo. ³⁰ Tan cua catyi ñi: “Ra ican quitsaha javahá ra vehe ra, tan ndi ña cuví jandihí ra can”, cua catyi ñi. ³¹ A tatun iin rey tan cuñí ra cañi tahan ra tsihin inga rey ¿a ña cunyaa jihna ra tan nyehe ra tatun ñihi tsa utsi mil ñi andaru tsa cuahán tsihin ra cua cañi tahan ra naha tsihin inga

rey tsa vatsí tsihin oco mil andaru ican? ³² Tan tatun tsitó ra tyin ña cua cuvi jaha canaa ra tsi inga rey ican, tacan tan cañi ca vatsí inga rey ican, tan cua jacuhun ra tsi musu ra tyin na catyi tuhun ra naha tsihin inga rey ican na jandihí taxin ra itsi. ³³ Tan tacan cuví nyoocho. Tatun ña cahnya iñi ndo tandihí maa tsa cuñí ndo tan tandihí tsa cumí ndo, ña cua cuvi cunyicun ndo tsi yu.

Nu jacuahá ra Jesús tyin tumaa ñi tsa ndihí tsa uhva, tacan cuvíyo tatun ndu uvi iñi yo tsa tsinú iñi yo tsi ra

(Mt. 5.13; Mr. 9.50)

³⁴ 'Vaha ñi tyin jacu uhv́a tsi tsa catsi yo. Maa tyin tatun ndihí tsa uhva tsi, ña vaha ca tsi. ³⁵ Nduve ca tyiñu cuví javaha tsi. Ndi ña cuví jatyinyee tsi tsi ñuhu. Tan javitá yo itsi tyin ña vaha ca tsi. Nyoocho tsa iyó soho, tyáa soho ndo tuhun caahán yu —catyi ra Jesús.

15

Nu jacuahá ra Jesús tyin tumaa mbee tsa cuanaá tacan cuvíyo

(Mt. 18.10-14)

¹ Tandihí ra tavá xuhun cuenda ra ndacá ñaha nda ñu Roma, tan ra iyó cuatyi naha ra, natuhv́a ra naha nu nyii ra Jesús, tan tyáa soho ra naha tsa caahán ra. ² Tacan tan ra fariseo naha ra tsihin ra maestro cuenda ley vehe ñuhu naha ra quitsahá caahán nyaa ra naha tsi ra Jesús, tan catyi ra naha:

—Ra ihya, caahán ra tsihin ra iyó cuatyi naha ra. Tan tsatsí ra tsihin ra naha —catyi ra naha.

³ Tacan tan ra Jesús tsahā cuenda ra cuhva ihya, tan catyí ra:

⁴ —Nyooho tsa iyó iin cientu mbee jana, tun cunaa intuhun ti, ¿a ña cua nacao ndo tsi tandihí ca ti, tan cunanducu ndo tsi mbee tsa cunaa can nda cuanda tsa nañihí ndo tsi ti? ⁵ Tan tsa yaha nañihí ndo tsi ti, tyiso soco ndo tsi ti. Tan sií xaan cua cuñi ndo. ⁶ Tan tsa tsaa nyico ndo vehe ndo, tan ndu iín ndo tsihin ra vaha iñi tsi ndo tan tsihin nyívi iyó yatyin yuvehe ndo, tacan tan catyí ndo tsihin ñi tyin na cusí ndihí iñi ñi tsihin ndo tyin nañihí ndo mbee jana ndo tsa tsinaa. ⁷ Tan catyí yu tsihin ndo, tyin tacan tucu sií xaan ca cuñí ángel Nyoo tsa iyó gloria tsacatyí intuhun ra tsa iyó cuatyí tan nasamá ra cuhva iyó ra, tan ñavin ca tsa cumi xico tsahun cumi taahan nyívi tsa nduve cuatyí tan ña cuñí ca tsi tsa nasama ñi cuhva iyó ñi.

Ñaha tsa tsinaa xuhun tan nañihí ña

⁸ Tan catyí yu tsihin ndo, tyin tatun iin ñaha tan iyó utsi taahan xuhun ña, tan cuanaá iin xuhun ña, cua tyaa ña iin candili. Tan cua tihvi ña tanií tsitsi vehe ña. Tan cua nanducu ña xuhun can nda cuanda tsa nañihí ña can. ⁹ Tan tsa yaha nañihí ña, cua cuhun ña cunanducu ña tsi ñi vaha iñi tsi ña, tsihin nyívi tsa iyó yatyin yuvehe ña, tan cua cahan ña tsihin ñi: “Cusí ndihí iñi ndo tsihin yu tyin tsa nañihí yu xuhun yu tsa tsinaa”, cua catyí ña. ¹⁰ Tan catyí yu tsihin ndo tyin tacan tucu sií cuñí ángel Nyoo tsacatyí intuhun ra iyó cuatyí tan ndu uvi iñi ra cuatyí ra —catyí ra Jesús.

Nu jacuahā ra Jesús nácaa cuñí Nyoo tsi iin ra ndu uvi iñi cuatyí

¹¹ Tacan tan tsahá cuenda ra Jesús inga cuhva ihya tan catyí ra:

—Iin ra, iyó uvi taahan sehe ra. ¹² Tan ra tsa luhlu ca caahán ra tsihin jutu ra tyin na nacuhva ra tsa taahán tsi tsi ra. Tacan tan jutu ra natahvi sava ra tsa tsii ra tan tsahá ra tsi nduvi taahan sehe ra. ¹³ Tan ña cuaha ñi quívi tan ra luhlu ican xico ra tandihí maa tsa tsahá jutu ra tsi ra. Tan jandu iin ra xuhun ra, tan quihín ra ityi, cuahán ra iin ñuu cañi xaan. Tan ndacan tsicoo ra tan janaa ra tandihí maa xuhun ra tsihin tusi iñi. Tan quiñi xaan icá ra tsicá nuu ra. ¹⁴ Tacan tan tsaá tama ityi nu iyó ra. Tan quitsahá tsisocó ra tyin tandihí xuhun ra janaa ra. ¹⁵ Tacan tan tsahan ra tsinducu ra tyiñu jaha ra tsihin iin ra ñuu ican. Tan ra can jacuhun ra tsi ra iin nu iyó quini jana ra, tyin jaha cuenda ra tsi ti naha ti. ¹⁶ Tan cuví tsi iin tsaha tsisocó xaan ra can. Tan nduve maa tsa catsi ra iyó, ndacua cuñi ra catsi ra tsa tsatsí quini ican naha ti. Tan yoñi maa tsahá tsa catsi ra. ¹⁷ Tacan tan nducuhun iñi ra tsi jutu ra. Tan nacañi jiñi ra: “¿Náa tsa cuaha ra naha jahá tyiñu tsihin jutu yo? Tan nduve tsa cumañi tsi ra naha. Tan yoo vityin cuñi cúu yo jahá soco. ¹⁸ Vityin cua cunuhu yo nu nyaá jutu yo. Tan cua catyi yo tsihin ra tyin tsicoo cuatyí yo nuu Nyoo tan tacan tucu nuu maa ra. ¹⁹ Tan ña taahán ca tsi tsi yo tsa cuví yo sehe ra, tan na jaha ra tyin iin musu ña ra cuvi tsi yo” cuñi ra tsicá iñi ra.

²⁰ Tacan tan quihín ra ityi cuanuhu ra nda vehe jutu ra. Tan cañi ca vatsí ra tan nyehe jutu ra tsi ra, tan cundaahvi iñi ra nyehé ra tsi sehe ra. Tan tsinu xaan ra tsijatahan ra tsi ra. Tan tsinumí nyaa ra

tsi ra. ²¹ Tacan tan catyí ra tsihin jutu ra: “Tyatya, tsicoo cuatyí yu nuu Nyoo tan tsicoo cuatyí yu nuu tucu maa un. Tan yacan ña taahán ca tsi tsi yu tsa cuví yu sehe un”, catyí ra tsihin jutu ra. ²² Maa tyin jutu ra tava tyiñu ra, tan catyí ra tsihin musu ra: “Tava ndo jahma vaha tan jacunditsi ndo tsi ra ihya. Tan tyihi ndo iin xehe nundaha ra. Tan tyihi ndihi ndo zapatu tsaha ra. ²³ Tan cahñi ndo iin becerru tsa xaahan vaha ca, tyin catsi yo tsi ti. Tyin vityin cua coo yo vico. ²⁴ Tyin ra sehe yu ihya tsa tsihi ra cuñi maa yu, tsica iñi yu. Cuñi maa yu tyin ña cua nyehe ca yu tsi ra, tan tsaq nyico ra”, catyí jutu ra can. Tacan tan quitsaha tsicoo ñi vico. Tan si xaan cuñi ñi tyin tsaq nuhu nyico ra.

²⁵ Tacan tan inga sehe ra, ra tsa tsitsa, nyii ra tsicuhu. Tan tsa cua tsaa nuhu ra nda yuvehe ra, tan tsiñi ra tyin iyó yaa. Tan tui iñi ra tyin tsañi ñi yaa. ²⁶ Tacan tan tsa cuyatyn ra nda yuvehe ra tan cana ra tsi iin musu ra. Tan tsica tuhun ra tsi ra can náa cuví xaan can. ²⁷ Tacan tan musu can catyí ra: “Ra yañi un tsaq nuhu ra. Tan yacan tava jutu un tyiñu tyin na cahñi ra naha iin becerru xaahan. Tyin vaha tsaq ra yañi un, tan nduve náa tahañ ra”, catyí musu can tsihin ra. ²⁸ Tacan tan nduxaan xaan cuñi ra can. Tan ña cuñi ra quihvi ra tsitsi vehe. Tan jutu ra tsahan ra tsicahan ndaahvi ra tsihin ra, tyin na quihvi ra tsitsi vehe. ²⁹ Tacan tan nacañan ra can tan catyí ra tsihin jutu ra: “¿Náa tsa cuaha cuiya jahá tyiñu yu tsihin un? Tan tyaá yahvi xaan yu tsa caahán un. Maa tyin ndi intuhun mbee luhlu ñaha ca cuhva un tsi yu tyin coo vico jaha yu tsihin ra vaha iñi tsi yu. ³⁰ Maa tyin vityin tsaq nuhu nu sehe un ihya, nu

tša janaa xuhun tsihin ñaha si ñi. Tan tsaha un iin becerru qui xaahan tsi nu”, catyí ra tsihin jutu ra. ³¹ Tacan tan nacahan jutu ra tan catyí ra tsihin ra: “Sehe yu, yooho tsihin maa yu nyaá un tandihi qui. Tan tandihi tsa cumí yu, tsii un cuví can. ³² Tan vityin taahan tsi tyin javaha yo vico ihya, tan cusii ñi yo. Tyin tsaa nuhu ra yañi un, ra tsa tsihi, cuñi maa yu. Tumaa tsa nandoto nyico ra cuví can, tyin tsinaa ra, tan nañihi yo tsi ra inga tsaha”, catyí ra tsihin sehe ra —catyí ra Jesús.

16

Nu jacuahá ra Jesús tsi yo nácaa javaha yo tumañi ñi tsihin tsa iyó tsi yo

¹ Tacan tan catyí ra Jesús tsihin ra tsicá tsihin ra: —Iyó iin ra, cuca xaan ra. Tan iyó iin ra yihí ndaha tandihi tyiñu jahá ra cuca can. Tan tsahan iin musu ra tsicatyí tuhun ra tsihin ra cuca ican, tyin ra yihí ndaha tyiñu ican, janaa ra tandihi tsa iyó tsi ra. ² Tacan tan cana ra cuca ican tsi ra tan catyí ra tsihin ra: “Tsa cuaha xaan cuatyí javahá un quitsi nu nyaá yu. Vaha ca nacuhva cuenda un tandihi tyiñu tsa javahá un tsi yu. Tyin ña cua jaha tyiñu ca un tsihin yu”, catyí ra cuca can tsihin ra. ³ Tacan tan ra yihí ndaha tyiñu can tsicá ñi ra: “¿Nacaa cua javaha yu vityin? Tsitoho yu ña cuñi ca ra tsa jaha tyiñu yu tsihin ra. Tan nduve tunyee ñi iyó tsi yu tsa jaha tyiñu yu tsihin ñuhu. Tan cahan xaan nuu yu caya yu tsitsi ñuu. ⁴ Maa tyin tsa tsitó yu nácaa cua javaha yu, tacan tan vaha cua cuñi nyivi tsihin yu qui tsa nduve ca tyiñu cua jaha yu, tan vaha cua tsaa yu vehe ñi”, tsicá ñi ra can.

⁵ Tacan tan cana ra tsi intuhun intuhun ra tsa nyaá cuenda tsi tsitoho ra. Tan catyí ra tsihin iin ra ican: “¿Náa nyaá cuenda un tsi tsitoho yu?” catyí ra.

⁶ Tacan tan nacahan ra ican tan catyí ra: “Yuhu nyaá cuenda yu cumi mil litru acetye.” Tacan tan ra yihí ndaha tyiñu ican catyí ra tsihin ra: “Quihin un inga tutu ihya. Tan tyaa un uvi mil ñi. Tan javita un tutu tsaahnu ican”, catyí ra. Tacan ica ra can, tan cuahan ra. ⁷ Tacan tan tsaá inga ra. Tan tsicá tuhun tucu ra tsi ra ican: “¿Náa nyaá cuenda un tsi tsitoho yu?” Tan nacahan ra ican: “Nyaá cuenda yu iin mil arroba trigu”, catyí ra. Tacan tan catyí ra yihí ndaha tyiñu ican: “Quihin inga tutu, tan tyaa un una cientu ñi arroba. Tan javita un tutu tsaahnu can”, catyí ra. ⁸ Tacan tan tsito tsitoho ra tsa ña vaha tsa javaha ra. Tan iyo xaan cuñi ra cuca can, tyin yatyi xaan ñihí ra cuhva ica ra —catyí ra Jesús.

Tan catyí ra tsihin ra tsicá tsihin ra:

—Nyivi nu ñuhu ñayivi ihya tsa ña tyaa yahvi tsi Nyoo yatyi xaan ca jahá ñi tsi ñi tan ñavin ca nyivi tsa iyó ñuhu nditsin Nyoo aña.

⁹ Tan catyí yu tsihin ndo, tyin cuatyíñu ndo tsa cuca tsa iyó nu ñuhu ñayivi ihya, tan jatinyee ndo tsi nyivi. Tan quivi tsa cua ndihi tsa cuca, cua ñihi ndo coo ndo nu ña cua naa maa.

¹⁰ Tatun tsitó ndo cuatyíñu vaha ndo tsa luxu ñi tsa iyó tsi ndo, tacan tucu tatun cuaha coo tsi ndo cua cuatyíñu vaha ndo itsi. Tyin tatun ña tsitó ndo cuatyíñu ndo tsa luxu ñi tsa iyó tsi ndo, tacan ña cua coto tucu ndo cuatyíñu ndo tatun cuaha coo tsi ndo. ¹¹ Tan catyí yu tsihin ndo, tatun ña javahá

ndo tsa vaha tsihin tsa iyó tsi ndo nu ñuhu ñayivi ihya, Nyoo ña cua cuhva ra tsa vaha tsa iyó gloria tsi ndo. ¹² Tyin tandihi tsa iyó tsi ndo, maa Nyoo tsaha nuu itsi tsi ndo. Tan tatun ña javahá ndo tumañi iñi tsihin tsi, ña cua cuhva ra tsa cuvi tsii ndo.

¹³ 'Iin musu ña cuví coo uvi taahan tsitoho ra. Tyin musu ican cua cuñi ca ra tsi iin ra, tan ñavin ca tsi inga ra. Tan vaha ca cua tyaa yahvi ra tsa cahan iin ra, tan inga ra, ña cua tyaa yahvi ra tsa cahan ra can. Ña cua cuvi cuñi ndo tsi Nyoo tatun cuñi tucu ndo tsa cuca —catyí ra Jesús. ¹⁴ Tan tsa tsiñi ra fariseo naha ra tandihi tsa cahan ra Jesús, tacan tan quitsaha tsacú nducu ra naha tsi ra. Tyin maa ra fariseo naha ra cuñi xaan ra naha xuhun. ¹⁵ Tacan tan catyí ra Jesús tsihin ra naha:

—Vaha xaan jahá maa ndo tsi ndo nuu nyivi. Maa tyin tsa tsitó Nyoo tyin ña vaha aña ndo. Tandihi tsa cahnu cuñi maa nyivi, Nyoo ña cuñi ra nyehe ra yacan.

Ley Nyoo tsa tyaa ra Moisés, tan tsihin tsa ndacá ñaha Nyoo tsi yo

¹⁶ 'Ley tsa tsaha Nyoo tsi ra Moisés tyin tyaa ra, tan tsihin tuhun tsa tyaa ra cuví ndusu yuhu Nyoo tahañ tsanaha, yacan cuví tsa janaha ityi tsi nyivi nda cuanda quivi tsa quitsi ra Juan. Tan ra Juan quitsaha caahán ra tuhun vaha tyin tsa cuñi quitsi Nyoo tyin cua cundaca ñaha ra. Tan tandihi nyivi nducú xaan ñi cuhva tsa quihvi ñi nu ndacá ñaha ra.

¹⁷ 'Tan catyí yu tsihin ndo, tyin vasu cunaa andivi tan nu ñuhu ñayivi ihya, maa tyin tsa cuví

ley Nyoo tsa tyaa ra Moisés, ña cua cunaa tsi tyin cua cundaa tandihi tsi.

Nu jacuahq ra Jesús tyin ña vaha tsa nacoo ihñi rayi ñasihi ra

(Mt. 19.1-12; Mr. 10.1-12)

¹⁸ "Tatun iin rayi tan iyó ñasihi ra, tan nacoo ihñi ra tsi ña, tan tindaha ra tsihin inga ñaha, coo cuatyí ra nuu Nyoo. Tan tatun tindaha inga rayi tsihin ñaha tsa nacoo yi, coo tucu cuatyí ra can nuu Nyoo.

Nu jacuahq ra Jesús tsi nyivi cuenda ra cuca tsihin ra Lázaro

¹⁹ "Tsicoo iin ra cuca. Tan vaha xaan jahma tsinditsi ra. Tan tandihi quivi iyó vico jahá ra tan tsatsí vaha ra. ²⁰ Tan tsicoo tucu iin ra ndaahvi tsa tsinañi Lázaro. Tan ra ihya cuaha xaan ndihyi iñi tsi ra. Tan nyaá ra yuvehe ra cuca ican. ²¹ Ra ndaahvi can, cuñi ra catsi ra, vasu tsa cucoyó xuu mesa ra cuca can. Tan nda cuanda ina tan tsaá ti naha ti nu nyaá ra, tan tsacayaá ti nu uhvi ra. ²² Tan iin quivi tsihi ra ndaahvi can. Tan ángel maa Nyoo na quihin tsi ra tan tsindaca ra naha tsi ra nda nu nyaá ra Abraham gloria. Tacan tan tsihi tucu ra cuca can. Tan tsicutsi ñi tsi ra. ²³ Tacan tan ra cuca ican nyehé xaan ra tundoho nu nyii ra anyaya. Tan nanyehe ra nu cañi xaan nu nyaá ra Abraham tsihin ra Lázaro. ²⁴ Tacan tan cana tsaa ra cuca can tan catyí ra: "Tyatya Abraham, cundaahvi iñi tsi yu. Jaquitsi tsi ra Lázaro tan na jatyi ra luxu nundaha ra. Tan na jatoo ra ndutya nu yaa yu. Tyin nyehé xaan yu tundoho nu cayú ñuhu ihya", catyí ra. ²⁵ Tan ra Abraham catyí ra tsihin ra: "Nducuhun iñi tyin vaha xaan

tsicoo un nu ñuhu ñayivi. Tan ra Lázaro, tuhun ndaahvi tsicoo ra. Tan vityin vaha iyó ra ihya, tan yoocho nyehé un tundoho. ²⁶ Tan inga tucu tuhun, tyin mahñu nu yucú yo ihya cunu xaan xahva. Tan ra yucú nyehe ña cuví cuhun ra naha nu nyii un. Tan ndi ra yucú nu nyii un, ña cuví quitsi ra naha nyehe”, catyí ra Abraham tsihin ra cuca can. ²⁷ Tacan tan catyí ra cuca ican: “Tyatya Abraham, jaha tumañi iñi tsi yu. Jacuhun tsi ra Lázaro nda vehe jutu yu. ²⁸ Tyin iyó uhun taahan ca ra yañi yu naha ra. Tan cuñi yu tyin catyi tuhun ra Lázaro tsihin ra naha nácaa nyii yu nyehé yu tundoho ihya, coto quitsi ndihi ra naha ihya”, catyí ra. ²⁹ Tacan tan catyí ra Abraham: “Iyó ley tsa tyaa ra Moisés. Tan iyó tuhun tsa tyaa ra cuví ndusu yuhu Nyoo tañan tsanaha. Na tyaa yahvi ra yañi un naha ra, tun cuñi ra naha”, catyí ra Abraham. ³⁰ Tacan tan catyí ra cuca ican: “Tyatya Abraham. Ña cua tyaa yahvi ra naha. Maa tyin tatun yóo tsa nandoto, tan cuhun cucahan tsihin ra naha, tacan tan cua tyaa soho ra naha tan cua nasama ra naha cuhva iyó ra naha”, catyí ra cuca ican. ³¹ Tan ra Abraham catyí ra: “Tatun ña cuñi ra naha tyaa yahvi ra naha tuhun tsa tyaa ra Moisés tan tuhun tsa tyaa ra cuví ndusu yuhu Nyoo tañan tsanaha, vasu ndi maa nandoto iin nyivi tan cahan ñi tsihin ra naha ña cua tsinu iñi ra naha.”

17

Nu jacuahá ra Jesús tsi yo nácaa jaha cuenda yo tsi yo coto javaha yo tsa ña vaha

(Mt. 18.6-7, 21-22; Mr. 9.42)

¹ Tyehen catyí ra Jesús tsihin ra tsicá tsihin ra:

—Tacan ñi iyó tsa quiñi caá tsa jativí tsi nyívi. Maa tyin ndahvi ra ndaahvi tsa jativí tsi nyívi. ² Vaha taxin ca na cunuhñi iin yuu jucun ra, tan jacuhun nyívi tsi ra nu ndutya ñuhu. Coto jativí ca ra tsi nyívi ndi nasama cuhva iyó.

³ Jaha vaha ndo cuenda tsi ndo. Tatun iin ra cutahán tsihin ndo tan javaha ra tsa ña vaha tsihin ndo, cahan ndo tsihin ra tyin ña vaha tsa javaha ra. Tun nasama ra cuhva iyó ra, jaha ndo tucahnu iñi tsi ra. ⁴ Tan ndi maa javaha ra tsa ña vaha tsihin ndo utsa tsaha tsa iin quívi, tatun tandihí tsa utsa tsaha tan catyí ra tsihin ndo tyin ndu uvi iñi ra tsa javaha ra; tandihí tsa utsa taahan tsaha can, jaha ndo tucahnu iñi tsi ra.

Nu jacuahá ra Jesús tsi yo tyin tatun tsinú iñi yo tsi ra, cuví javaha yo cuaha tsa vaha

⁵ Tacan tan catyí ra tava tyiñu ra Jesús tsihin ra: —Cuhva tsa tsinu ca iñi ndi tsi un —catyí ra naha.

⁶ Tan catyí ra Jesús tsihin ra naha:

—Tatun tsinú iñi ndo tsi yu vasu tumaa cuhva iin tsiti mostaza tsa luhlu cuii ñi tsi, cua cahan ndo tsihin yutun cahnu tsa nañi sicómoro tsa nyaá ihya: “Na tuhun tsi un, tan cunyaa un nda nu ndutya ñuhu.” Tan cua tyaa yahvi tun tsa cua cahan ndo —catyí ra Jesús.

Nacaa taahán tsi tyaa yahvi yo tsi Nyoo

⁷ Tan catyí ra Jesús:

—Tatun iin nyoocho tan iyó iin musu ndo, tan tsaa ra tsa tsahan ra tsicuhu tsijahá tyiñu ra, a tsijahá cuenda ra quiti jana ndo, ¿a catyí ndo tsihin ra: “Cunyaa tan catsi un”? Ña tuhvá ndo cahan

tacan tsihin ra. ⁸ Maa tyin tyehen tuhvá ndo caahán tsihin ra: “Javaha tsa cuxiñi yu. Tan tyihi un tsa catsi yu. Tsa yaha tsa catsi yu, tacan tan catsi tucu maa un”, tacan tuhvá ndo caahán tsihin ra. ⁹ Ndi ña tuhvá ndo nacuhvá tyahvi nyoo tsi ra tyin javahá ra náa tyiñu tava ndo tsi ra. ¹⁰ Tacan tucu maa ndo tsihin Nyoo. Quiví ndihi javaha ndo tandihi tsa cahan ra tsihin ndo, taahán tsi catyi ndo tsihin ra: “Nyuhu nduve náa ca tyiñu cuaha xaan javahá ndi. Tyiñu tsa tava ñi un tsi ndi, yacan ñi javahá ndi. Tan ña yaha ca javahá ndi.”

Nu janduvahá ra Jesús tsi utsi taahan ra ndohó cuehe tyaahyú

¹¹ Cuahán ra Jesús ityi ñuu Jerusalén tan yahá ra nu cuví xahñu Samaria tsihin Galilea. ¹² Tan nu tsaá ra iin ñuu, quita utsi taahan ra cuuhví tsihin cuehe tyaahyú. Tan tsicuiñi ra naha ndasava.

¹³ Tan caná tsaa ra naha tan catyí ra naha:

—Yoocho, Maestro Jesús, cundaahvi iñi tsi ndi —catyí ra naha.

¹⁴ Tan tsa nyehe ra Jesús tsi ra naha tan catyí ra tsihin ra naha:

—Cuaahan ndo, cujanaha ndo tsi ndo tsi ra jutu tyin tsa nduvahá ndo.

Tacan tan cuahán ra naha. Tan ityi cuahán ra naha tan nduvahá ra naha. ¹⁵ Tacan tan tsa nyehe iin ra ican tyin tsa nduvahá ra, vatsí tsihin tsata nyico ra nu nyí ra Jesús. Tan quitsahá caná tsaa ra, jacahnú ra tsi Nyoo. ¹⁶ Tan tsa tsaá ra nu nyí ra Jesús, tsicuiñi tsiti ra, tan nacañi nuu ra jiñi ra nda nu ñuhu nuu ra Jesús. Tan nacuhvá ra tyahvi nyoo tsi ra. Ra tsa nduvahá ihya, ra Samaria cuví ra.

¹⁷ Tacan tan catyí ra Jesús:

—¿A ñavin utsi taahan ndo nduvahā? ¿Náa inga ñin taahan ca ra naha? ¹⁸ ¿A intuhun ñi maa ra inga ñuu ihya vatsí, vatsí jacahnú tsi Nyoo? —catyí ra Jesús.

¹⁹ Tacan tan catyí ra tsihin ra tsa nduvahā ican:

—Nduvita, cūaahan. Nduvahā un tyin tsinú ñi un tsi Nyoo —catyí ra Jesús tsihin ra.

Cuhva cua quitsi Nyoo cua cundaca ñaha ra nu iyó yo ihya

(Mt. 24.23-28, 36-41)

²⁰ Tsicā tuhun ra fariseo naha ra tsi ra Jesús, tan catyí ra naha:

—¿Ama cua quitsi Nyoo cua cundaca ñaha ra?

Tacan tan catyí ra Jesús:

—Ñavin tsa nyehé yo cuví tsa ndacá ñaha Nyoo ihya nu ñuhu ñayivi. ²¹ Ña cua cuvi catyi nyivi: “Juvín ra nyii ihya, juvin ra nyii ityi ican.” Tyin Nyoo tsa tsaa ra mahñu ndo, tan ndacá ñaha ra tsi nyivi yihí cuenda ra —catyí ra tsihin ra naha.

²² Yahā yacan tan catyí ra tsihin ra tsicá tsihin ra:

—Cua tsaa quivi tsa cua cuñi ndo nyehe ndo tsi yuhu Rayi quee nda gloria. Maa tyin ña cua nyehe ndo tsi yu. ²³ Yihí ñi cua catyi ñi tsihin ndo: “Ihya nyii ra.” Inga ñi cua catyi ñi: “Ndacan nyii ra.” Maa tyin coto cuhun ndo cunyehe ndo. Tan ña cunycun ndo tsi ra can tyin ñavin yu cuvi can.

²⁴ Tyin tandihí nyivi cua nyehe tsi yuhu, Rayi tsa quee nda gloria, quivi cua quitsi nyico yu inga tsaha. Tumaa tsa nyehé tandihí nyivi nu cañi tatsa savi tan quituvi ñuhu tatsa can ñi canduvi

andivi, tacan cua cuvi quivi cua quitsi yu inga tsaha. ²⁵ Maa tyin cua nyehe jihna yu tundoho cahnu xaan. Tyin nyivi tsa iyó vityin, ndasi cua cuñi ñi nyehe ñi tsi yu. ²⁶ Tumaa quivi tsa tsicoo ra Noé, tacan cua cuvi quivi cua quitsi nyico yuhu Rayi quee nda gloria.

²⁷ Quivi tsicoo ra Noé, tsatsi nyivi. Tsihi ñi. Tindahá ñi. Tan tsaha ñi sehe sihi ñi tindaha, nda cuanda quivi quihvi ra Noé tsitsi yutun ndoo tan cuun savi xaan. Tan tandihi ñi can tsihi ñi jahá ndutya. ²⁸ Tacan tucu cuvi quivi tsicoo ra Lot. Tsatsi ñi. Tsihi ñi. Jatá ñi. Xicó ñi. Tatsi ñi itu. Tan javahá ñi vehe ñi. ²⁹ Tan quivi tsa quita ra Lot ñuu Sodoma ican, cuun ñuhu tsihin azufre tsa quee nda andivi. Tan tsahñi ñuhu can tandihi nyivi Sodoma. ³⁰ Tacan cua cuvi quivi quitsi nyico yu tsa cuvi yu Rayi quee nda gloria.

³¹ Tatun nyecú ndo nuquehe quivi quitsi yu, ña quihvi ndo tsitsi vehe tan tava ndo ndaha tyiñu ndo. Tan tatun yucú ndo tsitsi cuhu, ña cunuhu ca ndo yuvehe ndo. ³² Nducuhun iñi ndo tsa tahanan ñasiihi ra Lot. ³³ Tandihi nyoocho tsa cuñi tsa iyó nu ñuhu ñayivi ihya, cua cunaa ndo. Tan tandihi nyoocho tsa ña tyaá yahvi tsa iyó nu ñuhu ñayivi ihya, cua cacu ndo.

³⁴ Tan catyí yu tsihin ndo tyin tsacuaa can, uvi taahan nyivi cua cava iin nu tsito. Iin ñi cua naquihin yu. Tan inga ñi cua ndoo ñi. ³⁵ Tan uvi taahan ñiñaha, iin caa ñi cua nyico ñi quivi can. Intuhun ña cua naquihin yu. Tan inga ña cua ndoo ña. ³⁶ Tan catyí yu tsihin ndo tyin uvi taahan ra cua cuyucu tsicuhu. Intuhun ra cua naquihin yu, tan

inga ra cua ndoo ra —catyí ra Jesús.

³⁷ Tsa tsiñi ra naha tsa cahān ra Jesús tacan, tsica tuhun ra naha tsi ra:

—¿Numaa tahan cua cuvi yacan, Jutu Mañi yu? —catyí ra naha.

Tacan tan nacahān ra Jesús, tan catyí ra:

—Nu canyii ndiyi, ican cua nataca nditsii.

18

Nu jacuahā ra Jesús tyin tumaa tsa cahān yuhu iin ñaha tsihi yii tsihin juez, tacan taahān tsi ndacan yo tsi Nyoo

¹ Tsaahá cuenda ra Jesús iin cuhva ihya. Tyin iin nyita ñi cuñí tsi tsa ndacan tahvi ra naha tan ña cundihi iñi ra naha. ² Tan catyí ra:

—Iyó iin ñuu tsa nyaá iin ra cuví juez. Tan juez ican ña tyaá yahvi maa ra tsi Nyoo. Tan ndi nyivi tan ña tyaá yahvi ra. ³ Tan juvin ñuu ican iyó iin ñaha ndaahvi tsa tsihi yii. Tan tsaahān ña tsicahān ña tsihin ra can, tyin tsicán ña cuatyí tsaha iin nu xaan iñi tsi ña. ⁴ Tan juez ican ña tyaá yahvi nu tsa caahān ña. Ña jandaā maa nu tyiñu tsicán ña. Tan tsanaha xaan tsicán ña. Tacan tan quitsahā tsicá iñi nu juez can: “Vasu ndi maa ña tsinú iñi yu tsi Nyoo, tan nduve náa cuenda yu tsi nyivi, ⁵ maa tyin ñaha ihya tsahá xaan ña tsihi tsi yu. Tan yacan cuenda vaha ca cua jacacu yu tsi ña. Tyin coto ña jaña ña tsa vatsí ña, tan cuhva ca ña tsihi tsi yu”, cuñí ra tsicá iñi ra.

⁶ Tacan tan catyí Jutu Mañi yo, ra Jesús:

—Tacan catyi ra juez caquiñi can. Ra juez can ra caquiñi xaan cuví ra maa tyin jatinyee ra tsi

ñaha ndaahvi ican. ⁷ Tan vihi ca cuví Nyoo tsihin yo, ¿a ña cua jatyinyee ra tsi nyivi tsa nacatsi ra tsa tsicán ñi tsi ra nduvi tan ñiñu? ¿A cuatu xaan ca ra tan jatyinyee ra tsi ñi? ⁸ Catyí yu tsihin ndo, tyin numi ca cua jatyinyee ra tsi ñi. Maa tyin quivi tsa cua quitsi nyico yu tsa cuví yu Rayi tsa quee nda gloria, tsitó Nyoo tun nañihi ca yu tsi nyivi tsa tsinú tsa cuii iñi tsi yu —catyí ra Jesús.

Iin cuhva cuenda ra tavá xuhun cuenda ra ndacá ñaha nda ñuu Roma tan cuenda ra fariseo naha ra

⁹ Tacan tan tsahā cuenda ra Jesús iin cuhva cuenda ra tsa vaha xaan jahá tsi maa ra naha, tan ndasi cuñi ra naha nyehé ra tsi inga nyivi. Tan catyí ra:

¹⁰ —Iyó uvi taahan ra cuahán vehe ñuhu cua ndacan tahvi ra naha tsi Nyoo. Iin ra ican ra fariseo cuví ra. Tan inga ra can ra tavá xuhun cuenda ra ndacá ñaha nda ñuu Roma cuví ra. ¹¹ Tan ra fariseo ican nduvitā nyityi ra, tan quitsahā caahán ra tsihin Nyoo. Tan catyí ra: “Jutu Mañi yu, nacuhvá yu tyahvi nyoo tsi un tyin yuhu ñavin tumaa inga nyivi cuví yu. Tyin iyó ñi suhú ñi. Quiñi icá ñi. Tan yihí ra naha iyó ñasihi ra tan iyó inga ñaha ra naha. Tan ña cuví yu tumaa ra tavá xuhun ihyā. ¹² Tyin yuhu uvi tsaha tsicoó nyitya yu tsa iin vitya. Tan tsahá yu utsi taahan xuhun tsa iin iin cientu tsa jahá canaa yu tsi un”, catyí ra can. ¹³ Tan ra tsa tavá xuhun can tsa cañi luxu nyaá ra. Tan ña canā iñi ra nanyehe ndaa ra. Tan cañi ndaha ra yiqui nyica ra tyin ndu uví iñi ra cuatyí ra. Tan catyí ra: “Jutu Mañi yu, cundaahvi iñi tsi

yu tyin cuaha xaan cuatyí yu iyó”, catyí ra —catyí ra Jesús.

¹⁴ Tan catyí nyico ra Jesús tyehen:

—Catyí yu tsihin ndo tyin Nyoo jahá ra tucahnu iñi tsi ra tavá xuhun ican. Janaa Nyoo cuatyí ra tan cuanuhú ra nda yuvehe ra. Maa tyin ra fariseo ican, nduve tucahnu iñi tsicoo tsi ra, tyin nyivi tsa cahnu xaan jahá ñi tsi ñi, ña cahnu cuví ñi jahá Nyoo, tan nyivi tsa ndaahvi jahá tsi, cua jacahnu Nyoo tsi ñi —catyí ra Jesús.

Nu nasocó ra Jesús tsi tsa nyihi

(Mt. 19.13-15; Mr. 10.13-16)

¹⁵ Tacan tan quitsi ndaca nyivi tsa nyihi tsi ra Jesús tyin tyiso ndaha ra jiñi tsi naha tsi. Maa tyin cuhva tsa nanyehé ra tsicá tsihin ra tyin cuaha tsa nyihi tsaá nu nyaá ra, cuxaan ra naha tan ña tsahá ra naha cuhun tsa nyihi can. ¹⁶ Tacan tan cana ra Jesús tsi ra naha, tan catyí ra tsihin ra naha:

—Jaña ndo na quitsi maa tsi naha tsi nu nyaá yu. Tan ña casi ndo. Tyin nyivi tsa ndacá ñaha Nyoo, cuví ñi tumaa tsa nyihi ihya. ¹⁷ Tan catyí yu tsihin ndo tyin tatun ña nyitá iñi ndo tsi Nyoo, tumaa nyitá iñi iin tsa luhlu ihya tsi jutu tsi, ña cua cuvi quihvi ndo nu ndacá ñaha Nyoo.

Nu tsahá ra Jesús cuhva tyin yï xaan nacuhva cuenda iin ra cuca tsi ra tsi Nyoo

(Mt. 19.16-30; Mr. 10.17-31)

¹⁸ Tacan tan iin ra tsa cuví ityi nuu cuenda vehe ñuhu tsicá tuhun ra tsi ra Jesús, tan catyí ra:

—Maestro, ra vaha cuví un. ¿Nacaa cua javaha yu tan coo yu ñayivi tsa ña cua naa maa? —catyí ra.

19 Tacan tan catyí ra Jesús tsihin ra:

—¿Nacuenda catyí un tyin ra vaha cuví yu? Tan intuhun ñi maa Nyoo cuví ra vaha. 20 Yoooho tsitó un tandihí tuhun tsa tsahá Nyoo tyin javaha yo: “Tsa ña coo inga ñaha tsi un. Ña cahñi un nyívi. Ña suhu un. Ña cahan un cuendu siqui nyívi. Tan tyaa yahvi un tsi jutu un tan sihi un” —catyí ra Jesús.

21 Tacan tan ra ican catyí ra:

—Tandihí maa yacan tan tyaá yahvi yu nda tahañ luhlu yu tan nda cuanda vityin —catyí ra.

22 Tsa tsiñi ra Jesús tsa cahan ra can, tacan tan catyí ra tsihin ra:

—Maa tyin cumañi javaha un inga tsa taahán tsi javaha yo. Xico tandihí tsa iyó tsi un. Tan cuhva un xuhun can tsi nyívi ndaahvi. Tan quitsi nyicun un tsi yu. Tacan tan coo tsa cuca tsi un nda gloria —catyí ra.

23 Maa tyin tsa tsiñi ra tsa cahan ra Jesús, nducuihya xaan cuñi ra, tyin cuca xaan ra. 24 Tan tsa nyehe ra Jesús tyin nducuihya cuñi ra, tan catyí ra:

—Yi xaan tan cuví nacuhva cuenda nyívi cuca tsi ñi na cundaca ñaha Nyoo tsi ñi. 25 Yatyí xaan ca cuví yaha iin camellu xuu iin yiqui tucu, tan ñavin ca tsa quihvi iin nyívi cuca nu ndacá ñaha Nyoo —catyí ra.

26 Tan nyívi tsa tsiñi tsa cahan ra catyí ñi:

—Tatun tacan, ¿yóo cua cuví cacu? —catyí ñi.

27 Tacan tan ra Jesús catyí ra:

—Tandihí tsa ña cuví javahá nyívi, Nyoo cuví javahá ra tandihí —catyí ra.

28 Tacan tan ra Pedro catyí ra:

—Jutu Mañi yu, nyuhu tandihí maa tsa iyó tsi ndi nacoq ndi, tan nyicún ndi tsi un —catyí ra.

²⁹ Tacan tan catyí ra Jesús tsihin ra:

—Tsa nditsa catyí yu tsihin ndo, tyin tandihí nyoocho tsa nacoq vehe, a ñasihi ndo, a yañi ndo, a jutu ndo, a sehe ndo tsacatyí tsa tsahá ndo tsa cundaca ñaha Nyoo tsi ndo, ³⁰ cuaha xaan tsa vaha cua ñihi ndo ñuu ñayivi ihya tan inga ñayivi tsa cua coo, cua ñihi ndo ñayivi tsa ña cua naa maa —catyí ra Jesús.

Inga tsaha jacotoq ra Jesús cuhva cua cahñi nyivi tsi ra

(Mt. 20.17-19; Mr. 10.32-34)

³¹ Tan cana sñn ra Jesús tsi tsa utsi uvi taahan ra tsicá tsihin ra, tan catyí ra tsihin ra naha:

—Vityin cuhun yo nda ñuu Jerusalén. Tyin ndacan cua cundaa tyiñu Rayii tsa quee nda gloria: tandihí tyiñu tsa tyaa ra cuví ndusu yuhu Nyoo tahañ tsanaha. ³² Tyin ra xaan iñi tsi yu naha ra cua nacuhva cuenda ra naha tsi yu tsi ra inga ñuu, ra tsa ñavin ra ñuu Israel cuví. Tan cua vacu nducu ra naha tsi yu. Tan cua cahan nyaa ra naha tsi yu. Tan cua tiví sñ ra naha nuu yu. ³³ Tan cua cañi ra naha tsi yu, tan cua cahñi ra naha tsi yu, maa tyin tsa tsinu uñi quivi tan cua nandoto yu inga tsaha —catyí ra Jesús.

³⁴ Maa tyin ña cutuñí iñi ra tsicá tsihin ra tsa cahan ra, tan ndi ña tsitó ra naha náa tuhun cahan ra tsihin ra naha. Tyin ña cuví cutuñi iñi ra naha.

Nu janduvahaq ra Jesús iin ra cuaa ñuu Jericó

(Mt. 20.29-34; Mr. 10.46-52)

³⁵ Cuhva tsa cua tsaa ra Jesús ñuu Jericó, tan yuhu ityi ican nyaá iin ra cuaa, cayá ra. ³⁶ Tacan tan tsiñi ra cuvaa tsa yahá cuaha nyivi. Tan tsica tuhun ra náa cuenda ñihi xaan cuvaa. ³⁷ Tan catyí tuhun nyivi tsihin ra tyin ra Jesús, ra ñuu Nazaret, vatsí. ³⁸ Tacan tan quitsaha caná tsaa ra tan catyí ra:

—¡Yooho Jesús, tata ra rey David! ¡Cundaahvi iñi tsi yu! —catyí ra.

³⁹ Tan ra tsa cuahán ityi nuu ican naha ra, catyí ra naha tsihin ra, nacasi ra yuhu ra. Maa tyin tsaa ca cana tsaa ra, tan catyí ra:

—¡Yooho, tata ra rey David! ¡Cundaahvi iñi tsi yu! —catyí ra.

⁴⁰ Tacan tan tsicuiñi ra Jesús. Tan tava tyiñu ra na cuhun ra naha cuquihin ra naha tsi ra. Tan cuhva tsa tsaa ra nu nyaá ra Jesús, tan nducú tuhun ra Jesús tsi ra:

⁴¹ —¿Náa cuñi un javaha yu tsihin un?

Tacan tan ra cuaa ican nacahan ra, tan catyí ra:

—Jutu Mañi yu, cuñi yu nanyehe yu —catyí ra.

⁴² Tacan tan catyí ra Jesús tsihin ra:

—Nanyehe. Tsa nduvaha tinuu un tyin tsinú iñi un tsi yu —catyí ra.

⁴³ Tan iin yaha ñi, nanyehe ra cuaa can. Tan cueta cuahán ra nyicún ra tsi ra Jesús. Tan jachahnú ra tsi Nyoo. Tan tandihi nyivi tsa nyehe tsa cuvi can, jachahnú ndihi tucu maa ñi tsi Nyoo.

19

Nu cuahán ra Jesús vehe ra Zaqueo

¹ Tacan tan quihvi ra Jesús ñuu Jericó. Tan cua yaha ra tsitsi ñuu. ² Tan ñuu can iyó iin ra cuca

xaan, nañi ra Zaqueo. Tan cuví ra ityi nuu tsihin ra tavá xuhun cuenda ra ndacá ñaha nda ñuu Roma. ³ Ra ihya cuñi xaan ra nacoto ra tsi ra Jesús. Tan ña cuví nyehe ra tsi ra tyin cuaha xaan nyivi cuahan tsihin ra. Tan maa ra ndiqui xaan ra. ⁴ Tacan tan tsinú xaan ra cuahán ra ityi nuu, tan ndaa ra iin nu yutun cahnu tsa nañi sicómoro tsa nyaá yuhu ityi nu cua yaha ra Jesús, tan cuví nyehe ra tsi ra Jesús. ⁵ Tan cuhva tsa quitá ra Jesús nu nyaá yutun can, nanyehe ndaa ra ityi siqui tan nyehe ra tsi ra Zaqueo. Tan catyí ra tsihin ra:

—Zaqueo, janumi nuu un nu yutun juvin. Tyin vityin cuñi tsi tsa cuhun yu yuvehe un —catyí ra tsihin ra.

⁶ Tacan tan numi xaan nuu ra Zaqueo. Tan sii xaan cuñi ra. Tan quihin ra tsi ra Jesús cuahán tsihin ra yuvehe ra. ⁷ Tan tsa nyehe nyivi tsa tacan cuvi, tandihi ñi quitsaha caahán nyaa ñi tsi ra Jesús. Tan catyí ñi tyin ndoó ra vehe iin ra iyó cuatyí. ⁸ Tan nu nyecú ra naha tsitsi vehe, ra Zaqueo tsinyaa nyityi ra. Tan catyí ra tsihin ra Jesús:

—Jutu Mañi yu, yuhu cua cuhva yu sava tsa iyó tsi yu tsi nyivi ndaahvi. Tan tatun jandavi ñaha yu tsi nyivi tan suhu yu tsa tsii ñi, vityin cua nacuhva cuenda yu cumi taahan ca tsaha tsi ñi —catyí ra tsihin ra.

⁹ Tacan tan catyí ra Jesús:

—Vityin cacu un, tan nyivi ra Abraham cuví tsi un. [Tyin nacuhva cuenda un tsi un tsi Nyoo tumaa nacuhva cuenda ra Abraham tsi ra tsi Nyoo.]

¹⁰ Tyin yuhu, Rayi tsa quee nda gloria, vatsí yu

vatsí nanducu yu tan vatsí jacacu yu tsi nyívi tsa cuanaa maa —catyí ra Jesús.

Nu jacuahā ra Jesús tsi yo na jaha tyiñu yo tsihin tsa tsahā Nyoo tsi yo
(Mt. 25.14-30)

¹¹ Tan tsitsi tsa tsiñí nyívi tsa caahán ra Jesús, tan quitsahā tsahá cuenda ra inga cuhva ihya tsi ñi. Tyin tsa cuñí tsaa ra ñuu Jerusalén. Tan nyívi cuñí maa ñi tyin tsa cua quitsaha cundaca ñaha ra ndacan. ¹² Tacan tan catyí ra:

—Tsicoo iin ra cuca tan tsa cuñí cuhun ra iin ñuu cañi. Tyin ndacan cua quihin cuenda ra tyiñu tsa cuvi ra rey, tyin tacan tan cua quitsi nuhu nyico ra ñuu ra. ¹³ Tsa ndi cumañi ca cuhun ra, cana ra utsi taahan musu ra. Tan tsahā cuenda ra iin xuhun tsi iin iin ra naha. Tan catyí ra tsihin ra naha: “Jaha tyiñu ndo tsihin xuhun ihya nda cuanda quitsi nyico yu”, catyí ra. ¹⁴ Maa tyin nyívi ñuu ra, ndasi cuñí ñi nyehé ñi tsi ra tan ña cuñí ñi tsa cundaca ñaha ra tsi ñi. Tan jacuhun ñi tsi ra cuhun cunyicun tsi ra, tyin cahan ra naha tyin ña cuñí ñi tsa cundaca ñaha ra tsi ñi. ¹⁵ Maa tyin ra ican cuvi maa ra rey. Tacan tan tsaa nyico ra nda ñuu ra. Tan quívi tsa tsaa ra, cana ra tsi musu ra, ra tsa nacoo ra xuhun tsihin. Tyin cuñí ra coto ra nácaa xuhun jahā canaa xuhun ra tsa nacoo ra. ¹⁶ Tan tsaa iin ra ican. Tan catyí ra: “Yooho taa, jahā canaa yu utsi taahan ca siqui xuhun tsa nacoo un tsi yu”, catyí ra. ¹⁷ Tacan tan catyí ra rey can tsihin ra: “Vaha xaan. Yooho cuvi musu vaha. Tyin javahā un ndihí tyiñu tsa tava yu tsi un. Tan vityin cua cundaca ñaha un utsi taahan ñuu”,

catyí ra rey can tsihin ra. ¹⁸ Tacan tan tsaa tucu inga ra tsa tsahā ra xuhun. Tan catyí ra: “Juhun xuhun ihya. Jahā canaa yu uhun taahan ca siqui xuhun tsa nacoō un tsi yu”, catyí ra. ¹⁹ Tacan tan catyí ra rey tsihin ra: “Yooho cua cundaca ñaha un uhun taahan ñuu”, catyí ra. ²⁰ Tacan tan tsaa tucu inga ra can. Tan catyí ra: “Juhun xuhun tsa tsahā un tsi yu. Yuhu naquihin vaha yu itsi tsitsi pañitu. ²¹ Tyin yuuhví xaan yu tsi un, tyin yooho xaan xaan un. Tyin tuhvá un naquihin tsa ñavin tsa tatsi un. Tan naquihín un ndaha tyiñu quita nu jahā tyiñu inga nyivi”, catyí ra can. ²² Tacan tan ra rey ican catyí ra tsihin ra: “Yooho musu ña vaha cuví un. Vityin juvin ñi tsihin tsa cahan un tsi yu, cua cahan yu tsi un. Tatun tsitó un tyin yuhu xaan yu, tan tsitó un tyin naquihín yu tsa ña tatsi yu, tan naquihín yu ndaha tyiñu inga nyivi, ²³ ¿nacuvi tyin ña tsityihí un xuhun yu banco tyin tsaa yu maa tyin tsa nandaa xuhun yu?” catyí ra rey can. ²⁴ Tan catyí ra tsihin ra nyecú ican: “Quinyaa ndo xuhun tsa tsahā yu tsi ra ihya, tan cuhva ndo tsi ra tsa jahā canaa utsi taahan ca siqui tsa tsahā yu tsi ra”, catyí ra. ²⁵ Tacan tan catyí ra naha tsihin ra rey can: “Maa tyin ra ican, tsa iyó utsi taahan tsi ra”, catyí ra naha. ²⁶ Tacan tan ra rey ican catyí ra: “Maa tyin catyí yu tsihin ndo tyin ra tsa vaha ca jahā tyiñu tsihin tsa tsahā yu tsi ra, cuaha ca cua cuhva yu tsi ra. Tan ra tsa tsahā yu luxu ñi, tan ña cuñi ra jahā tyiñu ra tsihin tsi, cua quinyaa yu tandihí can tsi ra. ²⁷ Tan tandihí nyivi xaan iñi tsi yu, ñi tsa ña cuñi tsa cundaca ñaha yu tsi ñi, ndaca ndo tsi ñi nyehe, tan cahñi ndo tsi ñi nuu yu ihya”,

catyí ra rey can —catyí ra Jesús.

Nu tsaq ra Jesús ñuu Jerusalén

(Mt. 21.1-11; Mr. 11.1-11; Jn. 12.12-19)

²⁸ Tsa yaha cahan ra Jesús yacan, tan jañihí ra cuahán ra ñuu Jerusalén. ²⁹ Tacan tan tsa cuñí tsa ra ñuu Betfagé tsihin ñuu Betania, yatyin ñi iin yucu tsa nañí Olivo, [tyin maa ñi maa yutun olivo iyó ican]. Tava tyiñu ra tsi uvi taahan ra tsicá tsihin ra. ³⁰ Tan catyí ra tsihin ra naha:

—Cuaahan ndo ñuu tsa canyíi yatyin ñi ihya. Ican cua nañihi ndo iin burru luhlu, quiti tsa ñaha ca quihí tyayu. Nuuhñí ti. Ndatsi ndo tsi ti. Tan quitsi ndaca ndo tsi ti tsi yu. ³¹ Tatun yóo tsicá tuhun tsi ndo: “¿Nacuenda ndatsí ndo tsi ti?” catyí ndo tsihin ñi: “Ndatsí ndi tsi ti tyin tsiñí ñuhu ti tsi ra ndacá ñaha.”

³² Tacan tan ra tsicá tsihin ra, cuahán ra naha. Tan nañihí ra naha tsi ti tumaa tsa cahan maa ra tsihin ra naha. ³³ Tan cuhva tsa ndatsí ra naha tsi ti, tsaq tsitoho ti. Tan nducu tuhun ra can naha ra tsi ra naha tan catyí ra:

—¿Nacuenda ndatsí ndo burru ihya? —catyí ra naha. ³⁴ Tacan tan nacaahan ra can naha ra:

—Ndatsí ndi tsi ti tyin tsiñí ñuhu ti tsi ra ndacá ñaha —catyí ra naha.

³⁵ Tacan tan quihín ra naha tsi ti. Tan tsindaca ra naha tsi ti nu nyíi ra Jesús. Tan tyiso ra naha jahma ra naha tsata ti. Tacan tan jandaq ra naha tsi ra Jesús tsata ti. ³⁶ Tacan tan cuahán ra Jesús. Tan cuaha xaan nyívi cuahán tsihin ra tsaquín ñi jahma ñi nu ñuhu ityi nu cua yaha ra, yosó ra burru ican. ³⁷ Tsa tsa cua cuyatyin tandihí nyívi tan ra Jesús nu iñi nuu yucu Olivo, quitsaha caná tsa

tandihi ñi tsinú iñi tsi ra tsihin tsa sñi cuñí ñi. Tan jacahnú ñi tsi Nyoo tyin cuaha xaan tsa iyo javahā ra nyehe ñi. ³⁸ Tan catyí ñi:

—¡Na jacahnu yo tsi ra Rey ihya tyin vatsí ra tsihin sivi Nyoo Jutu yo! ¡Tan na coo tsa taxin andivi! ¡Tan na jacahnu yo tsi Nyoo! —catyí ñi.

³⁹ Tacan tan juhva ra fariseo tsa cuahán tsihin ñi, catyí ra naha:

—Maestro, jacutaxin tsi nyivi ihya —catyí ra naha.

⁴⁰ Tan nacahan ra Jesús tan catyí ra:

—Tatun nyivi ihya tan cutaxin ñi, yuu cua cana tsaa, tan cua jacahnu tsi tsi yu —catyí ra Jesús.

⁴¹ Tacan tan tsa tsaā ra Jesús yatyin ñi yuhu ñuu Jerusalén, nanyehe ra ñuu can tan quitsahā tsacú ra tsa cuihya cuñí ra. ⁴² Tan catyí ra:

—Vaha xaan tun tsatyin cuvi coto ndo tan cutuñí iñi ndo nácaa ñihi ndo tsa taxin coo añima ndo vityin ihya. Maa tyin xeehe xaan yihí tsa vaha can, tan ña cuví nañihi ndo can. ⁴³ Coo quivi cua nyehe ndo tundoho jaha nu xaan iñi tsi ndo cua tyihi cutu nahnu tsi ndo. Tandihí ityi cua quitsi nahnu. Tan cañi tahan nahnu tsihin ndo. ⁴⁴ Tan cua caquin nahnu tsi ndo nu ñuhu tan cua cahñi nahnu tsi ndo. Tan ndi intuhun ca yuu tsa yosó toto tan ña cua nacoo ca nahnu. Tacan cua cuvi tyin maa ndo ña cuñí ndo nacoto ndo tyin tsa vatsí Nyoo, vatsí jacacu ra tsi ndo.

Nu tavā ra Jesús tsi nu xicó tsitsi vehe ñuhu cahnu nahnu

(Mt. 21.12-17; Mr. 11.15-19; Jn. 2.13-22)

⁴⁵ Tacan tan quihvi ra Jesús tsitsi cora vehe ñuhu cahnu. Tan quitsahā tavá ra tandihí nyivi xicó tan

nyivi jatá tsa yucú nu quehe. ⁴⁶ Tan catyí ra tsihin nahnu:

—Nu tutu Nyoo catyí tyin vehe Nyoo, nu tsicán tahvi yo tsi ra cuví tsi. Tan nyoooho jananduví ndo itsi vehe ñasuhu —catyi ra Jesús.

⁴⁷ Tan tandihí quivi tsaahán ra Jesús tsijacuahá ra tsi nyivi tsitsi vehe ñuhu cahnu can. Maa tyin ra jutu tsa cuví ityi nuu naha ra, tan ra maestro cuenda ley vehe ñuhu naha ra, tan ra cuví mandoñi ñuu Jerusalén can, nducú ra naha cuhva cahñi ra naha tsi ra. ⁴⁸ Maa tyin ña ñihí maa ra naha nácaa javaha ra naha tyin tandihí nyivi tan vaha tyaa soho ñi tsa caahán ra Jesús.

20

Nu tsicá tuhun ra cumi tyiñu vehe ñuhu naha ra tsi ra Jesús yoo tava tyiñu tsi ra tsa cahan ra tsihin nyivi

(Mt. 21.23-27; Mr. 11.27-33)

¹ Iin quivi jacuahá ra Jesús tsi nyivi tsitsi vehe ñuhu cahnu, tan caahán ra nácaa jacacú Nyoo tsi ñi. Tan tsaá ra jutu tsa cuví ityi nuu naha ra tsihin ra maestro cuenda ley vehe ñuhu naha ra, tan tsihin tucu ra cuví mandoñi naha ra. ² Tan catyí ra naha tsihin ra Jesús:

—Catyi tuhun tsihin ndi ¿yoo tava tyiñu tsi un javaha un tyiñu ihya? —catyí ra naha.

³ Tacan tan ra Jesús catyí ra tsihin ra naha:

—Yuhu cuñi tucu yu nducu tuhun yu tsi ndo.

⁴ ¿Yoo jaquitsi tsi ra Juan tyin jacoondutya ra tsi nyivi? ¿A Nyoo jaquitsi tsi ra, a nyivi?

⁵ Tacan tan ra ican naha ra quitsahá caahán yuhu tahan ra naha tan catyí ra naha:

—Tun catyí yo tyin Nyoo jaquitsi tsi ra Juan, cua catyí ra tsihin yo nacuenda ña tsinu iñi yo tsa caḥan ra Juan. ⁶ Tun catyí tucu yo tyin nyivi jaquitsi tsi ra, tandihí nyivi cua caḥñi ñi tsi yo tsihin yuu. Tyin tandihí ñi, tan cuñi ñi tyin ndusu yuhu Nyoo cuvi ra Juan —catyí ra naha.

⁷ Tacan tan nacahan ra naha tsihin ra Jesús tyin ña tsitó ra naha yóo tava tyiñu tsi ra Juan jacoondutya ra tsi nyivi. ⁸ Tacan tan ra Jesús catyí ra tsihin ra naha:

—Ndi yuhu, tan ña cua catyí tuhun yu tsihin ndo yóo tava tyiñu tsi yu tsa javaha yu tyiñu ihya.

Nu jacuahā ra Jesús tyin tumaa cuví juhva ra caquiñi naha ra, tacan cuví ra tsa cua caḥñi tsi ra (Mt. 21.33-44; Mr. 12.1-11)

⁹ Tacan tan tsahā cuenda ra Jesús iin cuhva ihya tsi nyivi:

—Iin ra, tatsi cuaha ra nu ñuhu ra yoho tsiti yucu tsa cua cuvi vinu. Yahā can tan tsahā nuu ra ñuhu can tsi juhva ra jahá tyiñu. Tacan tan naha cuahán ra inga ñuu. ¹⁰ Tan quivi tsa iñi tsiti nu yoho can, tacan tan jacuhun ra iin musu tyin naquihin ra juhva tsiti tsa taahán tsi tsi maa ra. Maa tyin cañi xaan ra jahá tyiñu ican naha ra tsi musu can. Tan nundii ra jacunuhu ra naha tsi ra. ¹¹ Tacan tan tsitoho yoho can jacuhun ra inga musu. Juvín ñi cañi xaan ra can naha ra tsi ra. Tan caḥan nyaa ra naha tsi ra. Tan jacunuhu ra naha tsi ra. Tan juvin ñi nduve tsa tsahā ra naha cuiso ra cunuhu ra. ¹² Tacan tan ra cuví tsitoho yoho can jacuhun nyico ra inga ra. Maa tyin juvin ñi tacan javahā

nyico ra naha tsihin ra can. Tan jañicuehe ra naha tsi ra. Tan tava ra naha tsi ra.

¹³ 'Yaha can tan catyí tsitoho ñuhu ican: “¿Nacaa cua javaha yu vityin? Vaha ca cua jacuhun yu sehe yu, ra tsa cuñi xaan yu. Vasiqi cua tyaa yahvi ra naha tsi ra, tyin sehe yu cuví tsi ra”, catyí ra.

¹⁴ Maa tyin tsa nyehe ra jahá tyiñu can naha ra tsi ra sehe ra, natuhún tahan ra naha: “Juvín ra ihya cua ndoo tsihin ñuhu ihya tatun cúu jutu ra. Vaha ca na cahñi yo tsi ra. Tacan tan ndoo maa yo tsihin ñuhu ihya”, catyí ra naha. ¹⁵ Tacan tan tava ra naha tsi sehe tsitoho ñuhu ican ityi tsata cora, tan tsahñi ra naha tsi ra —catyí ra Jesús.

Tacan tan catyí ra Jesús tsihin nyivi nyecú ican:

—¿Náa cua javaha tsitoho ñuhu ican tsihin ra can naha ra tyin tsahñi ra naha sehe ra? ¹⁶ Catyí yu tsihin ndo tyin cua quitsi ra tan cua cahñi ra tsi ra jahá tyiñu ican naha ra. Tan cua cuhva ra ñuhu ican tsi inga ra naha —catyí ra Jesús.

Tan tsa tsiñi nyivi tsa caahán ra, nayuhvi xaan ñi cuví. Tan catyí ñi:

—¡Ña cuñi Nyoo tahan yo tacan! —catyí ñi.

¹⁷ Maa tyin ra Jesús nanyehe ra nuu ñi tan catyí ra:

—Tun tacan tsicá iñi ndo ¿náa cuñi tsi catyí tsa nyaá nu tutu Nyoo? Tyin catyí tsi tyehen: Yuu tsa ña cuñi ra javaha vehe cuatyíñu ra, yacan cuví yuu tsa tsiñi ñuhu ca.

¹⁸ Yóo nyivi cua canacava tsata yuu can, cua tahnú cuatyí ñi. Tan tatun maa yuu can canacava tsata ñi cua taxin nyihi ñi —catyí ra Jesús.

¹⁹ Tan ra jutu tsa cuví ityi nuu naha ra tan ra maestro cuenda ley vehe ñuhu naha ra, tuví iñi

ra naha tyin tsa caḥan ra Jesús tacan, tsi maa ra naha nañi can. Tan cuñi ra naha tiin ra naha tsi ra tyin cañi ra naha tsi ra. Maa tyin ña tsitó maa ra naha nácaa javaha ra naha, tyin nayuhvi ra naha tsi nyivi.

Nu jacuahā ra Jesús tsa cuenda tsa tyahvi nyivi xuhun tsi ra ndacá ñaha ñuu Roma (Mt. 22.15-22; Mr. 12.13-17)

²⁰ Tacan tan jacuhun ra naha tsi juhva ra nducu cuhva tsi ra Jesús. Tan jahā ra naha tyin ra vaha cuví ra naha. Tyin tacan tan coto ra naha náa tsa ña vaha cua cahan ra Jesús tan cuví tiin ra naha tsi ra. Tan cuhva cuenda ra naha tsi ra tsi ra ndacá ñaha. ²¹ Yacan tsicā tuhun ra naha tsi ra Jesús:

—Maestro, tsitó ndi tyin vaha tsa caahán un. Tan jacuahá un tsa vaha tsi nyivi. Tan ñavin cuhva iyó ñi nyehé un maa tyin nyehé un cuhva iyó ña ñi. Tan maa ñi maa tsa nditsa tyin ityi Nyoo janahá un. ²² Catyi tsihin ndi ¿a vaha tsa tyahvi yo tsa tsicán ra ndacá ñaha nda ñuu Roma tsi yo, a ña vaha? —catyí ra naha.

²³ Tan ra Jesús tuvī iñi ra tyin nducu cuhva ra naha tsi ra. Tan catyí ra tsihin ra naha:

—¿Nacuenda cuñi ndo nducu cuhva ndo tsi yu?

²⁴ Janaha jihna ndo iin xuhun tsi yu, na nyehe yu. ¿Yóo nuu nyaá xuhun can tan yóo sivi nyaá can? —catyí ra.

Tacan tan nacahan ra naha:

—Nuu ra ndacá ñaha, ra cuví rey cahnu, nyaá can tan juvin ñi sivi ra nyaá can —catyí ra naha.

²⁵ Tacan tan catyí ra Jesús:

—Tun tacan, cuhva ndo xuhun can tsi ra ndacá ñaha tyin tsii maa ra cuví tsi. Tan cuhva ndo tsi

Nyoo tsa taahán tsi tsi ra —catyí ra Jesús tsihin ra naha.

²⁶ Tan ña cuví maa jandavi ñaha ra naha tsi ra Jesús tsihin tsa caahán ra tacan tsihin nyívi. Tan iyo xaan cuñí ra naha tsa nacahan ra. Tan taxin ña cuví ra naha.

Nu cuñí ra cuví saduceo naha ra jandavi ñaha ra naha tsi ra Jesús

(Mt. 22.23-33; Mr. 12.18-27)

²⁷ Tsa yahá can tan tsaá juhva ra cuví saduceo nu nyíí ra Jesús. Maa ra naha cuví ra tsa catyí tyin ña nandoto nyívi tun tsa tsihi ñi.

²⁸ Tacan tan catyí ra naha tsihin ra Jesús:

—Maestro, jandoo ra Moisés tyiñu ihya tyin tatun iin ra tsihi tan nandoo ñasihi ra, tatun nduve sehe ra tsicoo tsihin ña, taahán tsi tsa tindaha ra cuví yañi ra tsihin ña, tan coo sehe ra tsihin ña tsa cuenda ra yañi ra. ²⁹ Maa tyin cuñí ndi coto ndi nácaa, tyin tsicoo iin ra tan tsicoo utsa sehe ra. Tan ra tsa ñihi ca tsicoo ñasihi ra, maa tyin nduve sehe ñi tsicoo, tan tsihi ra. ³⁰ Tacan tan naquihin ra tsa tsinu uvi tsi ña can. Tan nduve tucu sehe ñi tsicoo. Tan tsihi tucu ra can. ³¹ Tan juvin ñi tacan javahá ra tsinu uñi. Tandihí tsa utsa ra naha javahá tacan. Ndi intuhun ra tan ña tsicoo sehe ra tsihin ña. ³² Tan nu ndihí tuhun tsihi ndihí maa ña. ³³ Tan cuñí ndi coto ndi yóo ra cua cuvi yí ña tsitsi tsa tandihí tsa utsa taahan ra naha quívi cua nandoto nyívi —catyí ra saduceo naha ra.

³⁴ Tacan tan nacahan ra Jesús, tan catyí ra:

—Ihya nu ñuhu ñayívi, rayí tan ñaha tindahá ñi.

³⁵ Maa tyin nyívi tsa nacatsi Nyoo tyin nandoto ñi tan coo ñi nu ndacá ñaha ra, ña tindaha ca ñi

tan ndi ña cua cuhva ca ñi sehe ñi tindaha. ³⁶ Tan nduve tuhun tsihi iyó ndacan tyin cua cuvi ñi tu-maa ángel. Tan cua cuvi ñi sehe Nyoo tyin nandoto ñi. ³⁷ Tan tsa cuenda tuhun tsa nandoto ndiyi. Tsa nditsa cuvi tsi tyin yacan jacoto ra Moisés nu nacatyí tuhun ra nácaa cayú taca iñu can. Tsihin can jacoto ra tsi yo tyin nyivi tsihi cua nandoto ñi. Tyin catyí ra: “Jutu yo Nyoo cuenda ra Abraham, tan cuenda ra Isaac, tan cuenda ra Jacob”, catyí ra Moisés. ³⁸ Tacan catyí ra tyin Nyoo, ñavin Nyoo cuenda nyivi tsihi cuvi ra. Nyoo cuenda nyivi nyito cuvi ra. Tyin tsa cuenda Nyoo tandihi yo tan nyito aña yu vasu tsa tsihi cuñu ñuhu yo —catyí ra Jesús.

³⁹ Tacan tan juhva ra maestro cuenda ley vehe ñuhu naha ra catyí ra naha:

—Vaha xaan nacahan un, Maestro —catyí ra naha.

⁴⁰ Tacan tan ña cana ca maa iñi ra naha nducu tuhun ra naha náa inga ca nducu tuhun ra naha tsi ra.

Ra Cristo cuvi ra tata ra David, tan juvin ñi cuvi tucu ra Sehe Nyoo

(Mt. 22.41-46; Mr. 12.35-37)

⁴¹ Tacan tan tsica tuhun ra Jesús tsi ra naha:

—¿Nacuenda catyí yo tyin ra Cristo tata ra David cuvi tsi ra? ⁴²⁻⁴³ Tyin juvin ñi maa ra David catyí ra nu libru Salmo:

Caahan Nyoo Jutu yu tsihin Jutu Mañi yu, ra Cristo, tan catyí ra tsihin ra:

“Cunya xiin cuaha yu nda cuanda cuhva yu tsi nu xaan iñi tsi un tyin cuhvi tsaha un tsi

nahnu”, catyí Nyoo tsa tsatyiñu ra yuhu ra David tahañ tsanaha.

⁴⁴ ¿Nacaa tsa tata ra David cuví tucu ra Cristo, tan juvin ñi maa ra David catyí tyin Jutu Mañi ra cuví tsi ra Cristo? —catyí ra Jesús.

Nu cahan ra Jesús tyin cuaha xaan cuatyí ra maestro cuenda ley vehe ñuhu iyó

(Mt. 23.1-36; Mr. 12.38-40, Lc. 11.37-54)

⁴⁵ Tandihí nyívi tsiñi ñi tsa cahan ra Jesús tsihin ra tsicá tsihin ra nu cahan ra tyehen:

⁴⁶ —Jaha ndo cuenda tsi ndo tsihin ra maestro cuenda ley vehe ñuhu naha ra. Tyin taahán xaan iñi ra naha cunditsi ra naha jahma nañi. Tan cuahan ra naha nuyahvi, cuñí ra naha tsa cuhva nyívi yucú nuyahvi nacumi tsi ra naha tsihin tsa jaha ñi tsa ñayívi tsi ra naha. Tan nanducú ra naha tyayu vaha cunyecú ra naha tsitsi vehe ñuhu, tan nu cuahán ra naha vico. ⁴⁷ Tan naha tsicán tahvi ra naha tsi Nyoo nu tuví, tsa cuñí ra naha tsa nyehe nyívi tan catyí ñi tyin vaha xaan nyívi cuví ra naha. Maa tyin juvin ñi maa ra naha cuví ra quinyaa vehe ñi ndaahvi tsa tsihi yí tyin ña cuví tyahvi ñi xuhun tsa tavá ra naha tsi ñi. Yacan ñihi xaan cua tatsi tuñi Nyoo tsi ra naha —catyí ra Jesús.

21

Tsa jamañi iin ñaha ndaahvi tsa tsihi yí

(Mr. 12.41-44)

¹ Tan nyehe ra Jesús tyin cuaha xaan nyívi cuca tyihí ñi xuhun tsitsi caja tsa nyíi tsitsi vehe ñuhu cahnu. ² Tan nyehe tucu ra tsi iin ñaha ndaahvi tsa

tsihí yí. Tan tyihí ña uvi taahan ñi xuhun nyihi.

³ Tan catyí ra:

—Tsa nditsa catyí yu tsihin ndo tyin nuu Nyoo cuaha ca xuhun tyihí ñaha ndaahvi ihya tan ñavin ca tandihí ñi cuca can. ⁴ Tyin tsa ndoo ña tyihí ñi. Tan ñaha ihya tyihí ña tandihí tsa iyó tsi ña —catyí ra.

Nu cahan ra Jesús tyin cua tani vehe ñuhu cahnu (Mt. 24.1-2; Mr. 13.1-2)

⁵ Tacan tan juhva nyívi natuhún ñi tuhun cuenda vehe ñuhu cahnu ican. Tan catyí ñi tyin síi xaan caá yuu. Tan síi xaan caá tsa jamañi nyívi. Tacan tan catyí ra Jesús:

⁶ —Coo quívi tan cua tani tandihí tsa nyehé ndo ihya. Tan ndi intuhun ca yuu tan ña cua coso ca siqui inga tsi. Ndihi tsi cua cani nu xaan iñi tsi ndo.

Tsa cua cuvi tsa ndi cumañi ca naa ñuhu ñayívi (Mt. 24.3-28; Mr. 13.3-23)

⁷ Tacan tan nducú tuhun nyívi tsi ra Jesús, tan catyí ñi:

—Maestro, ¿ama cua cuvi tandihí tsa caahán un ihya? ¿Nacaa tan coto ndi tatun tsa cuyatyin tsa naa ñuhu ñayívi? —catyí ñi.

⁸ Tacan tan catyí ra Jesús:

—Jaha vaha ndo cuenda, coto jandavi ñaha nyívi tsi ndo. Tyin cuaha xaan ra cua quitsi, tan cua cuatyíñu ra naha sívi yu, tan cua catyí ra naha: “Yuhu cuví Cristo, ra tsa jaquitsi Nyoo. Tyin tsa cuñi naa ñuu ñayívi”, cua catyí ra. Maa tyin ña cunycun ndo tsi ra naha. ⁹ Tan quívi cua ñihi tuhun ndo tyin tsa iyó cuatyí tan ñihi cañi tahan nyívi, ña nayuhvi ndo. Tyin tandihí can taahán tsi

cuví tsa jihna ñi. Maa tyin cumañi ca tsaa quiví tsa
cua naa ñuhu ñayiví.

¹⁰ Tan catyí tucu ra:

—Nyiví iyó iin ñuu cua cañi tahan ñi tsihin nyiví
inga ñuu. Tan cua coo cuatyí. ¹¹ Tan ñihi xaan cua
taan. Tan cua coo tama. Tan cua coo cuehe tandihí
ñi ityi. Tan cua nyehe nyiví tsa yuuhví ityi andiví.
Tan cuaha xaan tsa iyo nahnu tsa ña tuhvá nyiví
nyehe tan cua nyehe ñi. ¹² Maa tyin tsa ndi cumañi
ca cuví yacan, cua cuxaan iñi nyiví tsi ndo. Tan cua
ndacan ñi cuatyí tsaha ndo. Tyin cua cutuñi ndo
tan cua cuhva cuenda ñi tsi ndo tsi ra jutu. Tan
cua tyihí ñi tsi ndo tsitsi vehe caa. Tan cua cundaca
ñi tsi ndo nuu rey tan nuu ra ndacá ñaha tsacatyí
siví yuhu. ¹³ Tacan tan cuví cahan ndo tuhun yu
tsihin ñi. ¹⁴ Maa tyin jaha ndo cuenda tan ña cua
caca iñi ndo náa tuhun cua nacahan ndo tsihin ra
ndacá ñaha ican. ¹⁵ Tyin yuhu cua cuhva yu tuhun
cua cahan ndo. Tan cua cuhva yu tsa nyityi jiñi
ndo nu cua cahan ndo. Ndi intuhun nu xaan iñi
tsi ndo tan ña cuví jaha nahnu tsi ndo. ¹⁶ Maa
tyin nyiví cua cuhva cuenda ñi tsi ndo tsi nu xaan
iñi tsi ndo. Nda cuanda jutu ndo tan sihi ndo, ra
cuví yañi ndo, nyiví ndo, tan ra vaha iñi tsi ndo
cua cuhva cuenda ra naha tsi ndo tsi nu xaan iñi
tsi ndo. Tan yihí nyoocho cua cahñi nyiví tsi ndo.
¹⁷ Tandihí nyiví tan ndasi cua cuñi ñi nyehe ñi tsi
ndo tsacatyí yuhu. ¹⁸ Maa tyin ndi intuhun ixi jiñi
ndo tan ña cua cunaa. ¹⁹ Tatun ña ndu uvi iñi ndo
tsa nyicun ndo tsi yu, cua cacu ndo.

²⁰ 'Quiví cua nyehe ndo tyin nñi canduvi yuhu
ñuu Jerusalén ihya nyecú andaru, coto ndo tyin tsa
cuñi naa ñuu ihya. ²¹ Tan nyiví iyó ñuu tsa cayucú

Judea, cua cunu ñi tan cuhun xeehe ñi ityi yucu. Tan nyivi iyó ñuu Jerusalén ihya, cua quita ñi. Tan nyivi iyó tsitsi cuhu, ña cua quitsi nuhu ñi ñuu ihya. ²² Tyin yacan cuví quivi tsa cua tatsi tuñi Nyoo tsi nyivi ñuu ihya. Tyin tsa cua cuvi tandihi cuhva catyí nu tutu Nyoo. ²³ Tan ndahvi ñiñaha tsa ñuhú sehe quivi can. Tan ndahvi ñi tsa iyó sehe lee tsa ndi tyaxín. Tyin cuaha xaan tundoho cua nyehe ñi tan tandihi nyivi. Tyin cahnu xaan tsa uhvi cua nyehe nyivi ñuu Jerusalén ihya cua jaha Nyoo. ²⁴ Andaru cua cahñi ra naha tsi juhva nyivi tsihin mityi. Tan cua tñin ra naha juhva ñi tan cundaca ra naha tsi ñi ñuu nahnu. Tan nyivi tsa ñavin nyivi Israel cuví, cua cuyucu ñi ñuu Jerusalén ihya nda cuanda quivi tsa catyí maa Nyoo.

Nacaa cua quitsi Rayi tsa quee nda gloria inga tsaha

(Mt. 24.29-35, 42-44; Mr. 13.24-37)

²⁵ Tacan tan cuaha tsa iyo cua nyehe nyivi nu ñicanyii, tan nu yoo, tan nu tiñuu. Tan ihya nu ñuhu ñayivi cua nayuhvi ñi tsihin tsa iyo cua nacatyin ndutya ñuhu. ²⁶ Tan cua cúu naaha ñi tsihin tsa yuuhví ñi tsa tsicá iñi ñi náa ndihi tsa cua cuvi ihya nu ñuhu ñayivi. Tyin nda cuanda tsa iyó andivi cua nacanda tan taan. ²⁷ Tacan tan cua nyehe ñi tsi yuhu, Rayi tsa quee nda gloria, vatsi nuu yu tsitsi vico tsihin tunyee iñi Nyoo, tan tsihin tsa cahnu cuví ra. ²⁸ Tan cuhva tsa cua quitsaha yacan tan jandu iin ndo iñi ndo tan cusi iñi ndo tyin numi xaan cua cacu ndo —catyí ra.

²⁹ Tacan tan tsaha cuenda ra Jesús iin cuhva ihya, tan catyí ra:

—Jaha ndo cuenda yutun higuera, tsihin tandihi ca yutun. ³⁰ Tatun tsa nduyutyá numa tun tsa cuyatyin cuun savi. ³¹ Tan tacan tucu nyoocho, tatun tsa nyehe ndo tyin tsa quitsahá cuví tandihi tsa cahan yu tsihin ndo, coto ndo tyin tsa nyanaá quívi tsa cundaca ñaha Nyoo nu ñuhu ñayívi ihya.

³² 'Maa tyin tsa nditsa catyí yu tsihin ndo tyin yacan cua cuví jihna tsa ndi cumañi ca cúu nyívi tsa iyó nu ñuhu ñayívi. ³³ Coó quívi cua naa andívi tan ñuhu ñayívi, maa tyin tuhun caahán yu, ña cua cundihi tsi.

³⁴ 'Tan jaha ndo cuenda tsi ndo coto ndundava iñi ndo tsihin tsa cua javaha ndo tsa caquiñi, a tsa coho ndo nyixi, a tsa caca xaan iñi ndo tundoho ñayívi ihya. Jaha ndo cuenda coto ndundava iñi ndo tsihin yacan. Tan coto sana iñi ndo tan quita quívi cua quitsi yu tan cua quitsi tundoho cua nyehe ndo. ³⁵ Tyin tacan cua cuví, tandihi nyívi iyó nu ñuhu ñayívi, sana iñi ñi tan tumaa iin tsa cua nacasi Nyoo nu yucú ñi tan ña cua cuví quita ñi. ³⁶ Maa tyin nyoocho cuatu ndo. Nďacan tahvi ndo tsi Nyoo tandihi quívi, na jacacu ra tsi ndo. Tan ña nyehe ndo tandihi tundoho tsa cua coo. Nďacan tahvi ndo, tacan tan cua cuví tsaa ndo nu nyaá yuhu, Rayi tsa quee nda gloria —catyí ra Jesús.

³⁷ Tan tandihi quívi jacuahá ra Jesús tsi tandihi nyívi tsitsi vehe ñuhu cahnu. Tan tsa tsacuaa tsicá ra yucu Olivo. ³⁸ Tan tandihi nyívi tsaa ñi tsitsi vehe ñuhu cahnu ndihi tsa tuvi, tyin tyaa soho ñi tsa caahán ra.

Nu cua xico ra Judas Iscariote tsi ra Jesús

(Mt. 26.1-5, 14-16; Mr. 14.1-2, 10-11; Jn. 11.45-53)

¹ Tan tsa nyanaá yatyin quiví tsa cua coo vico pascua, vico nu tuhvá nyívi tsatsí paan tsa nduve yutsan iya yihí. ² Tan ra jutu tsa cuví ityi nuu naha ra tsihin ra maestro cuenda ley vehe ñuhu naha ra, nducú xaan ra naha cuhva cahñi ra naha tsi ra Jesús. Maa tyin yuuhví ra naha tsi nyívi.

³ Tacan tan quihví nu ña vaha tsi nu Judas Iscariote. Tan nu ihya cuví iin tsa utsi uvi taahan ra tsa nacatsi ra Jesús. ⁴ Tan nu ihya, tsahan nu tsicahan nu tsihin jutu tsa cuví ityi nuu tan tsihin ra yihí ndaha tsi ra jahá cuenda vehe ñuhu cahnu naha ra. Tan natuhun tahan ra naha nácaa cua cuhva cuenda nu Judas tsi ra Jesús tsi ra naha. ⁵ Tan ra ican naha ra sii xaan cuñi ra naha. Tan tyihí ra naha cuhva tyin cuhva ra naha xuhun tsi ra Judas. ⁶ Tan ra Judas ndoo ra vaha. Tan quitsaha nducú ra cuhva ama cua nacuhva cuenda ra tsi ra Jesús tsi ra can naha ra, cuhva tsa nduve nyívi yucú tsihin ra Jesús.

Nu cuxiñi ra Jesús tsihin ra tsicá tsihin ra

(Mt. 26.17-29; Mr. 14.12-25; Jn. 13.21-30; I Co. 11.23-26)

⁷ Tan tsaá quiví tsa cuví vico tsa tsatsí nyívi paan tsa nduve yutsan iya yihí. Tan juvin ñi quiví ican tuhvá ñi tsahñi iin mbee luhlu tsa vico pascua can. Tyin catsi ñi tsi ti. ⁸ Tan ra Jesús jacuhun ra tsi ra Pedro tsihin ra Juan, tan catyí ra tsihin ra naha:

—Cuaahan ndo cujanduvaha ndo mbee tsa cua cuxiñi yo cuenda vico pascua —catyí ra.

⁹ Tacan tan nducú tuhun ra naha tsi ra:

—¿Numaa cuñí un javaha ndi tsa cuxiñi yo?
—catyí ra naha.

¹⁰ Tacan tan catyí ra Jesús tsihin ra naha:

—Cuaahan ndo tsitsi ñuu. Ican cua nañihi ndo tsi iin ra nyisó iin quiyi ndutya. Cuaahan ndo tsata ra tan quihvi ndo vehe nu quihvi ra. ¹¹ Tan catyí ndo tsihin tsitoho vehe can: “Ra cuví Maestro, cuñí ra coto ra numaa nyaá cuarto nu cua cuxiñi ra tsihin ra tsicá tsihin ra, tyin jacahnu ra vico pascua.” Tacan catyí ndo tsihin ra. ¹² Tacan tan cua janaha ra iin cuarto cahnu ityi siqui, nu tsinu uvi pisu tsi ndo. Tan tsa nduvahā maa tsi. Tan ndacan cua javaha ndo tsa cuxiñi yo —catyí ra tsihin ra naha.

¹³ Tacan tan cuahán ra naha. Tan nañihi ra naha tandihi tumaa tsa cahān ra Jesús. Tacan tan na icā vaha ra naha tsa cuxiñi ra naha cuenda vico pascua.

¹⁴ Tacan tan tsa tahān tsi cuhva tsa cuxiñi ra Jesús tsihin tandihi ra tava tyiñu ra, tsinyecu ra naha yuhu mesa. ¹⁵ Tacan tan catyí ra Jesús:

—Cuñí xaan yu cuxiñi yu tsihin ndo cuenda vico pascua ihya tsa ndi cumañi ca nyehe yu tundoho tan cúu yu. ¹⁶ Tan catyí yu tsihin ndo tyin ña cua catsi ca yu inga tsaha tsa cuenda vico ihya, nda cuanda tahan tsi inga tsaha nda nu ndacá ñaha Nyoo —catyí ra.

¹⁷ Tacan tan quihin ra iin vasu vinu. Nacuhva ra tyahvi nyoo tsi Nyoo. Yahā can tan catyí ra tsihin ra nyecú tsihin ra:

—Quihin ndo tsehe. Tan coho ndo luxu luxu.

¹⁸ Tyin catyí yu tsihin ndo tyin ña cua coho ca yu vinu nda cuanda quitsi Nyoo tan quitsaha cundaca ñaha ra nu ñuhu ñayivi ihya —catyí ra.

19 Yaha can tan quih̄in ra paan, tan tsah̄a ra tyahvi nyoo tsi Nyoo, tan tsahnya sava ra can. Tsahan tsah̄a ra can tsi ra naha. Tan catyí ra tsihin ra naha:

—Paan ihya cuví tumaa cuñu ñuhu yu. Tyin cua cuhva cuenda yu tsi yu tan cúu yu tsa cuenda tsa vaha tsi maa ndo. Tacan cuñí tsi nducuhun iñi ndo tsi yu tan cuxiñi ndo tyehen —catyí ra.

20 Tan tsa yah̄a cuxiñi ra naha, tacan tan quih̄in ra vasu vinu, tan catyí ra:

—Tsihin vinu ihya ndoó Nyoo tyiñu tsihin ndo vityin. Tyin vinu tsa yihí tsitsi vasu ihya, tumaa niñi yu cuví tsi. Tan tsa vaha tsi nyooho tan cua cati niñi yu. Tan cua cúu yu.

21 'Maa tyin vityin, ra tsa cua nacuhva cuenda tsi yu tsi ra xaan iñi tsi yu, iin ñi nu yosó ndaha ra tsihin ndaha yu nu mesa ihya. 22 Tyin yuhu, Rayi tsa quee nda gloria, cua tahan yu tumaa tsa nyaá maa tsa cua tahan yu. Maa tyin jndahvi ra tsa cua nacuhva cuenda tsi yu! —catyí ra Jesús.

23 Tacan tan ra tsicá tsihin ra Jesús quitsah̄a nducú tuhun tahan ra naha, ndáa ra cua nacuhva cuenda tsi ra Jesús tsi ra xaan iñi tsi ra.

Nu cah̄an yuhu tahan ra tsicá tsihin ra Jesús, yóo ra cahnu ca cuví

24 Yaha can tan quitsah̄a caahán yuhu tahan ra tsicá tsihin ra Jesús, ndáa ra cahnu ca cuví. 25 Tan ra Jesús catyí ra:

—Tsitó nyooho tyin ra ndacá ñaha tsi nyivi iyó nu ñuhu ñayivi, ñihi xaan ndacá ñaha ra naha tsi ñi. Tan cuñí ra naha tyin catyi nyivi tyin jatyinyeé ra naha tsi ñi. 26 Maa tyin nyooho ña taahán tsi

javaha ndo tumaa javahá ra ican naha ra. Tyin tatun cuñí ndo cuví ndo ra cuví ityi nuu, taahán tsi janduluhlu ndo tsi ndo. Tan tatun cuñí ndo cundaca ñaha ndo, cuñí tsi tsa cuví ndo musu tandihí ndo. ²⁷ Tyin nu ñuhu ñayivi ihya, ra cuví ityi nuu cuví ra tsa ña jahá tyiñu. Tan nyaá ra yuhu mesa tan musu ra tsahá tsa catsi ra. Maa tyin yuhu, ra cuví ityi nuu cuví yu, tan cuví yu musu ndo.

²⁸ 'Tan nyoocho cuví ndo tsa nyecú tsihin yu tandihí nu nyehe yu tundoho. ²⁹ Yacan cuenda, yuhu tsahá yu iin nu cua cundaca ñaha ndo tumaa tsa tsahá Jutu yu tsa cundaca ñaha yu. ³⁰ Tyin cua catsi ndo tan cua coho ndo nu mesa tsihin yu nda nu ndacá ñaha yu. Tan ndacan cua cunyecú ndo cundaca ñaha ndo nyivi cuví tata tsa utsi uvi sehe ra Israel.

Nu caahán ra Jesús tyin cua catyi ra Pedro tyin ña nacoto ra tsi ra

(Mt. 26.31-35; Mr. 14.27-31; Jn. 13.36-38)

³¹ Tacan tan catyí ra Jesús tsihin ra Pedro:

—Nyehe vaha un, yooho Simón. Tyin nu ña vaha tsa tsican ndatu nu tsi Nyoo tsa nducu cuhva nu tsi ndo tyin cuñí nu tsa ndu uvi iñi ndo tsa tsinú iñi ndo tsi Nyoo. ³² Maa tyin tsican tahvi xaan yu tsi ra tsa cuenda un, na ña jandihí un tsa tsinú iñi un tsi yu. Tan tsa ndu uvi iñi un cuatyí un, tan natsinu vaha nyico iñi un tsi yu, cua jatyinyee un tsi ra yañi un naha ra tsa ña cua jandihí ra naha tsa tsinú iñi ra naha tsi yu —catyí ra Jesús tsihin ra Simón.

³³ Tan ra Simón catyí ra tsihin ra:

—Jutu Mañi yu, tsa ndu iin vaha iñi yu tsa cuhun yu tsihin un vasu vehe caa, vasu cúu yu tsihin un —catyí ra.

³⁴ Tacan tan catyí ra Jesús tsihin ra:

—Pedro, catyí yu tsihin un tyin vityin tsa ndi cumañi ca vacu tsitoocho, yoocho cua catyí un uñi tsaha tyin ña nacoto un tsi yu —catyí ra Jesús tsihin ra.

Nu tsa cuñi tsaa cuhva tsa cua nacuhva cuenda ra Judas tsi ra Jesús

³⁵ Tacan tan tsicá tuhun ra Jesús tsi ra tsicá tsihin ra tan catyí ra tsihin ra naha:

—Nducuhun iñi ndo quivi tsa jacuhun yu tsi ndo tsa cahān ndo tsihin nyivi, tan nduve tsa tsindaha ndo, ndi marali, ndi xuhun, ndi inga pari nditsan ndo. ¿A cumañi tsa cumañi tsi ndo quivi can? —catyí ra Jesús.

—Nduve —catyí ra naha.

³⁶ Tacan tan catyí ra Jesús tsihin ra naha:

—Maa tyin vityin, tatun iyó marali ndo, cundaha ndo. Tan tatun iyó xuhun ndo, cundaha ndo. Tatun nduve mityi ndo, xico ndo iin jahma ndo tan jata ndo mityi ndo. ³⁷ Tyin catyí yu tsihin ndo, tyin tandihi tuhun yu tsa nyaá nu tutu Nyoo cua cundaa tsi, tyehen catyí tsi: “Cua tatsi tuñi nyivi tsi ra tumaa tsa cuví ra iin ra caquiñi.” Tacan catyí tuhun yu nu tutu Nyoo. Tan tandihi tsa catyí tsi tsa cuenda yu cua cundaa tsi —catyí ra.

³⁸ Tacan tan catyí ra tsicá tsihin ra:

—Ihya nyecú uvi taahan mityi —catyí ra naha.

—Tsa iyó vaha ñi —catyí ra Jesús.

*Nu tsican tahvi ra Jesús tsi Nyoo nda Getsemaní
(Mt. 26.36-46; Mr. 14.32-42)*

³⁹ Tacan tan quit̃a ra Jesús vehe nu nyií ra. Tan cuahán ra yucu Olivo, cuhva tuhvá maa ra tsicá. Tan ra tsicá tsihin ra cuahán ra naha nyicún ra naha tsi ra. ⁴⁰ Tan tsa tsaá ra naha ndacan, catyí ra tsihin ra naha:

—Ndacan tahvi ndo tsi Nyoo tyin tacan tan ña cuvi jaha canaa nu ña vaha tsi ndo.

⁴¹ Tacan tan cuahán ra Jesús tsa cañi luxu ca, tumaa tsa cañi tsaá iin yuu tun cañi yo can. Tacan tan tsicuiñi tsihi ra. Tan quitsahā caahán ra tsihin Nyoo, ⁴² tan catyí ra:

—Tyatya Jutu yu, tun yoocho tan cuñi un, jatsiyo tundoho tsa cua nyehe yu ihya. Maa tyin na ña cuvi cuhva cuñi maa yu. Na cuvi cuhva cuñi maa un —catyí ra Jesús.

⁴³ Tacan tan quituvi iin ángel Nyoo, tyin cuhva ra tunyee iñi tsi ra Jesús. ⁴⁴ Tan tsitsi tsa nyehé xaan ra Jesús tundoho tsa cuiihya xaan cuñi ra, tan ñihi ca tsican tahvi ra tsi Nyoo. Tan cuaha xaan tyeen ra quitá tan tsatí tsi nu ñuhu, tan caá tsi tumaa caá niñi.

⁴⁵ Tacan tan nduvita ra tsa ndihī cahan ra tsihin Nyoo. Tan cuahán nyico ra nu yucú ra tsicá tsihin ra. Tan nyehe ra tyin quixí ra naha, tsa cuenda tsa cuiihya xaan cuñi ra naha, ña cunyeē iñi ra naha ñumaahna tan quixi ra naha.

⁴⁶ Tacan tan catyí ra Jesús tsihin ra naha:

—¿Nacuenda quixí ndo? Nduvita ndo. Tan ndacan tahvi ndo tsi Nyoo, tyin tacan tan ña cuvi jaha canaa nu ña vaha tsi ndo.

Nu tsahā cuenda ra Judas tsi ra Jesús tsi nu xaan iñi tsi ra

(Mt. 26.47-56; Mr. 14.43-50; Jn. 18.2-11)

⁴⁷ Ndi caahán ca ra Jesús yacan, tan tsaā cuaha ra catsaa. Tan ityi nuu, vatsí nu Judas, iin ra tsicá tsihin ra Jesús. Tan natuhvā nu nu nyaá ra Jesús tyin tyayuhu nu tsi ra. ⁴⁸ Tacan tan cahān ra Jesús tsihin nu:

—Yooho Judas, ¿a tsihin tsa cua tyayuhu un tsi yu, tan cua nacuhva cuenda un tsi yuhu Rayi tsa quee nda gloria tsi nu xaan iñi tsi yu nahnu? —catyí ra Jesús.

⁴⁹ Tan ra nyecú tsihin ra Jesús quitsahā nducú tuhun ra naha tsi ra:

—Jutu Mañi ndi ¿a vaha cahnya ndi tsi ra naha tsihin mityi? —catyí ra naha.

⁵⁰ Tacan tan iin ra can, tsahnya ra soho tsiyo cuaha iin ra tsa cuví musu ra jutu tsaahnu tsa cuví ityi nuu.

⁵¹ Maa tyin ra Jesús catyí ra tsihin ra:

—Jaña ndo. Vaha ñi —catyí ra.

Tacan tan tñin ra Jesús soho ra ican tan janduvahā ra itsi. ⁵² Tan ra jutu tsa cuví ityi nuu naha ra tsihin ra yihí ndaha tsi ra jahá cuenda vehe ñuhu naha ra, tan ra cuví mandoñi naha ra, juvin ra naha cuví ra tsahān tsitñin tsi ra Jesús. Tan catyí ra Jesús tsihin ra naha:

—¿A vatsí tñin ndo tsi yu tumaa tñin ndo iin ñasuhu? tyin ndaha ndo mityi tan yutun. ⁵³ Ndihi quivi tsinyii yu tsitsi vehe ñuhu cahnu, tan ña tñin ndo tsi yu ndacan. Maa tyin vityin tsaā cuhva tsa ndunaā tyin nu ña vaha ndacá ñaha. Yacan cuenda vatsí tñin ndo tsi yu.

*Nu caḥan ra Pedro tyin ña nacotó ra tsi ra Jesús
(Mt. 26.57-58, 69-75; Mr. 14.53-54, 66-72; Jn.
18.12-18, 25-27)*

⁵⁴ Tacan tan tiin ra naha tsi ra Jesús. Tan tsin-
daca ra naha tsi ra nda vehe ra jutu tsaahnu tsa
cuví ityi nuu. Tan ra Pedro ndasava ñi cuahán
ra nyicún ra. ⁵⁵ Tan tsa tsaá ra naha vehe ra jutu
tsaahnu tsa cuví ityi nuu, jataḥan ra tsa cuví musu
naha ra ñuhū nuquehe. Tan tsinyecu ra naha tani
canduvi nu cayú ñuhū can. Tan tsinyaá ndihi ra
Pedro tyañu ra naha. ⁵⁶ Tan tsa ndunditsín tsa
cayú ñuhū ican, tacan tan iin ñaha tsa cuví musu
jutu can, nyehe ña tsi ra Pedro. Tan catyí ña:

—Ra ihya tsicá tucu ra tsihin ra can —catyí ña.

⁵⁷ Maa tyin ra Pedro catyí ra:

—Yuhu ña nacotó yu tsi ra can.

⁵⁸ Tañi ñi tan nyehe tucu inga nyivi tsi ra Pedro,
tan catyí ñi tsihin ra:

—Yooho, cuenda ra ican cuví un —catyí ra.

Tan ra Pedro catyí ra:

—Ña nditsa

⁵⁹ Tan tsa yaha iin hora, tan nyehe tucu inga ra
tsi ra Pedro tan catyí ra tsihin ra:

—Tsa nditsa tyin juvin ra ihya cuví iin ra tsa
tsicá tsihin ra can. Tyin juvin ra Galilea cuví ra
—catyí ra.

⁶⁰ Tacan tan catyí ra Pedro:

—Ña tsitó yu náa caahán un —catyí ra.

Tan juvin ñi cuhva can, tsitsi tsa ndi caahán ca
ra Pedro tan navacu ñi iin tsitooḥo.

⁶¹ Tacan tan ra Jesús nanyehe ra nuu ra Pedro.
Tan ra Pedro nducuhun iñi ra tsa caḥan ra Jesús
tsihin ra: “Tsa ndi cumañi ca navacu tsitooḥo,

yooho tsa cahan un uñi tsaha tyin ña nacotó un tsi yu.”

⁶² Tacan tan quita ra Pedro ityi tsata vehe. Tan tsacu xaan ra tsa cuihya cuñi ra.

Nu tsacu nducu nyaa ra naha tsi ra Jesús tan cañi ra naha tsi ra

(Mt. 26.67-68; Mr. 14.65)

⁶³ Tacan tan ra jahá cuenda tsi ra Jesús, quitsaha tsacu nducu ra naha tsi ra. Tan cañi ra naha tsi ra.

⁶⁴ Tsahñi ra naha jahma nuu ra, tan quitsaha cañi ra naha nuu ra. Tan catyi ra naha tsihin ra:

—Nacoto yoo ra cañi tsi un —catyi ra naha tsihin ra.

⁶⁵ Tan cuaha xaan ca maa tsa cahan nyaa ra naha tsi ra.

Nu tsica tuhun mandoñi naha ra tsi ra Jesús tatun Sehe Nyoo cuvi tsi ra

(Mt. 26.59-66; Mr. 14.55-64; Jn. 18.19-24)

⁶⁶ Tan tsa cunditsin inga quivi, tan ndu iin ra cuvi mandoñi tsahnu ñuu can tsihin ra jutú tsa cuvi ityi nuu naha ra, tan tsihin ra maestro cuenda ley vehe ñuhu naha ra. Tan quihin ra naha tsi ra Jesús, cuahán tsihin ra nda nu cua coo Junta Cahnu. Tan nducu tuhun ra naha tsi ra Jesús:

⁶⁷ —Cati tuhun tsihin ndi tun juvin ra Cristo cuvi un —catyi ra naha tsihin ra.

Tan ra Jesús nacahan ra tan catyi ra:

—Tatun catyi yu tsihin ndo tyin juvin yu cuvi, ña cua tsinu iñi ndo tsa cahan yu. ⁶⁸ Tan tatun nducu tuhun tucu maa yu tsi ndo, ña cua nacahan ndo, tan ndi ña cua jaña ndo tsi yu. ⁶⁹ Maa tyin vityin tan ityi nuu ca, Rayi tsa quee nda gloria

cua cunyaa ra xiin cuaha Nyoo, ra tsa iyó tandihí tunyee iñi —catyí ra Jesús.

⁷⁰ Tacan tan tandihí ra naha tsicā tuhun ra naha tsi ra:

—Tun tacan, Sehe Nyoo cuví tsi un —catyí ra naha.

Tacan tan nacahan ra Jesús tan catyí ra:

—Juvín, sehe Nyoo tsi yu tumaa catyí maa ndo.

⁷¹ Tacan tan natuhun tahan ra naha:

—Tsiñí ndo tsa caahán ra. Ña cuñí ca tsi tsandaa. Tyín tsa tsiñí maa yo tsa cahan ra —catyí ra naha.

23

*Nu nyehe ra Pilato tyín nduve cuatyí ra Jesús
(Mt. 27.1-2, 11-14; Mr. 15.1-5; Jn. 18.28-38)*

¹ Tacan tan nduvitā tandihí ra naha. Tan tsindacā ra naha tsi ra Jesús nda nu nyaá ra Pilato, [ra ndacá ñaha quee nda ñuu Roma]. ² Tacan tan quitsaha tyaa ra naha cuatyí tsi ra Jesús nuu ra Pilato tan catyí ra naha tsihin ra:

—Ra ihya, jativí ra tsi nyiví tsihin tsa caahán ra tsihin ñi, tyín caahán ra tyín ña vaha tsa tyahvi ndi xuhun tsi ra ndacá ñaha nda ñuu Roma. Tan caahán tucu ra tyín cuví ra Cristo, ra tsa jaquitsi Nyoo tyín cuví ra rey —catyí ra naha tsihin ra Pilato.

³ Tacan tan ra Pilato tsicā tuhun ra tsi ra Jesús:

—¿A yoocho cuví Rey cuenda nyiví Israel? —catyí ra.

Tan nacahan ra Jesús tan catyí ra:

—Juvín, tumaa catyí maa un.

⁴ Tacan tan catyí ra Pilato tsihin ra jutu tsa cuví ityi nuu naha ra, tan tsihin nyiví:

—Nduve cuatyi ra ihya —catyi ra tsihin ñi.

⁵ Maa tyin jañihĩ ca ñi caahán ñi. Tan catyi nyico ñi:

—Cahnu xaan cuatyi ra. Tyin cuaha xaan tsihi tsahá ra, tyin jacuahá ra tsi nyivi. Tsa jihna ñi quitsaha caahán ra tsihin nyivi iyó ñuu tsa cayucú Galilea. Tan nani ityi vatsí ra, jacuahá ra tsi nyivi. Tan vityin tsa tsaá ra Judea ihya tan juvin ñi yacan javahá ra —catyi ñi.

Nu jacuhun ra Pilato tsi ra Jesús nu nyaá ra Herodes, ra cuví rey nyivi iyó Galilea

⁶ Cuhva tsa tsiñi ra Pilato yacan, tan nducu tuhun ra tatun ra Galilea cuví ra Jesús. ⁷ Tan catyi nyivi tsihin ra tyin juvin. Tacan tan jacuhun ra Pilato tsi ra nda nu nyaá ra Herodes. Tyin ra Herodes cuví ra ndacá ñaha Galilea can. Tan quivi can nyii ra ñuu Jerusalén. ⁸ Tan cuhva tsa nyehe ra Herodes tsi ra Jesús, si xaan cuñi ra. Tyin tsanaha xaan cuñi ra nyehe ra tsi ra. Tyin ñihĩ tuhun ra tyin cuaha xaan tsa iyo javahá ra. Tan cuñi xaan ra nyehe ra iin tsa iyo tsa cua javaha ra Jesús. ⁹ Tan cuaha xaan tsa nducu tuhun ra Herodes tsi ra Jesús. Maa tyin ra Jesús ña nacahan maa ra. ¹⁰ Ican nyecú ndihĩ tucu ra jutu tsa cuví ityi nuu naha ra, tan ra maestro cuenda ley vehe ñuhu naha ra. Tan tyaa xaan ra naha cuatyi tsi ra Jesús. ¹¹ Tacan tan ra Herodes tsihin andaru cuenda ra, tsacu nducu ra naha tsi ra. Tan jacunditsi nuu ra naha iin jahma yahvi tan si caá tsi ra Jesús, tumaa caá tsa tuhvá rey tsinditsi. Tacan tan jacuhun nyico ra Herodes tsi ra nda nu nyaá ra Pilato. ¹² Tan quivi can ra Pilato tsihin ra Herodes nduvahá iyó ra

naha. Tyin nu quitsi quivi, ña cuvi nyehé tahan ra naha tsi ra naha.

*Nu cutuñi ra Jesús tyin cua cúu ra
(Mt. 27.15-26; Mr. 15.6-15; Jn. 18.39-19.16)*

¹³ Tacan tan ra Pilato jandu iin ra tsi ra jutu tsa cuvi ityi nuu naha ra, tan ra cumi tyiñu vehe ñuhu naha ra, tan tsihin tandihi nyivi. ¹⁴ Tan catyí ra tsihin ñi:

—Nyooho quitsi ndaca ndo tsi ra ihya nu nyaá yu. Tan catyí ndo tyin jativí ra tsi nyivi. Maa tyin yuhu tsa jacutuñi yu tsi ra nuu ndo. Tan nduve cuatyí ra tumaa cuhva cahán ndo can nañihí yu. ¹⁵ Tan ndi ra Herodes tan ña nañihí ra ndi intuhun cuatyí ra. Yacan jaquitsi nyico ra tsi ra inga tsaha nu nyaá yu. Nyehé ndo tyin nduve cuatyí ra. Tan yacan ña taahán tsi tsa cúu ra. ¹⁶ Yacan cuenda cua tatsi tuñi yu tsi ra. Yaha can tan cua jaña yu tsi ra —catyí ra Pilato.

¹⁷ Tacan catyí ra Pilato tyin tsitsi vico ican, taahán tsi tsa jaña ra iin ra yucú vehe caa, tumaa tuhvá maa ra icá. ¹⁸ Maa tyin tandihi nyivi iin caa ñi cana tsaa ñi tan catyí ñi:

—Cahñi tsi ra Jesús. Tan jaña tsi ra Barrabás —catyí ñi.

¹⁹ Tan ra Barrabás can nyii ra vehe caa tsa cuenda tsa cañi tahan ra tsihin ra cumi tyiñu ñuu can. Tan inga tuhun tyin tsahñi ra nyivi. ²⁰ Tan ra Pilato cuñi ra jaña ra tsi ra Jesús. Tan quitsaha caahán ra tsihin nyivi can inga tsaha tyin cua jaña ra tsi ra. ²¹ Maa tyin nyivi tsaa ca cana tsaa ñi:

—¡Tyaa tsi ra nu cruu. Na cúu ra nu cruu!

22 —¿Náa tsa ña vaha javahā ra ihya? Tan nyehé yu tyin ña taahán tsi tsa cúu ra. Cua tatsi tuñi ñi yu tsi ra, tan cua jaña yu tsi ra —catyí ra Pilato.

23 Maa tyin nyívi canā tsaa ca ñi, tan catyí ñi tyin nacañi ra tsi ra Jesús nu cruu. Tan maa ñi tan tsihin ra jutú tsa cuví ityi nuu naha ra, ñihí ñi tsa cuñí ñi tyin canā tsaa xaan ñi. 24 Tacan tan javahā ra Pilato cuhva cahan ñi. 25 Tan jaña ra tsi ra Barrabás, ra tsa nyíi vehe caa tsa cuenda tsa cañi tahan ra tsihin ra cumí tyiñu tan tsa cuenda tsa tsahñi ra nyívi. Tan nacuhva cuenda ra Pilato tsi ra Jesús tsi ñi cuhva cuñí maa ñi.

Nu tyaa ra naha tsi ra Jesús nu cruu

(Mt. 27.32-44; Mr. 15.21-32; Jn. 19.17-27)

26 Tacan tan quihín andaru tsi ra Jesús. Tan cuahán ra tsihin ra naha. Tan tiín tucu ra naha tsi iin ra ñuu Cirene nañí Simón. Ra ican ndi vatsí nuhu ra quee ra cuhu. Tan jañiñi ra naha tsi ra tsa cuiso ra cruu ra Jesús. Tan cuhun ra ityi tsata ra.

27 Tan cuaha xaan nyívi cuahán ityi tsata ra Jesús. Tan cuaha xaan ñiñaha tsacú xaan ñi tsa cuihya cuñí ñi tsacatyí tundoho tahan ra. 28 Maa tyin ra Jesús nanyehé ra nuu ñi. Tan catyí ra tsihin ñi:

—Tandihí nyooho, ñiñaha ñuu Jerusalén ihya, ña vacu ndo tsacatyí yuhu. Vacu ndo, tsacatyí maa ndo tan tsacatyí sehe ndo. 29 Tyin cua quitsi quívi cua nyehe xaan ndo tundoho. Tan cua cahan nyívi tsi tandihí ndo tsa cuví ndo ñaha tsa ña cuví coo sehe. Tan cua cahan ñi tsihin ndo: “Vaha xaan tyin nduve sehe ndo tsicoo tyin cuaha xaan tundoho nyehé yo vityin”, cua catyí ñi tsihin ndo.

30 Tyin quívi can cua cuñi ñi nduva yucu tsata ñi

tan quihvi xeehe ñi. ³¹ Tyin tatun tyehen icá nyivi tsihin iin yutun vaha, yaha ca cuhva cua ica ñi tsihin yutun ityi —catyí ra Jesús tsihin ñiñaha ñuu Jerusalén can.

³² Tan quihin tucu andaru can naha ra tsi uvi taahan ra iyó cuatyí, tyin cahñi ndihi ra naha tsi ra naha iin caa ñi tsihin ra Jesús. ³³ Tacan tan tsaā ra naha iin nu nañi Yiqui Jiñi Ndiyi. Tan ican tyaa ra naha tsi ra Jesús nu cruu. Tan tacan tyaa ndihi tucu ra naha tsi nduvi taahan ra iyó cuatyí can naha ra. Iin ra tyaa ra naha nuu cruu xiin cuaha ra Jesús. Tan inga ra can tyaa ra naha nuu cruu xiin satyin ra. ³⁴ Tan cuhva tsa nyaá ra Jesús nu cruu can, tan catyí ra:

—Tyatya, Jutu yu, jaha tucahnu iñi tsi ra naha. Tyin ña tsitó ra naha náa javahá ra naha tsihin yu —catyí ra.

Tacan tan andaru can naha ra tava ra naha suerte tsihin jahma ra Jesús, tyin nyehe ra naha ndaa ra cua jaha canaa jahma can. ³⁵ Tan nyivi nyecú ñi nyehé ñi. Tan ra cumí tyiñu vehe ñuhu naha ra, tsacú nducu ra naha nyehé ra naha tsi ra Jesús. Tan catyí ra naha:

—Jacacu ra tsi inga nyivi. Na jacacu ndihi tucu maa ra tsi ra vityin, tun nditsa tsa ra Cristo, ra tsa jaquitsi Nyoo, cuví ra —catyí ra naha.

³⁶ Tan juvin ñi cahan nyaá ra andaru can naha ra tsi ra. Tan natuhva ra naha nu ticaá ra. Tan tsaḥa ra naha vinu iya tsihi ra. ³⁷ Tan catyí ra naha tsihin ra:

—Tatun rey cuenda nyivi Israel cuví un, jacacu tsi un —catyí ra naha.

³⁸ Tan jiñi cruu nu nyaá ra Jesús nyaá iin tsa tyaa ra Pilato tsihin sahan griego, sahan latín, tan sahan hebreo. Tyehen caahán letra can: “Juvín ra ihya cuví Rey cuenda nyívi ñuu Israel” —catyí letra can.

³⁹ Tan iin ra tsa iyó cuatyí tsa nyaá nu cruu xiin ra Jesús, quitsahā caahán nyaá ra tsi ra:

—Tatun nditsa tyin ra Cristo cuví un, j̄acacu tsi un. Tan j̄acacu ndih̄i tsi nyuhu —catyí ra can.

⁴⁰ Maa tyin inga ra can catyí ra tsihin ra:

—¿A ña yuuhví un tsi Nyoo? Tyin juvin ñi tundoho tsa taahán ra ihya, tan taahán un vityin.

⁴¹ Maa yo nyehé yo tundoho maa tyin iyó cuatyí yo. Tan ra ihya nduve cuatyí ra iyó —catyí ra can.

⁴² Tacan tan catyí ra can tsihin ra Jesús:

—Yoohe Jesús, nducuhun iñi tsi yu quívi cundaca ñaha un —catyí ra.

⁴³ Tacan tan ra Jesús nacahan ra tsihin ra tan catyí ra:

—Tsa nditsa caahán yu tsihin un tyin juvin ñi vityin tan cua cunyaa un tsihin yu nda paraíso [nu yucú añima nyívi tsinú iñi tsi Nyoo] —catyí ra Jesús tsihin ra.

Nu tsihi ra Jesús

(Mt. 27.45-56; Mr. 15.33-41; Jn. 19.28-30)

⁴⁴ Tacan tan cuhva ora quitsahā ndunaá nu ñuhu ñayívi, nda cuanda caa uñi tsa tseñi. ⁴⁵ Tyin ndunaá ñicanyii. Tan jahma tsa ticaá tsitsi vehe ñuhu cahnu, ndatā sava tsi. ⁴⁶ Tacan tan canā tsaa ra Jesús tan catyí ra:

—Tyatya, Jutu yu, tyaa cuenda yu añima yu ndaha un —catyí ra.

Tan cuhva tsa cahan ra tacan, tan tsihi ra.

⁴⁷ Tan ra cuví capitán cuenda andaru can naha ra, nyehe ra tandihí tsa cuví. Tan jacahnú ra tsi Nyoo, tan catyí ra:

—Nduve tsa cuii cuatyí ra ihya tsicoo —catyí ra.

⁴⁸ Tan tandihí nyívi tsa nyecú ican, nyehe ñi tsa cuví. Tan cuahán ñi tan quitsahá cañí ndaha ñi yiqui nyica ñi. Tyin tsitó ñi tyin ña vaha tsa javahá ñi tsihin ra Jesús. ⁴⁹ Tan tandihí nyívi tsa nacotó tsi ra Jesús, tan ñiñaha tsa tsinyicun tsi ra nda Galilea, nyecú ñi ndasava. Tan nyehe ñi tandihí tsa cuví can.

Nu cua cutsi ra naha tsi ra Jesús

(Mt. 27.57-61; Mr. 15.42-47; Jn. 19.38-42)

⁵⁰ Tan iyó iin ra vaha, nañí ra José. ra ñuu Arimatea tsa canyíi Judea. Tan cuví ra iin ra cuví ityi nuu cuenda Junta Cahnu nyívi Israel. ⁵¹ Tan ra José can ndatú ra quívi tsa cua cundaca ñaha Nyoo. Tan ña ndoo ra vaha tsihin tsa javahá ra cutahán tsihin ra, ra cuví jutu tsa cuví ityi nuu naha ra. ⁵² Tacan tan tsahan ra José can tsindacan ra cuñu ñuhu ra Jesús tsi ra Pilato. ⁵³ Tan yahá tsa januu ra José can cuñu ñuhu ra Jesús nu cruu, cava nuu ra iin jahma tsi ra. Tan cuahán ra cua cutsi ra tsi ra tsitsi iin ñaña tsaa tsa cuví yavi yuu tsa javahá nyívi tan ñaha ca quihvi ndiyi tsitsi can. ⁵⁴ Tan viernes cuví can, quívi tsa janduvahá nyívi tsa catsi ñi tsa sabaru, quívi quitatú ñi. Tan tsa cua tahan tsi quívi can.

⁵⁵ Tan tandihí ñiñaha tsa quee tsihin ra Jesús Galilea, cuahán ñi cua nyehe ñi tsitsi yavi yuu can. Tan nyehe ñi cuhva canyíi cuñu ñuhu ra. ⁵⁶ Tan cuanuhu ñi nda yuvehe ñi. Tan janduvahá ñi

ndutya tami tyin cua tyihi ñi cuñu ñuhu ra Jesús. Tacan tan quitatu ñi inga quivi can tumaa catyi maa tuhun tsa tsaha cuenda Nyoo tsi yo.

24

Nu nandoto ra Jesús

(Mt. 28.1-10; Mr. 16.1-8; Jn. 20.1-10)

¹ Tsa tuvı tumingı quivı nu quitsahá vitya, cuahán ñiñaha can nu ñaña ra Jesús. Tan nyisó ñi ndutya tami tsa janduvahá ñi. ² Tan cuhva tsa tsaa ñi, nyehe ñi tyin tsa cuatsiyo yuu tsa ndası yuhu ñaña can. ³ Tan quihvı ñi tsitsi ñaña can, maa tyin ña nañihı ñi cuñu ñuhu Jutu Mañi yo Jesús. ⁴ Tan yucú ñi tsihin tsa yuuhvı ñi. Tan ña tsitó ñi náa cua javaha ñi. Tan sana iñi ñi quituvı uvi taahan rayıı nuu ñi. Tan xiñu xaan jahma nditsı ra naha. ⁵ Tan tsihin tsa yuuhvı ñi, tan tsaquın ñi jiñi ñi nda nu ñuhu. Tacan tan catyi ra can naha ra tsihin ñi:

—¿Nacuenda nanducú ndo tsi ra nyito nu yucú ndıyı? ⁶ Nduve ca ra nyıı ihya, tyin tsa nandoto ra. Nducuhun iñi ndo tsa cahán ra tsihin ndo quivı tsica ra Galilea. ⁷ Catyi ra tyin taahán tsi nacuhva cuenda nyıvı tsi ra ndaha ra iyó cuatyı naha ra. Tyin cuvı ra Rayıı tsa quee nda gloria. Tan taahán tsi tyin cahñi ra can naha ra tsi ra nu cruu. Maa tyin tsa tsinu uñi quivı cua nandoto ra. Tacan catyi ra tsihin ndo —catyi ángel can naha ra tsihin ñi.

⁸ Tacan tan nducuhun iñi ñi tsa cahán ra Jesús quivı can. ⁹ Tan cuanuhı ñi. Tan nacatyı tuhun ñi tsihin tsa utsi iin ra tsa tava tyiñu ra Jesús tan tsihin tandihı ca nyıvı tsa tsinyicun tsi ra. ¹⁰ Tan ñiñaha tsa tsicatyi tuhun tsihin ra naha cuvı ñi:

ña María Magdalena, ñaha quee Magdala, tan ña Juana, tsihin ña María sihi ra Jacobo, tan tsihin juhva ca ñiñaha. ¹¹ Maa tyin ra tava tyiñu ra Jesús cuñi maa ra naha tyin caahán ñi maa ñi. Tan ña tsinú iñi ra naha tsa caahán ñi.

¹² Maa tyin ra Pedro nduvita ra tan tsinú xaan ra cuahán ra cua nyehe ra tsitsi ñaña nu tinyii ra naha ra Jesús tatun nditsa. Tan nyehe ra tsitsi yavi yuu can tyin jahma tsa tsindasi ña ra canyií nda sava. Tacan tan cuanuhu ra yuvehe nu yucú tandihi ca ra naha. Tan iyo xaan cuñi ra tsa cuvi.

Tsa cuvi ityi cuahán ñuu Emaús

(Mr. 16.12-13)

¹³ Juvín ñi maa quivi can, uvi taahan ra tsiny-icun tsi ra Jesús cuahán ra naha ñuu Emaús, tumaa utsi iin kilómetro tsa quee yo ñuu Jerusalén. ¹⁴ Tan cuahán ra naha tan natuhún tahan ra naha náa ndihi tsa cuvi. ¹⁵ Tan tsitsi tsa natuhún ra naha, tan ra Jesús tahan ra tsi ra naha ityi cuahán ra naha. ¹⁶ Maa tyin vasu nyehé ra naha tsi ra Jesús, maa tyin ña nacotó ra naha tsi ra. Tyin tumaa iin tsa tyasí tsi nuu ra naha, tan ña cuvi nacoto ra naha tsi ra Jesús. ¹⁷ Tacan tan nducu tuhun ra Jesús tsi ra naha:

—¿Náa natuhún xaan ndo? ¿Nacuenda cuiihya xaan cuñi ndo? —catyi ra tsihin ra naha.

¹⁸ Tan iin ra tsa nañi Cleofas nacahan ra tan catyi ra:

—Tandihi nyivi tsitó tsa cuvi ñuu Jerusalén. ¿A ra inga ñuu cuvi yooho tyin ña tsito un tsa cuvi? —catyi ra.

¹⁹ Tacan tan catyi ra Jesús tsihin ra naha:

—¿Náa cuvi?

Tan nacatyí tuhun ra naha tsihin ra:

—Tuhun ra Jesús ra ñuu Nazaret. Tyin cuvî ra iin ra cuvî ndusu yuhu Nyoo. Tan tsihin tunyee iñi cahnu Nyoo javahā ra tsa cahnu tan caḥan ra tsa vaha nuu Nyoo tan nuu tandihî nyîvi. ²⁰ Maa tyin ra jutu tsa cuvî ityi nuu naha ra tan ra cumí tyiñu cuenda vehe ñuhu, tsahā cuenda ra naha tsi ra tsi ra ndacá ñaha cuenda ñuu Roma. Tan tsahñî ra naha tsi ra. Tan tsihî ra nu cruu. ²¹ Tan vityin tsa quita uñi quîvi tsa cuvî yacan. Tan nyuhu cuñî maa ndi tyin juvin ra cua jacacu tsi yo tsa cuvî yo nyîvi Israel. ²² Maa tyin vityin iyo xaan cuñî ndi tsa nacatyí juhva ñiñaha tsihin ndi. Tyin maa ñi tsahān ñi nu ñaña ra tsa tuvî. ²³ Tan nduve ca cuñu ñuhu ra canyîi. Tan nacatyí tuhun ndihî ñi tyin nyehe ñi uvi taahan ángel. Tan catyí ángel can naha ra tsihin ñi tyin ra Jesús nyito ra. ²⁴ Yahā yacan tan tsahān tucu juhva ra cutahān tsihin ndi tsinyehe ra naha nu ñaña. Tan nyehe ra naha tyin tsa nditsa cuvî tsa caḥan ñiñaha can. Maa tyin ña nyehe ra naha tsi ra Jesús —catyí ra naha tsihin ra Jesús.

²⁵ Tacan tan catyí ra Jesús tsihin ra naha:

—Luxu xaan cutuñî iñi ndo. Tan cuee xaan tan tsinu iñi ndo tuhun tsa caḥan ra cuvî ndusu yuhu Nyoo taḥan tsanaha. ²⁶ ¿A ña tsitó ndo tyin taahān tsi tsa nyehe jihna ra Cristo tundoho? Yaha can tan tahan tsi cua ñihi ra tyiñu tsa cua cundaca ñaha ra —catyí ra Jesús tsihin ra naha.

²⁷ Tacan tan quitsahā tsahā cuenda ra nácaa cuahān tuhun maa ra nu tutu Nyoo. Tan quitsahā caahān ra tuhun tsa tyaa ra Moisés taḥan tsanaha. Tan yahā can tan caḥan ra tuhun tandihî libru tsa tyaa ra cuvî ndusu yuhu Nyoo.

²⁸ Tan cuhva tsa tsaa ra naha nda ñuu Emaús, nu cuahán ra naha, tan jahá ra Jesús tyin cañi ca cuahán ra. ²⁹ Tacan tan catyí ra naha tsihin ra na ndoo ra tsihin ra naha. Tan catyí ra naha:

—Ndoo tsihin ndi tyin tsa cua cuiso ñicanyii —catyí ra naha.

Tacan tan cuahán ra Jesús tsihin ra naha. ³⁰ Tan cuhva tsa tsinyaa ra yuhu mesa tsihin ra naha, quihín ra paan. Tan tsahá ra tyahvi nyoo tsi Nyoo. Tan tsahnú sava ra, tan tsahá ra tsi ra naha. ³¹ Tan iin yaha ñi nuña nuu ra naha tan nacoto ra naha tsi ra Jesús. Maa tyin ra Jesús naa ihñi ñi ra. ³² Tacan tan quitsahá natuhún tahan ra naha tan catyí ra naha:

—Yacan cuenda vaha xaan cuñí aña yoo tsa vatsí ra tsihin yoo, tan tsahá cuenda ra tuhun Nyoo tsa nyaá nu tutu Nyoo tsi yoo —catyí ra naha.

³³ Ña ndatu ca ra naha, tan cuanuhu ra naha nda ñuu Jerusalén. Tan ñihí tahan ra naha tsihin tsa utsi iin ra tsa tava tyiñu ra Jesús, ndu iin ra naha tsihin juhva ra nyecú tsihin ra naha. ³⁴ Tacan tan tsa utsi iin ra can naha ra nacatyí tuhun ra naha tsihin ra tsa ndi tsaa can naha ra:

—Nditsa tyin Jutu Mañi yoo nandoto ra. Tyin ra Simón nyehé ra tsi ra —catyí ra naha.

³⁵ Tacan tan ra tsa ndi tsaa can nacatyí tuhun ndihí ra naha nácaa natuhún ra Jesús tsihin ra naha ityi cuahán ra naha ñuu Emaús, tan nácaa nacoto ra naha tsi ra nu tsahnú sava ra paan.

*Nu quituvi ra Jesús nu yucú ra tsicá tsihin ra
(Mt. 28.16-20; Mr. 16.14-18; Jn. 20. 19-23)*

³⁶ Ndi natuhún ca ra naha yacan tan quituví ra Jesús tyañu ra naha. Tan tsahá ra nacumi tsi ra naha, tan catyí ra:

—Na coo tsa vaha aña ndo.

³⁷ Tacan tan nayuhví xaan ra naha. Tan cuñí ra naha tyin tatyí ndiyí cuví can. ³⁸ Tacan tan catyí ra Jesús tsihin ra naha:

—¿Nacuenda yuuhví xaan ndo? ¿Tan nacuenda tsicá xaan iñi ndo? ³⁹ Nyehe ndo ndaha yu. Tan nyehe ndo tsaha yu. Tyin juvin ñi maa yu cuví. Tñin ndo tsi yu tan coto ndo. Tyin tatyí ndiyí nduve cuñu ñuhu can iyó. Tan nduve yiquí can tumaa tsa nyehé ndo tsi yuhu —catyí ra Jesús.

⁴⁰ Tan cuhva tsa cahān ra yacan, tan janahā ra ndaha ra tsihin tsaha ra tsi ra naha. ⁴¹ Maa tyin maa ra naha, tsa cuenda tsa iyo cuñí ra naha tan sii cuñí ra naha, nda cuanda ña cuví ca tsinú vaha iñi ra naha. Yacan nacahān ra Jesús tsihin ra naha:

—¿A iyó tsa catsi yo? —catyí ra.

⁴² Tacan tan tsahā ra naha luxu tyaca tyihyo tsihin ndutya ñuñu tsi ra. ⁴³ Tan quihñ ra. Tan quitsahā tsatsí ra nu nyecú ra naha. ⁴⁴ Tan catyí ra tsihin ra naha:

—Tandihi tsa tahān yu, yacan cuví tsa catyí yu tsihin ndo quiví can. Tan catyí yu tsihin ndo tyin tacan cua cuví, tumaa cuhva nyaá tuhun tsa tyaa ra Moisés tan ra cuví ndusu yuhu Nyoo tan tsihin tsa nyaá nu libru salmo —catyí ra tsihin ra naha.

⁴⁵ Tacan tan tsahā cuenda ra Jesús cuhva catyí nu tutu Nyoo. Tan cutuñi iñi tandihi ra naha jahā ra. ⁴⁶ Tacan tan catyí ra Jesús tsihin ra naha tyin tacan nyaá nu tutu Nyoo tyin taahān tsi tsa cúu ra Cristo. Tan tsa tsinu uñi quiví cua nandoto ra.

⁴⁷ Tan taahán tsi coto nyívi tuhun ra Cristo, tyin tatun ndu uvi iñi ñi cuatyí ñi, cua coo tucahnu iñi tsi ñi. Tan jihna ñi cua cahan ra naha tsihin sívi ra Cristo ñuu Jerusalén, yaha can tan tandíhi ca ñuu tanií cahnu nu ñuhu ñayívi.

⁴⁸ Tan catyí tucu ra Jesús tsihin ra naha:

—Tan nyoocho cuví tsandaa tsa cuenda tandíhi tsehe. ⁴⁹ Tan cua jaquitsi maa yu Tatyí Ii Nyoo síqui ndo tumaa tsa catyí Jutu yu tyin cuhva ra tsi ndo. Maa tyin ndoo ndo Jerusalén ihya. Tan ña quita ndo nda cuanda tsa ñihi ndo tunyee iñi Nyoo tsa cua quitsi tsi ndo —catyí ra Jesús.

Nu cuanuhu ra Jesús gloria

(Mr. 16.19-20)

⁵⁰ Tacan tan ra Jesús cuahán ra tsihin tandíhi ra tsica tsihin ra nda ñuu Betania. Tan cañihí ra ndaha ra. Tan nasoco ra tsi ra naha. ⁵¹ Tan tsitsi tsa nasocó ra tsi ra naha, nandaa ra andívi.

⁵² Tacan tan tandíhi ra naha quitsaha jacahnú ra naha tsi ra. Tan síi xaan cuñí ra naha, cuanuhu ra naha nda ñuu Jerusalén. ⁵³ Tan tandíhi quívi tsiyucu ra naha tsitsi vehe ñuhu cahnu, jacahnú xaan ra naha tsi Nyoo.

Tan na cuvi tsi tacan ñi.

**Tuhun tsaa tsa naco jutu mañi yo Jesucristo
tsi yo
New Testament in Mixtec, San Juan Colorado
(MX:mjc:Mixtec, San Juan Colorado)**

copyright © 1994 Wycliffe Bible Translators, Inc.

Language: Mixtec, San Juan Colorado

Translation by: Wycliffe Bible Translators, Inc.

Mixteco, San Juan Colorado [mjc], Mexico

Copyright Information

© 1994, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixtec, San Juan Colorado

© 1994, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022

c270ec54-172a-541f-83e6-7760f619c744